




ЕВГЕНИЙ АФАНАСЬЕВ

ПУРЗЬОМЫН АР ПОМ





Сыктывкар
Коми книжной
издательство
1994






Евгений Афанасьев

ПУРЗЬОМЫН АР ПОМ

ПОВЕСТЬ
ВИСЬТЪЯС



Афанасьев Е. С.

А 94 Пурзёмын ар пом: Повесть, висьтьяс. — Сыктывкар:
Коми книжной издательство, 1994.—104 л. б.

ISBN 5-7555-0472-5

Коми гижысь Евгений Афанасьев оло да уджалö Кослан сиктын. Гижö серамбана висьтьяс, да челядлы тшöтш. Гижöдзяс петавлісны «Войвыв кодзув» журналын. 1988 воын книжной издательство лэдзис сылысь «Кытшъяс» книга.

«Пурзёмын ар пом» — Е. Афанасьевлön выль книга, сiöма челядлы. Унджык висьтыс танi йитчöма миянöс кытшалысь вör-вакöд, сы дорö муслунöн. Чайтам, мый тайö книгасö окотапырысь лыддясны и гырысьяс.

84(2Рос-Коми)-4

А $\frac{4803310100-048}{M 128 (03)-94}$ 20-94 м

ВОЙНА БОРСЯ
ПОВЕСТЬ





1. ДОРӨС

Быд ю вылын эмось сиктъяс, кодъяс, кывтігөн ли, катігөн ли, зэв ылысянь тыдовтчасны. Сынан да сынан, быттьө вөтчан сиктыс бөрся. Сэтчөдз сынан, мый тшыгъялан да кутшөмкө дорөсө пыжнад ляскысьлыны ковмас, нурьясьыштны. Ва бөр кө мунан, поэю и не тшуклыны некытчө. Веськыда пыжад кылалігмоз сөйыштін да-й, мый веськалас ки улад. Ю вылас, гашкө, өти сикт сэтшөмыс и эм, Лосдін, коді ва бөр көть ва катчөс друг петкөдчасувтас син водзад. Сикт весьтас кык кось. Визулось, пыдөсьясас лод. Пондан зібйөн катны берег пөлөныс, да өдва кутшөмкө тшупөдтор веськалас зіб улад, мед водзө йөткысьны. Косьяс костас төня — чери пуканін. Сьөмгаыс тані, ыркыд ваас, гожөмбыд олө, кытчөдз дзыкөдз нин оз зэлав пөк сюрөсыс да оз вөтлы сійөс вывлань, кульман местаясас. Сиктса зонпосныс лыддясны, кымынысь луннас сьөмгаыс петалө-бузнитчылас. А мый не лыддынысө, дорөсысь кузь лунтырйөн оз кайлыны да. Дас кымынысь купайтчасны. Либө ыркыдджык поводдяө пуджлаласны гач кокъяссө да келасны кывтыд коськас ләньюрьясөс да налимпиянөс кутавны. Шуны-горөдны чой йывсянь, мед кайисны нин сэсса, некодлы. Мамъяс, вермысь на дед-баб да гырысьджык чой-вок видз вылынөсь. Батъяс унджыкыслөн абуөсь — эз воны бөр война вывсьыс. Бөр локтөмвыв жө эськө вөрзылісны татысь. Гажаа мөдөд-

чылісны — быд пыжын гудока. Сөмын бөрдысьяс изъяс
вылас уна жө колис.

Микальлөн мамыс таво гожөмбыд кежлө карө муніс.
Сійө медичка, да мөдөдісны велөдчыштны. Олөй, шуө,
кызкө-мыйкө баба-пия, ме волывлыны понда.

— Волывлөмыд — сійө код төдас, — шуө Елисава баб, —
а ми кызкө олам. Дерт, олам. Детинкаыд, слабог, абу нин
потан пыдөсса, дас кыксө тыртө. Меным отсөг да-й горт
олысь.

Батыс Микальлөн тожө эз во. Бабыс шуан кылөн,
Гитлер жө нятшкис. Сэссия бабыслөн мөд пи вылө усян
юөр воліс. Коймөдыс служитө на, Сахалинын. Гижліс,
японечьясөс кор нин вермөмны, а таво ар сөмын на лэдзас-
ны. Но и мед — ичөт пиыс на эм — некоді оз төд, көні.
Ставыскөд өтлаын война вылө жө мунліс, а усян юөрыс
эз воы, вошөма. Сійө и эм Елисава баблөн медыджыд
шогыс. Усьөм пияныс жаль, нинөм и шуны. Но өд найө,
гижөмаөсь тай, геройскөя пөгибнитөмны Рөдина дорйиг-
өн. Налы кыкнанныслы пай вылас мам синваыс воис зэв
нин уна, а вошөм пиыс вөсна киссьө помтөг. Сэссия быдтор
шуысьяс эм, бурсө и лёксө. Мукөдыс: эн нин бөрд сэссия,
Елисава, ачыс кыскө югдас, письмөтор ыстас. Мөдъяс,
мөдарө, ырзөдөны мам сьөлөм пессьөмсө. Пленө кө, шуө-
ны, сдайтчис, гортас оз нин лысьт локны. Син пемдывтөдз,
юр садь бергөдчывтөдз дойдөны тайө кывъясыс Елисава
бабөс. Сійө некыз оз көсйы гөгөрвоны, сямнас ни сьөлөм-
нас, мый сылөн пи ас вөляысь вермас пленө сюртчыны.

Сьөкыд висьтавыны, коді Лосдінын медся сөрөн водө,
медся водз садьмө. Микаль тай чайтө, оз кө и водлыны
йөзыс-а. Рытнас каяс сарайө, вонйө, да ыж ку шебрас улас
дыр на кывзас сиктса шыяссө. Со бабыс петө посводзө,
литовкасө нуө дорөдны Як Васьлы. Ачыс шуалө: «Керка
тыр мужик вөлі да литовка дорысь эз коль. Ковмас аслым

велөдчыны». Картасянь кылө мөслөн рөмидзтөмыс. Кадысь кадө сійө ышловзылө, шогалө ли мый аслас мөс делөяс вөсна. Со Агни тьот петөма кильчө дорас, Вань писө корсысьө. Тайө каднас Вань зырөдлас гумлаяс дорө нидзув корсыны. Микаль төдө та йылысь, но сылы дышнин вонсыс петны да висьтавны. Дум вылас уськөдлө войдөрлунгьясө. Делөыс тешкодь вөлі — быд лун он аддзыв. Ваньлөн горт дорөсас эм зэв ыджыд из — кыкөн пуксыны төраң. Берег визьсянныс абу и ылын, но келыштны колө. Рыт-асывгьяссө Вань тани вуграсьлө. Мамыс весиг быд лун видз ғылө оз ыстыв, мед пиыс черитор кыйыштас. Местаыс сідзсө вуграсьнысө абу лёк, буретш катыд кось бөжыс. Мыкыс төнясыс кыпөдчылас, да-й комыс на шедлывлө. Войдөр асыв Микаль лэччис дорөсө, төрөдчис Ванькөд из вылас да гораа несйис.

— Эн мыссьыв али мый? Тадзи тэ менсыым став черисө Мегйылөдз вөтлан.

Микаль мыссис да чышкысис гач волысгьяс косттыс кыпөдлөм дөрөм бөжас.

— Но вот, таджикөн. А өни пукалышт ме пыдди, купайтчыны ветла. Со тай ставөн нин ваынөсь.

Изйыс шоналөма нин. Микаль гоз-мөдысь чөвтліс вугырсө, некоді эз шед да, бытшкис шатин помсө из горулас. Мед пө ачыс кыяс. Шыбитчис гатшөн шоньд из вылас да пондіс видзөдны кымөрьяссө. Муа-енэжа костас варыш чөлалө. «Сэні сылы, дерт, ыркыд, ваө пырны оз ков», — думайтө Микаль. Та бөрын ачыс эз и төдлы, кызд унмовсис, шонтіс изйыс кос лысьөмсө да. Вугыртлігкостыс мык шедас. Пессяс-пессяс да каяс дзик кос вылас. Варышлөн синмыс ёсь, ставсө вылісянь аддзө. Мыксө аддзис жө, шыбитчис, кватитіс да-й нылыштіс лэбигмозыс вугырнас быдсөн. Микаль садьмис кодлөнкө горөдөм шыө:

— Ваньө, вугыр шатиныд кытчөкө сувтса мунө!

Микаль аддзыліс жё, кызди шатин діныс то кыпөд-чылас ва веркөссяныс, то ваас тшуклас. Сідз йөктігтыр и кайис мөдлапөвса раскас да вошис. Таысь и ковмис мынтысьны Микальлы мышкас кык дуньыкөн. Вань вы-лө сійө, дерт, эз лөгась, ыджыджык ёртсянь да, терпитіс.

2. МЕДБУР КАД — СІЙӨ АСЫВ

Елисава бабыс Микальёс велөдіс водз чеччыны. Век вөлі шуө: «Коді асылын дыр узыө, став олөмсө узяс». Сиктса шыясыс асывнас нөшта на озырөсь, но талун Микаль садьмис ном дзизган шы улө. Вон саяс найө лыдтөм-тшөттөм лэбалөны да колөкө мед дзизгөны сәні. Но өд бура уна вон пытшкас пырөма, да быттө гөрд кольяс өшйөмны ситечас. «Вир юысьясыд, кыті нө эськө найө пырөны?» — думайтө детинка да аддзө юр весьтсьыс ичө-тик розь, ном төрмөн и эм. Аддзис, кызди пырөны сәті. Номыс первой вон вылас пукяс да розьөдзыс лөктө подөн. Сэсья и суйсяс. «Тырмө тай сямныс, а розьсө ков-мас вурыштны талун».

Номъясысь мынтөдчөм бөрын Микаль бара на шеб-расьлө да шыяс сертиыс көсьө гөгөрвоны, зэв-ө нин сёр талун али вывті водз на. Петыр дед тай петөма нин виль пыжас тотшкөдчыны-а, кылө. Сійө оз узы, быдөнөс садь-мөдас. Чой дорас, ас пывсян бокас лэбув эм, да сәні век мыйкө мастеритө. Оз кө пыж кодлыкө вөч, пестер-көрзина кыө, маль лөсалө. Весь оз овлы. Тшыңасьысь калляныс век вомас, оз дугдыв нөнялөмысь. Узигөныс босьтлас ли оз ли-а? Лөкджык, зөрадзык поводдяө сиктса зонпосниыс сы дорө чукөртчасны лэбулас. Петыр дедкөд некор оз ов-лы гажтөм — мойдөм-байтөмнас кужө челядсьө ылөдлы-

ны. Мукөддырйи шмонитөм ради вөйылө кодлыкө кал-
лянсө, он-ө пө кыкыштлы өтчыд.

— Он көсйи? Но дак оз и ков, дитя. Ыдждыд пөльзаыс
таыс нинөм абу. Бабыс тай меным мый эз и вөчлы, мед
шыбиті куритчөмсыйс. Коркө вөлі чунь гыжсө посниа
шырлөма да пуктөма табакас.

— А мыйла нө чунь гыжсө?

— Тьфу! Эн нин казътыв. Сы кодъ прөтивнөйыс өд
сэсса нинөм абу. Кыски сэки тшынсө ас пытшкам да тө-
көтө гугөн эг ло, сэтшөма восөдіс. Каллянсө ылө на шы-
битлі. Корси жө бөрнас.

— А кыдзи нө пач трубаас каллянтө уськөдлін?

— А-а. Сійө өд ме кольөм ар Вась Матренлы войла-
дор керкаас пач тэчи. Вевт вылас нин уджалі, трубаасө
вөлі кыпөда. Матреныс чардаксянныс меным кирпичсө
мыччалө. Ачыс жө өти кирпич неуна сөмын өшйөдыштас
төс вылас да аслас жө юр вылас и бөр усьө. Матрен ойөс-
тіс, а ме юалі, мый нө лоис? Юалі, да-й калляныс вомсьым
трубаас исковтис. Грек вылас и юшкаыс на восьсөн вөлө-
ма. Лэччи сэсса да өтилаысь-мөдлаысь босьтавлі кирпичь-
яссө, гудйысьлі кинам — некөн абу. Ковмис трубасянныс
бөр разявлыны. Со өд сійө куритчөмыс кутшөм. Эн жө
бара босьтөй воманыд. Здоровьеныд томөн-бурөн оз ло...
да-й куритчысь мортыдлөн сідз на быдторйыс овлө. Пө-
жар вөчасны да асьныс сэні сотчөны и. А ме өд мый нин
сэсса, мөдар югыдас ковмас каллянсө босьтны. Но курит-
чынысө ме сөрөн нин заводитлі, комын өкмыса вөлі. И то
на век батысь гусьөн, гортын эг лысьт шпуткыны.

Петыр дедлөн кок улас поткөдлөм сартас, өні пестер
панас. Видзөдөй, шуө, кыдзи паннысө колө, кузь олөмас
коркө вермас и ковмыны.

Петыр дед пыж дорас петөма нин, колө, сідзкө, чеччы-
ны. Со дзуркнитис кильчө өдзөсыс — кодкө локтө нин на

ордö. Микаль войнас узис да эз и тöдлы, мый бабыс да Таттян тьöt ботайтчыны ветлöмны. Локтысьыс öнi Таттяныс и эм — черисö юкны пондасны. Микаль лэччис сарайысь.

— Чеччин, пиук? — юалö бабыс.

— А садми тай. Вонйыс розяссöма, да номйыс менö войбыд курччалöма.

— Коньөрöй. А ми со Таттян тьöтыдкöд чери дорö лэччылiм. Тэ, көнкö, эн и кывлы, узин.

Пестерысь кузь пу ворйö бужгöдисны кыйдöссö. Быд-сяма чери шедöма: и эзысь сьöма гöрд бордъяса сынъяс, сой кызта нель сир, пуклöс кодь ёкышъяс. Кытыськö весиг öти пöвган вöтлöмны боталöас.

— А кызди тi сийöс юкны понданныд, пöвгансö?

— Ме сыысь черинянь пöжала, да öтлаын сэсся и чöсмасям, — шуö Елисава баб.

Пачыс ваймöма нин. Регыд öгырсö позьö и кыскавны нин пач вомланьыс кузь нуд йылö кöрталöм пожöм лапъясөн да сэсся и пöжав, мый тэныд колö.

— Сюруктö мун лэдз карта вывсьыс да колльöд луд вылөдзыс. Талун водзджык и лысьтi, мися видз вылө мөдтöдз мед вевъяла черисö бытшкыны да солыштны.

Микаль лэччис кильчö вылысь лысваөн кöтасьыштöм му вылас. Кöмтöм кокыс казялис: войыс вөлöма ыркыд. Бала вылын сырчик пукалö, бöжнас лайкөдö. Төдса сырчыкыс — гожöмбыд танi олö, а позйыс вöли сарай öккупень улын. Пияныс лэбалöны нин.

Ю вылыс лөнь. Ляпвом крежйысь джыджъяс петöмаось, кось весьтас гöгралöны, öктöны ком бобувсö. Мукодыс дзык ваөдзыс лэччыласны, горшныс косьмö да васö юöны. Нырныс сöмын тшуклас, а бордныс оз кöтасьлы.

Зонка пуксьö бала вылас, повзьöдö сэтысь сырчиксö. Оз тэрмась мөссö лэдзны, водз пö на. Ачыс эськö Ваньöс

виччысьё, кор сійё Мерисё картаысь вётлас. Дыр виччысьны эз и ков. Ваньлөн киас кузь ляпа, ноб пу, оласьё сійён, быттё сабляён. Ачыс шуалё:

— Ме тэныд петкөдла люкасьём, сюртём скөтина.

— Мый нё сэтшөмторсё вөчис? — юалё Микаль.

— Мый. Карта өдзөссё восьті да бурён, мися, лок, Мери, лудё мунам. Петігмозыс и олыштис меным юрнас. Кок йывсьым пөрлі. А сюра кө вөлі?

— Сюраясуд оз люкасьны. Тэ нөрөвит, ме на лэдза Сюрүкөс.

Кык друг вөтлөны мөсьяссё ю берег пөлөныс. Налы главнөйыс лоссё вуджөдны, а сэні сэсся асьныс довгасны навөлөкөдзыс. Вань висьталё Микальлы:

— Вугыр шатиньяс вөчи, кыкөс. Аслым и тэныд. Сөмын вугырсё бабыдлысь кор, менам лишнөйыс абу. Рытнас сэсся вуграсьыштам из вьвсьяныс. Но? А өні, мөсьяссё вөтлам да, зырөдлам мырпомла. Висьталөны, кисьмөма нин. Талун эз ыстыны видз вылө — туруныс абу на косьмөма, куртнысё нинөм.

Ачыс лоскыс абу эськө йир, но пыдөсас зэв нин кыза нюйтсё вольсьыштөма, вөян кокнад бура пыдөдз. Та вөсна зоньяс шыбитисны гачьяссё, павкнитисны лосдор эжөр вылас. Мөсьяс оз көсйыны вуджны, бергөдчылөны зоньяс вылө сувтлөмөн. Вань сэки кузь ляпанас валаныс швачнитлас, «ме тіян» горөдлө. Мөсьяс полөны ляпасыс.

Вуджисны, катөдісны скөтсё кос вылөдзыс да лөсьөдчисны бөр кевны. Видзөдөны: Маша мөссё жө вөтлө, кевны жө думныс, а зоньяс гачтөмөсь.

— Мунам өдйөджык йиринас, — Вань шуө.

Келісны йиринас. Ваньлы гөгйөдзыс ваыс, Микальлы морөс горулөдзыс. Сулалөны, виччысьөны, кор Маша прөйдитас. Найө тшөтшьяёсь, кыкнанныс таво сизим класс помалісны.

— Мый нө мөс вылас эн кавшась, платтьотө кӱтӱдӱн?
— Седлӱсӱ вунӱдӱ пуктыны.
— Мӱскыд тай укшаль, лӱка йирсӱӱдан. Лыясыс ре-
гыд нин кусӱ писькӱдасны.

— Ачыд тӱ укшаль. Кос кокъястӱ тай гудыр ваас
дзедӱмьд.

— А,— ӱлыштӱ Вань кинас.— Мунам, Микаль, такӱд
пом ни дор он аддзы.

Вань радейтӱ Машаӱс, но та йылысь некодӱ оз тӱд.
Сӱмын, гашкӱ, горт дорӱсас ыджыд изйыс.

Тайӱ асъя здукас изъя дорӱсыс медся уна йӱза. Видз
вылӱ мунысьясӱс колльӱдӱны, тшӱтш лӱчӱдӱны пыжӱ
пажын мешӱк ли, куран ли, литовка ли. Микаль тожӱ
лӱчӱдӱс бабыслысь пажынсӱ да шомйӱв тыра дзоля туис.
Мешӱк дӱра пырыс кыис сылӱн кылӱ пачысь неважӱн на
петӱм няньлысь шоньдсӱ. Бабыс висьталӱ Микальлы,
кытчӱ-мый сӱйнысӱ кольӱма да Сюруксӱ мед дыр оз сулӱд
карта ӱдзӱс дорас, кор лудсьыс воас, регыдджык мед
йӱртӱс.

— Талун мырпомла мунӱны. Гашкӱ, ветла?

— Ветлан кӱ и зӱв бур, йӱлӱн сӱйыштны кӱ ваян и.
Да кынсӱ эн ӱкты. Коркӱ зӱра луӱн колӱ жӱ ветлыны, ӱнӱ
кисьмыны пондас.

3. МЫРПОМЛА

Нюрӱ мӱдӱдчисны нельӱн. Маша на тшӱтш вӱзйысис
да Як Лӱньӱс мамыс мырдӱн тшӱктӱс нуӱдлыны. Арлыд-
нас Лӱняыс Ваньысь ыджыдджык нин вӱлӱ, но дыш вӱс-
наыс вӱр-васьыс нинӱм на эз тӱд да-й новлӱдлынысӱ сӱйӱс
вӱлӱ некодлы.

— Босьтлы, Ваньӱ, менсьым ӱслӱпансӱ, оз-ӱ мырпом

тусь вай,— корö мамыс.— Гортын сідзжö нинöм оз вöч-а. Оз вугрась ни, видз вылö мекöд оз кöсйы ни. Кытчö и пет-лöма татшöм дыш мортыс?

Туйыс первой сэтi жö мöдлас, кытi зонъяс мöсъяссö асывнас вöтлісны, а сэсся вывлань кежас, понöль сора пожöма яг вылö. Туйыс татi паськыд на, вöла туй. Тöвнас пес кыскалöны матигöгөр вөръяссыс. Та вöсна абу и бон-зöдöма туйсö еджыд лыаöдзис, да лöсьыд восьлавны эжа вывтис. Быдöнлөн киас туис. Кодлөн ыджыдджык, кодлөн ичөтджык, а Лёнялөн сэтшöм дзоля, мый бур мортлөн кулакис оз төр. Вань сералö, миян пö межным-лөн килаис таысь ыджыдджык.

— Мый сералан,— шуö Маша.— Гашкö, и сы мында-ыс оз сюр.

— Вайö видзöдламöй, кодлөн тырас дозйис, кодлөн оз.

Вань сувтис мышнас сэтчань, кытчань мунöны, шы-битис юр вывтис лемень тасьтисö, горöдигмоз: «Тыр да-й, сод да-й, кольышт на!» Тасьтис лэбзис кытчöкö, оз ты-дав турун пиас.

— Видзöдлам, пукса али кымса сійö.

Аддзисны — пукса лöма. Сідзкö, Ваньлөн туисыс тырас. Микальлөн да Машалөн тасьтисныс тырны жö вись-таліс.

— Лёнью, ноко тэ шыбит.

Тасьтис сылөн зэв вылö качавліс, аддзылісны, кыдзи югнитліс шондi водзас сылөн лемень пыдöсыс да-й вошис кытчöкö. Воліс ли эз муöдзис, некодi эз аддзив. Корсис-ны-корсисны — некөн абу. Став турунсö матигöгöрсыйс юклалöмөн шобисны. Лёнялөн синваис доршасью. Вошас кö, шуö, мамö куöс поткöдлас. Микаль мыйлакö вывлань видзöдліс да аддзис тасьтисö — пожöм туганö öшйöма, кык чаль костö. Кужöма тай сибдыны.

— Эн бөрд, Лёня, ме аддзи тасьтитө. Видзөд, кытчө өшйөма, өни колө уськөдны сийөс.

Вань аддзис кос чаль да шыбитис тасьтиас. Сийө усис да лоис кымса. Лёня көсийис нин бөрө косны, да ышөдісны бөр кольччыны:

— Лок, лок, артельөн кызкө тыртам туистө. Тайө өд ми ворсыштим сөмын, нинөм сийө оз висьтав.

Нюръясыс тані, Лосдин гөгөрын, помтөм-дортөмөсь. Помасьлытөг-орлытөг өти нюр вуджө мөд нюрө. Нюр шөрас — пьдөстөм вадъяс. На дорө матө он сибав. Көнкө ылын на ачыс вадйис, а кок улад сэтшөма нин лайкъялө, быттьө катлөс пыжын сулалан. Он, он лысьт водзө воськовтны. Вотчысьяс нюр доръястысджык ветлөдчөны. Да-й шөрланьыс вотөсыс оз ёна и овлы, мырпом көть турипув.

Мырпом, сийө сэки чөскыд сөйнысө, кор сөмын на небзыны заводитас. Пуктан вомад, да пинь улад мед крутшнитлас жө. Татшөм мырпомсө и аддзисны челядь өти ді вылысь. Вижа-гөрда тусьясыс гырысьөсь, сідз и вөйысьөны вомад, но медводз колө туисъяс тыртны. Лёня джынсө мында өктыліс туисас, но пуксис шойччыны да пукалігмозыс ставсө сөйис, мый өктыліс. Сэссия эськө и бара заводитліс вотчыны, но өтиөс туисас, кыкөс вомас пуктас. Мукөдыслөн тырисны нин дозьясыс, да өни воманыс жө өктөны.

— Уна эн сөйө, висьманныд, — шуө Вань.

— Лэччамөй сэссия!

Ставөн өтлаө чукөртчисны. Туисъяс сьөкыдөсь — кисьмөм мырпомыд уна төрө. Вань кыпөдліс Лёнялысь туиссө:

— Но? Тані тай тэнад нинөмыс абу.

— Абу. Эг вевъяв.

Артельөн Лёнялөн дозйис тырис зэв регыдөн, да пе-

тисны нюрсыс. Гортлань век гажаа восьлавсьö, кор дозья тырöмаось. Лёня бөрöджык кольччис. Он öд вермы öдйö мунны туиссьыд вотöстö сёйигтыр. Сиктö вотöдз сылөн туисыс вöлис нин тыртöм.

4. ГОЖÖМЫС ВЕШЙИС АРЛАНЬ

Бур гожöмыс арлань вешйис. А дерт, Илля лун бөрнин сэссия. Войяс пемдисны, лоисны ыркыдось. Челядьöс оз нин сэтшöма кыскы купайтчыны, көть эськö дорöссö оз на вунöдлыны. Унджыксö Петыр дед дорынось. Сийö велöдö зонпоснисö пестер да туис вöчны. Первой петкöдлас, кызди колö, да сетас кодлыкö, водзö, шуас, нуöd.

Микаль олöмын тайö лунъясö тожö мыйсюрö лоис. Мамыслөн карысь воис пöсылка. Баба-пия аддзисны сэтысь куим гöгрöс куд. «Леденцы» — лыддьö öти куд вылысь Микаль. — Вугыр заводьяс эмось жö. Ваньлы öтисö сета. Дөрöм-гач ыстöма Микальлы. Письмöас гижöма: «Тайöс сöмын школаад пасьтавлы. Гортад воан да пöрччы».

— Правильнö гижöма, — шуö бабыс.

Дөрöм пыткас бура тубыртöмөн пунктöма гöрд шöвк галстук, «О-о! Шöвк и быдөн», — шуö Микаль, а бабыс содтö:

— Ме чайта, татшöм галстукөн он лысьт лёка велöдчыны. Яндзим лоас.

Елисав баблы тожö вөлöма гöснича — кузь ризья шöвк шаль. «Но, — шуö, — мыйкö на и ме пондась мөдöдчö». Аслас эськö любöысла горшас гöрддзассис, синваыс чепöсйис.

— Татшöм шальыс эз на волы юрам. Абу югыд нин пöрысь мортлы. Кужöма тай бөрйынысö.

Сэсса и Сахалинысь письмё воис Сандыр дядьыслөн. Микальлы сетіс почтальоныс, аддзис ывла вылысь да:
— Эн восьт бабыдтөг, виччысь рытөдзис.

А Микальлы сэтшөм окота лыддыны письмөсө, төдмавны, кор воас Сандыр дядьыс. Но рытөдзис сэтшөм на ылын. Позьё вөлі Вань дорө котөртлыны, но сійө видз вылын. Видзөдліс өшиньё: Як Лёнъ кытчөкө муно, пельпом вылас зор нуө.

— Кытчө муна, Лёнъ?

— Ачым төда. Тэ мун лэччы да вугрась, а меным чериыс унджык шедас.

Микаль думө усис: «Зорйөн чери кыйны муно. Кыйөдны колө».

Лёня вуджис картофель муяс вывті да вошис гумляяс сайө. Сэсса лөз дөрөмыс тыдовтчыліс Кырыив сөн дорын. Сөнсө вуджис. «А-а,— кватитчө Микаль.— Гуран гөпъясас муно сирпиянсө нөшавны.» Тулыснас тайө местаяссө ставнас ойдлө. Кор ваыс ямас, гуранъясас кольө гөпъясөн-гөпъясөн. Йөй сирпияныслөн, весь кузя на абуось, сямныс, буракө, оз тырмы ваыскөд тшөтш петны да сідз и кольөны татчө гожйыны, а бөрнас пөдөны.

Микаль сувтіс бадь сайө, видзөдлө Лёня бөрся. Сійө төдө нин, мый кутас вөчны мөдыс. Келас гөп шөрас, гудыртас васө ас гөгөрсьыс да пондас видзөдны, кор сирпияныс нырнысө мыччасны ва веркөс вылас. Гудыр ваыс налы абу любө, шаглеманыс няйтыс пырас да. Сэки и пондас Лёня крапайтны найөс. Кодлы веськалас, пыр жө бовгысяс вылө рушкуөн. Вань коркө эськө висьтавліс да, мый сирпиянсө татысь кыйны колө посни синма тывйөн да юас лэдзны, но делөөдзис эз воы. Асланыс тывйыс абу, а кодлыськө корлөма, да абу сетөмны. Косявланныд пө. «Азым синмыс, өні ставсө начкас,— думайтө Микаль.— Асьныс өд өти жө оз сөйны, понныслы вердас-

ны». Гожомбыднас сирпияныс сэтшөма дуксясны, мый морт сёйны он вермы.

Лёня пуджис гач кокъяссө да келіс.

— А ме тэнө кыйөді, а ме тэнө кыйөді,— сьылігтыр петө бадь сайысь Микаль.

Лёнялөн нем виччысьтөмысла кисьыс зорйыс усис.

— Мый тэныд колө? Гашкө, кык син костыд луддзис?

— Ме төда, мый көсьян вөчны. Тайө тшаква, мый көсьян вөчны. Ставсө сідз и тадз нөшавны он вермы. Ме төда эськө да, кызди бурджык.

— Кыдзи?

— Тіян тай ёс тыв эм, сарай боканыд өшалө.

— Эм.

— Тэ ветлы сыла, а ме ведраясла зырөдла. Ставсө гу-быртам, ни өти жунь оз коль төв кежлас пөдны.

Микаль куим ведра вайис, а недыр мысти и Лёня воис ёс тывнас.

— Фу, өдва кыски. Сьөкыд тай вөлөма.

— Но бур, вай чөвтам.

Микаль босьтіс отар помсьыс сюрөсьяссө да ваас келіс, а Лёня мөдар помнас кос вылө кольччис.

— Тэ сәні и сулав, а ме, часлы, гөгорта.

Микаль кытшовтіс, да пондісны кыскыны тывсө.

— Улыс сюрөссө эн коль, кыкнансө тшөтш кыскы! — горзө Микаль.— Эн тылавлы али мый некор?

Кор тыв гыдйыс поньдаммис, сирпияныс вөрны пондісны, зонъяслы кокъясас кутісны зургыны. Збойджыкыс вылыс сюрөс вывтйыс чеччышталөны. Кыскисны турунас.

— О-хо, уна тай шедөма,— шензьө Лёня, а Микаль курыштө ведраө ва, да кыкөн путкыльтөны тыв гыдъяс пессьысь сирпиянсө сэтчө. Тадзи нельысь-ө-витысь чөвтлісны, куимнан гөпсө тывъялісны. Ваыскөд сорөн куим ведра и лоис.

— Сё али мый? — юалё Лёня. — Сідзкё, өти ведрасё тэныд, кыксё меным. Ачыд төдан — ёс тывйыс менам.

— Сійөтө сідз, да черисё мысыкыны колё. Ставнас дуксьёма нин гөптас. А нуйтыс вылысаныс! Тэ вай паськөдлы тывсё турун вылас, мед косьмыштас. Бөрыннас кокниджык лоас нуны, а ме черисё ю дорас лэччөда, мыська.

Микаль тэрмасис, мед ведраясас сирпияныс дзикөдз эз кольмыны. Первой кык ведрасё нуис да кисьтис сөстөм ваас, котөрөн кайліс коймөдысла. Жуньясыс надзөник варовмыны пондісны сөдз ваас. Бөръя кыйөмаясыс йиринас нин мунісны, воддзаясыс сөмын на палявсьөны. Микаль неуна видзөдыштис на бөрся да кайис Лёня дорө.

— Мыськин?

— А ваас на коли, мед бурджыка көтасяс, дуксё нуас.

— Кылөдас кө?

— Оз, сәті лөнь, — шуө Микаль да тшөтш кутчысьө тывсё паськөдлыны.

5. «ПЫЖ КЫЛАЛӨ!»

Микаль пукалө аслас бала вылын да виччысьө, кор мөдлапөвса нөрыс сайысь петкөдчасны сьөрсьөн-бөрсьөн кывтысь пыжаяс. Бабсө виччысьө. Кад жө нин сәсся лыддыны Сандыр дядьыслысь письмөсө, коді век на конверт пытшкас. Бөр адресас сөмын өти кыв и гижөма «Сахалин» да Сандырлөн кырымпасыс. Коркө өтчыд Микаль петкөдліс бабыслы Сахалинсө карта вылысь.

— О-о, — шуө, — дзик нин му помас да. А ми нө көні?

— Со ми көнөсь, — петкөдлө Микаль.

— Тайө нө подөн кө, дыр-ө ковмас осьлавны?

— Сәтчө, бабө, поездөн мунөны.

— Сэтчө пö мунöны. Меным татчань колö. Сандырыс, мися, кыдзи кутас локны?

— Поездөн жö, кыдзи. Княжпогостöдз.

— Но сэтчöдз кö воас, лыдды, гортын нин.

Микаль нюмъялö ас кежсьыс та йылысь казътылігөн. Но со и тшукис бабыслөн да Таттян тьöтлөн пыжныс. Зонка котöртö чой улö, öлалö письмöсö юр весътас:

— Бабö, йöкты! Сандыр дядьлөн письмö воис.

— Пыжас али мый кута чеччавны?

Баба-пия кайöны гортаныс.

— Но öдйö лыдды. А, энлы либö, нөрöвитлы. Паськөмös вежа, мича сарапан пасьтала, юрсийос сынышта. Абу öмöй праздник?

— А лёк кö письмöыс?

— Абу лёк. Оз вермы öнi лёк письмö некодлы воны. Войнаыс помасис. Сидз нин пель йылöдз тырим шог юөръяснас

Микаль заводитö лыддыны. Ньöжйö лыддьö, а бабыс сöмын «да-да» шуалö, «но-но» лэдзöдлас. Детинка оз бура гөгөрво дядьыслысь чукуль-мукульяссö, да сы вöсна нöшта на ньöжйö лоö лыддьöмыс. Помас нин гижöма: «Медглавнöйсö öнi висьтала: лэдзасны регыд. Мед виччысьтöг эз ло менам воöмыс, сы вöсна и гижа.» Елисава баб бөрддзö:

— Но-о, Сандыр пиö тай воас. Көть öтиос аддзыла жö ловъя син-пельөн.

Уна на быдтор бөрдöдiс-лыддьöдлiс да нюмъевтiс жö:

— Быдмигас öд баламут кодъ вöлi, син лапнитiгкостi надур вöчас. Батъыс, покойник, чуньнас эз вошйив. Ме жö мыйкö воюйтлi-а... Со тай туйöма на бур войтырлы, мый дыра служитiс, войнаöдзыс на мунлiс гортысь.

Виччысян лунъясыд, найö кузьöсь. Да-й письмöас бара жö нинöм абу гижöма, кор виччысьнысö. Туруна

уджъяс помасисны нин, да бабаяс вундыны лосьдчоны. А быдмөма няныс таво зэв жеб. Татшөм лёк урожайис, висьталоны, важөн нин абу вөлөма. Челядьос, гырысьос и посниос, картофель босьтны йитисны. Сійө көть таво лоөма дзыкөдз тшыгъялөмысь. Та вөсна и водз заводитисны босьтнысө, мед көть, думайтөны, вевъяласны чунявны ставсө. Му вылас келавны бабыс Микальлы сетис көти.

— Мед ыджыд кө,— шуө,— унджык көмавны төрас, кокыдлы шоньд. Батьыд на тайос новлис. Кристосө-Енмө, көнкө вөлөмаось ли, абу ли?

Со век тадзи. Мыйкө усяс син улас ли, ки улас сюрас ли — бара казтылантор, бара бөрдөдантор. Войдөрлун дедыслөн табак мешөкыс ки улас веськалас, бөрдөдас да бөрдөдас. Галь дед война помланьыс кувсяс. Кок йывсьыс пөрас да быттё тожө абу вөвлөма. Шпал лөсны мөдөдласны сійос набор серти. Сэтысь и вайөдасны — куш лолыс сөмын. Кык лун гортас олө да-й ловсө паньыштас. Ачыс тай висьталөма, көдзыд ва пө юөма пөсьвывьсыс да сэтысь висьмөма.

Рытладор нин. Асывсянныс ёна зэрмылис, но оз на позь шуны, мый тайө вөли арся нин, лыө и куө йиджан зэр. Шоньдөн на мыськовтис мусө. Уджавны эз пет некоди, сетис шойччыны йөзыслы. Арын нин эськө кутшөм шойччөм да... Лун шөр гөгөрас кобис, да унджыкыс вөрө зырөдисны пувла. Микаль ышнясьлис жө йөзыкөд тшөтш ветлыны, да бабыс эз лэдз, шуө:

— Чорыд бока на пувйис, абу на воөма сөк вылас. Көтасян и. Татшөм зэр бөрын вөрө көть ваө суйсьы, топ өти. Гортад пукав, а ме Таттянөс ботайтчыны нуөдла.

Нем вөчөмысь Микаль видлалө выль велөдчан книгагяссө. «Кышны колө эськө», — думыштө да петө чуланө шпалер тупльөдла. Кышис книгагяссө, да-й бара нинөм вөчны. Восьтис өшинь да кутис видзөдны ывла вылас. Зэ-

рөм бөрас сійө дзик быттьө мөд лоома. Көтасьөм изья дорөсыс югъялө шонді водзас. Изьясыс косьмөны, да весиг синмөн аддзан — рутор кайө насянь. А со кодлөнкө и пыжыс кылалө. «Бур на пыжыс, абу на ва бөр лэдзөмтор. Модаыс тай абу миян сиктса кодь-а. Кутшөмкө көлуй на пыжас эм. Бушковнас, тыдалө, кодлыськө берегсьыс өтдортис, кутны колө.»

Микаль котөртө Вань дорө, коді кильчө дорас пелыс вөчө.

— Лок өдйө пыжсө кутам.

— Кутшөм пыж?

— Со тай нө кылалө.

— А-а. Ме сэтчань эг на и бергөдчыв. Мунам.

Зонъяс петисны пыжөн, матыстчисны, а кылалыс пыжас йөз вөлөмаөсь. Пуксисны да сералөны. Военной паськөма өтиыс. Шинеля, фуражкаа. Сійө и шуө:

— Ме тай висьтавлі, кодкө быть вылө воас кылалыс пыж дорас. Тайөяс шуөны, ог пө эськө и тшуклөй, воча кө пыжөн петаласны. Мися, вөчам татшөмторсө. Водім пыж пыдөсас да-й кылалім со. Но, сідзкө, тиян дорө вуджа, зонъяс, нуөдөй горт дорөдз.

Пыжө пуксьөм бөрын воысь морт нинөм сэсся эз шулы. Пөрччис фуражкасө, шыльөдыштис ки пыдөснас еджгов юрсисө да сикт вылас видзөдө, ас чужан сикт вылас, кодөс дыр нин эз аддзыв да коді ыджда вылас нинөм абу и вежсьылөма. Виль стрөйбаяс оз тыдавы — некодлы вөлі найөс кыпөдны. Мөдарө, керкаясыс быттьө сисьмөмны көзяинъястөгьд, көнсюрө оз нин овны — брөвьяөсь өшиньясыс. Кор тшукисны берегас, военной морт шуө:

— Горт дорөдз менө вайөдөмысь мекөд ветламөй, гөсничаяс эмөсь.

Сійө пөрччө шинельсө да өшөдө шуйга сой крукас.

Мод кинас кватитö чемодансö да ыджыда воськовтö изъяс вывтӱыс. Сиктас эз кут кайны, а горт весьтöдзыс мунис дорöсöд. Сэссия ставөн кайисны.

— Гортöй тай паса вөлöма, некодi, көнкö, абу.

— Ме пасали,— шуö Микаль,— а бабö чери кыйö.

— Вот те на! Тэ — Миша?

— Миша. Сöмын ставөн Микальөн шуöны.

— Но, сiдзкö, дядьөн шуысь тэ менам, племяш. Ме тэнö та ыжданас эг чайт. А ёртыд кодлөн?

— Ме Асекрит Васьлөн,— ачыс Вань висьталiс.

— Кыкнанныд тай батытöмъяс быдманныд. А мый сэссия вöчан, сiдзи кö нин артмис. Колö кыдзкö быдмыны. Да тi нин, видзöда, асьныд мужикъяс, он нин сетчöй сьöкыдыслы. Батъясныд зэв сюсь войтыр вöлины, наö кö быттьö рöдйинныд.

Сандыр восьтö чемодансö, судзöдö сэтысь лöz мешöк да бужгöдö пызандöра вылас быдсяма юмовторсö.

— Со, чöсмасьöй. Ставыс Дальнöй Востокса. А бабыд, сiдзкö, чери кыйö? Но и бур. Сэтшöм окота ас черисö видлыны. Сэни кöть эськö мыйта колö вöли, но ставыс морскöй чери. Бөръя кык восö эг и сёйлы нин, син водзам оз ков.

— Миян öд эм, солалöма. Бабö лэчывлас, ме вуграсьла.

— А, дум вылам усис. Со тэныд вайи, быдса набор.

Сандыр судзöдö чемодан пыдöссьыс картон куд, восьтö сiйöс. А сэни... Дзоля и гырысьджык кыснанъяс. Ком вылö и сир вылö. Кык кытшö сөн гартöма. Вöснийыс вугыр шатинö домны, мöдыс кыснанасьны.

— Тайö ыджыд сиртö оз кö кут-а?— шуö Вань.

— А тэ видлы оровтны.

Вань корсьö вöй помсö, разьö мыйтакö да öтар-мöдар киас гаровтö куимысь. Зэлöдчö.

— Оз. Гашкӧ, кепысьӧн-а, киӧс тай вундӧ.

Посни вугыръясыс тожӧ эмӧсь, мык вугыръяс — зоньяслы медся коланаыс.

— Но, Микаль, пукты самӧвартӧ. Сэссия, гашкӧ, бабыд воас.

Кык другыс ю дорас вала лӧччисны, а сӧні чери кыйсыясыс тшукӧны буретш. Сандыр аддзӧ ӧшиньӧд налысь тшукӧмсӧ, котӧртӧ воча. Кор мамыс лӧччис нин пыжсьыс, босьтӧ Елисава бабӧс моздорас да сідз и мӧдӧдчис чой паныдсӧ. Микаль отсалӧ Таттян тьӧтлы катны ва боталӧсӧ да ӧшӧдны сійӧс. Сэссия бара на лӧччылӧ пыжӧдзыс чериысла.

Со и воис дыр виччысяна пиыс Елисава баблӧн. Эз и понды синвасӧ дзезбны. Став сьӧкыд олӧм-вылӧмсӧ лыддӧдліс-бӧрдӧдіс. Кувсьӧм дедсӧ и, усьӧм пьянсӧ и, вошӧм Коля писӧ и.

— Корсям Коляӧс,— шуӧ Сандыр.— Абу ем, туялам кытыськӧ.

6. ШКОЛАЫН АБУ Жӧ ГАЖТӧМ

Кӧнкӧ лунвылынджык кӧ, сентябрь заводитчигӧн кутшӧм на эськӧ ар, а мян войвылад ставыс нин арыны лӧсьӧдчӧма. Мича на поводдяыс, нинӧм шуны. Шондіа, кос. Му вылын нокиян поводдя и эм. Но водз асывьясӧ петан ывлаӧ да, бура нин пужъялӧма-едждӧма гӧгӧр. Арся шуштӧм зӧрыс коркӧ сӧрӧнджык пондас пызйыны.

Микальӧс велӧдчыны «домалисны», а Сандыр дядьсӧ бӧрйисны колхоз предӧн. Сиктсаяс шуисны ӧтсӧгласӧн, мый запасса старшӧй лейтенантлы медся на кивыв овмӧссӧ кыпӧдны. Да-й Людьяс, шуӧны, мудзис жӧ предавнысӧ. Важӧн нин корӧ вӧлі вежны. Шулывліс: «Кыззи ті, фронтовикъяс, менсьым командуйтӧмсӧ видзӧдны верман-

ныд?» Но и вежисны сэсса, лук да капуста вөдитны индисны.

Микальлысь Вань другсö да Як Лёньюс мөдөдисны велөдчыны ФЗУ-ө. Мунигас Вань шуис Микальлы:

— Ветла инö, зэв корöны да, видзөдла, мый артмас. А тэ бура велөдчы. Таво тiян выль класрук лоас. Аддзыли ме, щөгöль ныв, вöсни гырка.

Микальлы веськодьюсь на вöсни гыркаясид, но Нина Васильевнаыс томиник на и вөлöма. Ачыс на гырысь классын велөдчысь ныв кодь. Кор төдмасис классыскөд, юалис:

— Тi менсым понданныд-ö кывзысьны?

Ставөн чөв олöны, öта-мөд вылас видзөдöны.

— Он кө пондöй, меным тiкөд лоас сьöкыд. Ме сэки быд рыт öтнам кута бөрдны. Тi көсьянный, мед ме бөрдi?

Микаль первойсö думыштiс, видзөд пö кутшөм лябөс ми дорö сетöмаөсь — быд рыт дiвзыны лөсьөдчöма. Абу öд мам дорад. Бөрнасджык аддзисны: Нина Васильевна абу слаб сьөлöма морт, быд нинөм абусьыс оз на ырзы. Небыд кывъя. Коми кыв велөдö, да кыз заводитас эжватас ногөн висьтавны уроксö, челядь пась вомөн кывзöны.

Коркө öтчид Нина Васильевна классö пырис эз öт-нас, а Миша Петыр дядькөд. Шуö:

— Нывъяс вермасны ворсыштны чой дорас, а зонъяс талун пондам шырсьыны.

— Наголо али мый? — юалöны.

— Да, тадзи тай шуисны. Асьныд гөгөрвоанныд, мыйла колö тадзисö.

Петыр дядь судзөдö зепсьыс трофейной машинкасö, да первойөн пуксьö Мить Алик, кодлы сьылi гөгöрыс гаровтöны еджыд дөра.

— Сьылitö мыйла некор он мыськыв? — юалö Петыр

дядьыс,— кӧтӱ чӧр кодь нин лоӧма. Шыра, да лӧччыв
коськас, мыськы.

Кор ӧчередьыс воис Микальӧдз, сийӧ гусьӧник шуӧ:

— Петыр дядь, менсьым эн ставнас шыр, колышт.

— Ладнӧ, тӧнсьыд ог ставнас и шыр.

Сӧссия кымӧс вывсьяныс босьтӱс юр пыдӧсӧдзыс да
тшӧктӱс сувтны Микальы:

— Но вот, кьдзи и тшӧктылӱн. Мун ворсышт нывъ-
яскӧд.

Ставӧн серӧктӱсны, а Микаль гӧрдӧдис.

— Мый нин сӧссия ӧнӱ? Ставнас шыр. А трофейнӧй
машинкаыд тай нетшкӧ жӧ?

— Ог тӧд, ог тӧд. Генералгьясӧс шырлывлӱ, да нинӧм
ӧз шулыны. Бӧрынджык колӧкӧ висьтала, кьдзи тайӧ
машинкаыс меным веськалӱс.

— Кывзам, кывзам,— шуӧ Нина Васильевна.

Кор ставӧн чукӧртчисны, Петыр дядь заводитӧ:

— Но вот, ӧнӱ пӧрадок. Аслад гигиена бӧрся век колӧ
видзӧдны. Фронт вылын тай кӧть кутшӧм сьӧкыд мед ӧз
вӧвлы, век аддзылӱм кад бритчыны и мысьыны. Шырсьы-
ны и. Миян командирным ачыс вӧлӱ ӧкуратнӧй морт, быр-
зыкьяссӧ ӧз и радейт. Но ме тай кӧсйи висьталыштны,
кытысь тайӧ машинкаыс. Финскӧй войнаас и, ӧнӱяас и,
век вӧлӱ разведчикӧн. Карельскӧй фронт вылын и тыш-
каси первой. Чукӧртчисны ӧтчыд разведчикьясӧс, шуӧны,
немечьяс пӧ кутшӧмкӧ пакӧсть думыштӧмны вӧчны, а
кутшӧмӧс, оз тӧдны. Асьным жӧ ми, разведчикьяс, вись-
тавлӱм, мый фронтбердса туйястӱ уна транспорт кутӱс
ветлӧдлыны. Дерт, кутшӧмкӧ операция дасьтӧны. Колӧ,
шуисны, пленӧ босьтны немецкӧй офицерӧс. Кыкысь ву-
джалӱм фронтсӧ, но миян нинӧм ӧз артмы. Коймӧдысь
мунӱм. Ковмис пыдӧджык нин пырны немечьяслы тылас.
Паськыд туй дорӧ дзевсим валуньяс пӧвстӧ. Машинаыс

уна ветлө-мунө, но быдлаын салдатъяс. И со легкөвöй локтö. Ме налысь маркаяссö ог тöд, гашкö, «Виллис». Видзöдам бинокльöн: шоперыскöд орччöн некодi эз вöв, а бöрас тöдчö морт вуджөр. Старшина шуö, босьтны пö кутам. Первой кöлесаяссö лыйлим, а сэсся шоперыс тiм-быльтчис рульланьыс. Пассажирыс лыйсыны заводит-лис, а сэсся восьтiс мöдар öдзөссö да кöсйис пышйыны. Ылö-ö мянысь пышъян, кор дзевсыны некытчö, абу вöрын. «Стой, руки вверх» горöдiм да-й «хенде хох» на шулим, мед нин, шуам, гөгөрвоас. Ена и чуймим, мый тайö абу офицер вөлöма, а салдат. Машинасыс босьтiм сьöрсьыным чемодан кодъ жö куд, сöмын ляпкыдджык. Бокö вешйим туй дорсыс да видзöдлим, мый сэнi. Бритчан-шырсян завод вөлöма. Парикмахерöс босьтöмным. Шогö усим. Шуам, татшöм «языкнад» мянöс вердтөг-юктавтөг бөрö ыстасны. Воим, командирным стрöга шуис: «Ми тiянлысь генералöс виччысям, а тi кутшöмкö, тьфу, цирюльникöс вайöдiнныд.» Бöрсö мянöс эз мөдöдны. Асывнас кывлим, мый парикмахерыс уна быдтор тöдöма да висьталöма. А мый нö эз, абу öд пельтöм. Кывзiс шыригмозыс, мый офицеръясыс сёрнитöны. Кудсö командирыс меным сетiс. Тырмас, шуö, менсым разведчикъяс-сö баляяс моз ножичöн шырны. Со тайö машинкаыс сэтись, кудсыс. Бура уна балябöж адзылис, салдатлысь и генераллысь...

Микальöс таво Юлякöд пуксьöдiсны öти парта сайö. Сиктас сiдзсö кык Юля — кывтыд Юля да катыд Юля. Тайö кывтыдсаыс. Гажа нывка, быд нинöм абу вылас кöть мыйта оз ков сералас. Чуньтö кö петкöдлан, сьөлöмыс чорзьытöдз гизяс. Сы водзвылö Нина Васильевна пуксьöдлiс Мить Аликöс да вежнысö ковмис. Делöыс сыын, мый Аликыс кужö пельяснас ворсны, öтинас и мöднас торйöн, и кыкнаннас öттшöттш. Воас да пуксяс Юля водз-

вылө. Юрыс, шырсьома да, еджыд, капуста мач кодь, а сьылыс вöсни, оз мыськав да руд, пельясыс торвидзöны. Алик оз на весиг и вөрзьöдлы пельяссö, а Юля серамсö нин кутö, вомсö ки пыдöснас тупкöма да. А кызд вөрзьöдас, дзыкöдз пöгибö воас нывкаыс, семдывлö быдөн. Вежис Аликöс Нина Васильевна, медся бөрö пуксьöдис.

7. ПОХОД — СІЙÖ ДА

Коркö урокъяс бöрын, субöта вöлі, Нина Васильевна шуö:

— Аски шойччан лун. Ог-ö ветлöй кытчöкö походөн? Ме тiянлысь местаястö ог на тöд, асьныд нуöдöй, кытчö кöсьянный. Ачым öд ме сиктын жö быдми да ёна радейта вöрас ветлыны. Колö эськö сэтшöм места бөрйыны, мед нывъяс вермисны вотчыны, а зонъяс вуграсьны. Пув öни воис, и чöдсö на, гашкö, пужйыс ёна эз тшыкöд.

— Ме тöда татшöм местасö,— сувтö Микаль,— нуöдны кужа. Важ мельнича дорö кайлам. Сійö, дерт, ылын, но позьö и водзджык петны, сизим час гөгөр.

— Но вай висьталышт, сідзкö, важ мельнича йывсьыс. Кöни сійö, кодi стрöитлöма?

— Миян сиктсянь катыдынджык вöрса ю усьö, Ляп ю. А сэтчö Сьöd ёль петö. Ельöн тай шуöны-а, ютор жö дзoляник. Сэни и мельничаыс. Сьöd вөр шöрын. Висьталöны, колхоз дырйи нин стрöитлöмаось. Коркö öти тулысö, войнаöдзыс на, ваыс вывтi ыджыд вөлöма да жуглöма плöтинасö. Война дырйи некодлы вöлі дзоньтавнысö, а öни быттö оз и ков нин сійö — пызьсö баржаөн вайöны. Плöтина дорас вомлөг эм, йир гу. Комыс сэни олö. Вöрас вотöсыс эм жö, чöд и пув. Гашкö, некодi на эз и кайлы сэтчöясö.

— Но мый, челядь, ветламой важ мельнича дорас?

— Ветламой,— шуоны.

— Аски татчо и локтой. Нянь-сов да картофель босьтой, а вотоссыс варенносю пуны сакарсю ме босьта. Кодкю мед порт босьтас, зонгяс, гашкю, юква выло чери вуграласны.

Поход йывссыс рытнас Микаль висьталис Сандыр дядьбыслы.

— Сэтшюм ыло думыштинныд? А туйсю коть тодан-о?

— Аддза. Ванькод куимысь нин сэтчо вуграсьны ветлим.

— Классаныд нывкаяс эмось. Кыдзи найю Нюрсай керюсас пондасны вуджны? Векныдик вильыд кергьясыс они нин, конкю, зыбучас бура пыдынось.

— Ми тай беддюн вуджавлим-а.

— Но вот мый. Аски ме тэно кюсий нуодлыны дедыд пас туйю чюс-лэчю сивны, керкасю видзюдлыны. Ветла иню первой отнам, а мельнича дорюдзис тшотш каям.

Микальлы кокниджык лоис сюлом вылас. Тыдалю, ас вылас надеяис абу на сэтшюм ыджыд вюлома. Вюйысьны вюйысис нуоднысю, а бюрнас аслыс жо лоис думно: аддзас-ю, кужас-ю.

Асылыс эз вюв шондия, но и эз зэр. Симыд поводдя. «Тайю весиг бурджык на,— думайто Микаль,— ком вугравны медся бур лун.» Елисав бабыс пожасюма нин. Пачысь вильюн на петюм тупюсьясыс да кык черинянь руалюны пызан выло вольсыштюм еджыд дюра вылын. Сандыр кытчоко мунюма.

— Бригадырыс дорю тай мунис,— шую бабыс.— Нювина му выло ставсю кюсий шызьюдны вундыны. Ачыс вюрю муню-а... йюзыс ню мый шуасны?

— Сийю, гашкю, ми вюсна и муню вюрас да?

— Ог тѳд. Пас туйсѳ видзѳдлыны думыс важѳн нин вѳлі.

Сизим час кежлѳ ставѳн нин чукѳртчисны. Нина Васильевна кодлысѳкѳ важиник плюш пальто пасьталѳма.

— Миянкѳд Александр Гаврилович мунас, — шуѳ Микаль.

— Да? — быттѳ чуймис Нина Васильевна. — Сідзкѳ ог ѳтнаным лоѳй.

— А сійѳ ѳд нуѳдас сѳмын, а сѳссия мунас пас туйсѳ сиавны. Миян дорті и мунамѳй, виччысьны кѳсийс.

Сандыр виччысьѳма и эм нин челядьѳс. Лазасьѳма, пельпом саяс ружье ѳшалѳ.

— Бур асыв, челядь, бур асыв, Нина Васильевна! Он-ѳ босьтлѳй менѳ асланыд походѳ?

— Босьтлам, босьтлам, — шуѳны.

Мѳдѳдчисны. Водзын Туган котѳртѳ, Ваньлѳн понйыс. Кѳзяиныс абу, да ѳні Микальѳс вѳдитѳ. Медся бѳрын, весиг кольччыштѳмаѳсь на, гырысьясыс муноны, сѳрниѳ воѳмны.

— Ме кывлі, квайт во пѳ абу вѳлѳмныд гортаныд, а коми кывсѳ, тыдалѳ, абу и вунѳдлѳмныд?

— Бать эз тшѳкты. Шуис мѳдѳдчигѳн, ассьыд кывтѳ кѳ вунѳдан, и чужанінтѳ вунѳдан. Ыджада вылас сѳки ме тайѳс юрам эг босьтлы. Но йѳзладорас олѳмыс менам нюжаліс. Комиѳн кыв чѳвтны некодкѳд. Думайтa, тадзи ѳд менам и вошас чужан кывйыс. Сѳссия муна вѳлі кыт-чѳкѳ да ѳтнам ас кежысь кута сѳрнитны. Медсясѳ радейтлі мореланыс ветлыны. Пукся из вылѳ, кок улам лун и вой ызгысь море-океаныс.

— А кутшѳмджык сійѳ сѳні, море-океаныс?

— Быдсяма овлѳ, но гыѳмсьыс зѳв гежѳда дугѳдчылас. Век шторм и шторм. Суднояс маті оз ветлѳдлыны — полѳны, мед кѳть оз ну тѳвнас вагорувса изъяс вылас.

Из берегыс дзик веськыда лэччө мореланьыс. Вывсянь полан и видзөдлыны — сэтшөм джуджыд. Тöлыс вöтлө океансяньыс гöра кодь гыяс. Из стенланьыс öтияс жугалöны-пасьмунöны, локтöны мөдъяс, коймөдъяс. И тадзи помтөг. Коркө тай сэсся лөньюдчылас жö. Ызгөм шыыс дугдылас, да сэки быттö мыйкө оз тырмы.

Недыр чöv муныштісны, да Сандыр водзö висьталö:

— Нöшта на бать шуліс меным, роч гөтыр пö эн вайөд. Найö öд, шуö, дука чери оз сөйны, мыйөн пондам вердны.

— Тешкодь дед вөлöма,— шуö Нина Васильевна.— Сідзкө, кывзөмныд батьтö?

— Олөмыс öд öні, гашкө, бурлань сетчас, дука чери-яйысь кындзи, лоас на мыйкө и мөдтор,— мынтөдчө юалөмсъыс Сандыр.

— А мый, дыр колö мунны мельничаөдзсыс?

— Зыбуч нюр колö вуджны керъяс вывтi.

— Огö повзöй. Ме öд вöрас ветлывлі жö, вотчыны өна радейта. Сэтшөм лөсьыд öні вöрас. Абу номйөсь, оз зэр.

— Сідзкө, локтан вöскресенньöас ме тiянöс Микалькөд чөс туй кыйны нуөдла.

— Збыльысь али мый? Но сэтчөдз сэтшөм на ылын, быдса вежон.

Челядь зэв нин ылö водзö мунөмаөсь, а öні пуксьөмны нюр дорас, гырысьясөс виччысьöны. Дзоляник черөн Микаль понөльяс сөталö да увйö, быдөнлы бедь вөчö.

Водзö лэдзисны Микальöс, Сандыр да Нина Васильевна бöрынөсь. Поскыс — кык кер орччөн, но корскюрö öтка волас. Керъясыс вильыдөсь, сідз и видзөдöны уйкнитны кок увсьыд. Бедьсьыс эськө ыджыд пөльзаыс абу, но эм кө ки пöлад, кызкө быттö онджык и пов. Юлялөн бедьыс кыкнан киас. Кор кытчөкө лөкджыка тувччас,

чирөстылө. Но мунө, оз кольччы мукөдсыс. Век жө сылы көтөдчыштны ковмис. Вильдiс кок пөвнас да пуксис вожала пос вылас, көтиас ва куртiс. Яг вылас воисны да пөрччылис көтiсө, нямөдөсө пьдзыртiс.

— Татi, — шуө, — позьө на ветлыны. Дерт, велавтөгьд.

— Но, шойччөй, — шуө Сандыр, — мельничаыс абу нин ылын. Аддзанныд, туйыс увлань мөдас? Ляпланьыс сэсся кутам лэччыны, но кежам водзджык, Сьөд ёляс лэччам.

Воисны. Ставөн шыбитiсны нопьяссө нитш вылас, асьныс шыбитчисны жө, мудзөмаөсь. Көнкө улын кылө ёльыс, кьдзьяс пыр тыдалө мельничаыс. Челядь кокалөны пужйөн вөрзьөдлөм чөд тусьяссө.

— Чөдсө, ог төд, понданныд-ө өктыны, — шуө Сандыр, — а пувйысла колө вывланьджык кайны ёль кузяыс. Сөмын ёна бокө эн вешйө, ёльсө мед век кылинныд.

Сэсся ставөн лэччылисны мельнича дорас, кайлисны вылө, изанiнас. Керьясыс дзик на выльөсь, быттё неважөн стрөйтлөмны. Көть и важөн нин оз изны, стеньясас и, джоджас и — быдлаын на пукалө пызь бусыс.

— Ме ичөт на вөли, — висьталө Сандыр, — батькөд татчө изны воывлiм. Тулыснас пыжнад дзик мельнича дорөдзис воан. Бура помнита, мельникнас сэки вөли Стапей дед. Ус-тошкыс, синкымьясыс век вөли куржөмны пызь буссыс. Шмонитысь дед вөли. Ми воам, да век вөли менсым юалө, эг-ө нин гөтрась. Мукөддырйиыс пызьныс вөли гырыся петө, да шулывлiсны сылы та йылысь. Таысь, шуө, эн шогсьөй. Изки пыр кө петөма, сэсся быдлатi петас. Но тi вайө кольччөй, а меным зэв на ыли колө гөгөртны. Гашкө, сёрма, өтнаныд лэччөй гортлань, менө эн виччысьөй.

Көнкө увтчис Туган. Сандыр нюжөдчылө кьдз бокө сувтөдөм ружьеланьыс да турун сора небыд нитш вывтi-

ыс воськовтö ёльланьыс, вуджö сійöс да саялö шуштöм козъя вöрас.

Челядь разöдчисны кодi кытчö. Унджыкыс вотчыны, а Микаль да Алик шатинъяс корсьöны. Мед кос пожöм понöль вöли, вöсни да кузь. Микаль видзöдлiс нин вомлөгсö, но эз вöв шондiа да ни öти лов эз аддзыв. «Гашкö, ставсö нин кыйисны? — думайтö Микаль. — Эз, таво танi некодi на эз вöв.»

Кöнкö бура ылын кылö нывкаяслөн горзöдчöмыс, а тайöяслөн, мöдарö, ставыс шы ни тöv. Чövтöмны вугыръяссö вомлөгас да виччысьöны, кодлөн медводз сунас табйыс. Вабергачыс босьтöма табъяссö да гартö ас пытш-кас, оз сет кылöдны визöбыслы. Ваыс пессьöмсьыс быгзьöма. Татшöминад комыд быть вылö эм. Сёян пöраас кö слöйман, сійö зэв горш — сювъясöдзыс ньылыштас нидзула вугырсö. Кор абу тшыг, слаба сёйö, сöмын вом дорна-нас самсö видлö. Мед и курччылас, вом дорыс комлөн слаб да мынас, вомкötшыс орö. Гырысь комъясыс тадзисö ёна мынласьöны.

— Алик! — друг горöдö Микаль. — Кöни нö табйыд?

— Ог тöд да. Гашкö, кылöдiс?

Алик кыскыштö шатинсö асланьыс.

— Курччöма! Шедöма! Оз лок да...

— Эн тэрмась. Вöяс кутчысь да сiдз вайöд.

Ыджыд ком, тыдалö, Аликлы шедöма, оз кöйы локны. Зөлöдöма вöйсö да сэтчö-татчö новлöдлö. Аликлөн ки и кок тiралö. Микаль кöйис мунны отсөг вылö, но аслас табйыс сунiс. Сiйö тöдö нин вуграсян ладсö да öдйö и кыскис кос вылөдз сьöд вылыса бура ыджыд ком. Алик век на ноксьö. Шедöм комыс медбöрын пырис лапкоръяс да дзугсис сэнi, но эз мын.

— Сё, — шуö Алик, — пырис кытчöкö юрнас.

— Юрнас, юрнас, — дэльöдö Микаль. — Аслад нö юр-

ыд көні? Турунас лэдзин пырны. Ноко, өні кев.

— Йир сэн!..

— Ладнө. Часлы ме видла.

Микаль келө неуна кыттыдөдджык, косінтіыс, мөдар бокас. Вөйыс кытчөкө лапкоръяс мунө-вошө, зэлалөма. Сы кузя и колө туявны, кытчө комыс дзугсьөма. А-а, со тай кытчө. Микальлөн сой пөлыс пельпомөдзыс ваын. Сійө нетшыштө кыз иддза турунсө, кыпөдө туркъялысь на комсө да топөдө морөсланьыс.

— Ыджыд и вөлөма. Бура кутчысьлөма да эз мын. Вугырсө нбылыштөма, гашкө и сювъясөдзыс.

Зонъяслы эськө сьөлөм на сетліс нөшта вуграсьыштны, но сэсса некоді эз шед.

— Нөрөвитлам,— шуө Микаль.— Повзьөдім черисө, мед бөр воасны. Ми Ляп юас лэччылам, абу өд ылын. Косьяссө видзөдлам.

Сьөд ёльбердса козъя вөрсьыс кайисны яла яг вылө. Коркө, тыдалө, өзйылөма ягыс— став пожөмыс сьөдасьөмчишкасьөм діна. Но та вөсна абу кулөма вөрыс. Со тай кутшөм пожөмъяс быдмөмны, вывлань йөткөмны тугантор.

— Тайө ягыс дзик ю дорөдзыс мунө, а туйыс вайөдас джуджыд чой вылө.. Уліас Юрбитан кось.

— Юрбитөны али мый сәні?

— Да. Он кө юрбит, пыжнад катны он во.

— Но да, нем абусө висьталан тожө.

— Ог жө пөръясь. Коськыс сійө зөв визув. Пыжөн катігөн колө зөв кузя йөткысьны, ляпкөдчылөмөн. Юрбитөм быттө и артмө. Сэтчө коськас и кевлам, оз-ө ловъясь шедны.

Воисны сійө джуджыд чой вылас, мый йылысь Микаль висьтавліс. Улын ызгис Юрбитан коськыс.

— А кызди таті лэччам, крут зөв.

— Кось юрас мунам, сәти алькөс.

Чери кыйысыяс келісны ю шөрас, лэдзисны вугыръяссө. Визув коськыс тшөктө восьлавны кывтчөс, он вермы сулавны места вылад. Микальлы шедіс өти.

— Эн на мун, — шуө Аликлы. — Сулав, гыжъястө лэдз да.

Сәсся и Аликлы шедіс. Комыс тані абу нин сәтшөм гырысь, вугыр шатинтө оз нин мегырө кусыньтлы. Гашкө, час либө дырджык вуграсисны.

— Каям сәсся, — шуө Микаль. — Пуны эм нин. Да-й сәтысь на мыйтакө вугралам.

Бөр кавшасисны джуджыд чой вылас, пуксисны шойччыштны. Коркө тані катище вөлөма, вөрсө лэдзөмны юас чой вывсяныыс. Молльөн кылөдчөмны.

Сөмын пуксисны зонъяс, мөдлапөлас мыйкө кратш петіс, мөдысь кратшнитіс.

— Коді нө эськө? — Алик юалө.

— Ош либө йөра. Вай кымыньөн водам, видзөдыштам, коді ю дорас петас.

Кодікө збыльысь писькөдчө юланьыс, вөрөны бадь йивъясыс. Сәсся зонкаяс адзисны ошкыслысь руд мыш вывсө.

— Мунам, Микаль.

— Мунам, мунам, эн пов, сійө татчө оз вудж.

Шуис тадзисө, а ачыс тожө повзёма, Микальыс. Ош, ош и эм, быдөнлөн сёлөмыс вөрзылас, паныдасян кө. Но тані, ю сайын да, позьө на вөлі видзөдыштны ошкыс бөрся. Зонъяс первой ыджыд воськолөн вөрзисны, а сәсся асьныс эз төдлыны, кызд котөртөны нин. Регыдөн и воисны мельнича дорөдзис, но эз дзык пыр петкөдчыны нывъяслы.

— Пукуштам тані, — шуө Микаль. — Абу лөсьыд нывъяс дорас петкөдчыны пон моз нюжөдөм кывйөн. Повзёдіс ошкыс.

А нывъяс нин бипур öзтöмны, вареннö пуоны.

— Эн и кывлöй, горзылім да?— юалö Нина Васильевна.

— Сэтчöдз оз кыв, век кöть горзы. Со ми чери кыйим, пуой.

Зонъяс ректісны кыйдöссö нитш вылас. Котöртигас сэтшöма песöмны черисö, мый мукöдыслөн сылыс петöма. Алик содтöд вайö асъя кыйöм кык комсö.

— Со мыйта лоис — пöттöдз сёям. Тайö кык комыс весиг лишнöй нин. Найöс Нина Васильевналы сетам, мед горгас пуас.

Нина Васильевна гöрдöдö.

— Ог босът ме. Тані ставсö пуам да öтлаын и сёям. Оз öмöй нöшта шед, рытöдзыс ылын на?

— Шедас,— шуö Микаль,— а тайöс ставсö пуам. Рытöдзыс öтитöг небзяс солавтöг.

Челядь рытöдз тані олісны, вотчисны да вуграсисны. Нина Васильевна думнас виччысьліс на Сандырöс, но сэсса виччысьнысö лои некытчö да вöрзисны сытöг.

8. ГАЛЬ КЕРКА

Вöрыс быттö сійö и абу сійö. Челядь дырйиыс Сандыр татысь быд пу, быд вужля тöдіс. А öні быдмöмны туйдорса пожöмъясыс, веськыда туй вылас понöльяс норзьöмны, да быттö ставыс вежсьöма и эм. Туй визьсö колö сюся видзöдны — вошласьö нин кытисюрö. Важөн нин некоді абу ветлывлöма. «Некодлы и вöлі татіясті шöйтны,— думайтö Сандыр.— Вотчысьяслы ылын, а пес туй видзöдысьыс коді кувсис, коді эз на быдмы, а коді сöмын на воö». Сійö казьтылö батыскöд да Коль вокыскöд кыйсьöмъяссö. Найöджык, медічöтьясыс, вöліны батыныслөн

бөжнас. Коль, сійө эз на сёрнит весиг, а батыскөд вөрүн нин триннялис. Зэв сёрөн петіс сылөн кывйыс. Ставөн нин чайтисны, мый немөй лоас. Пельнас вөлі кылө, а сёрни мода абу. Вежөрнас эз жө вөв мукөдсьыс кольөма. Мыйла ичөт вокыс немөй, медсясө Сандырөс мыждылисны. Сійө өд вөлі кага видзысьнас. Уськөдлін пө коркө кытысянькө, шуоны, либө повзьөдлін кылыс воштөдз. И тайө ставсө батыс Коль дырйиыс шуалө. Ар сизим-ө-көкьмыс нин сэки вөлі Кольыслы, гөгөрвоө ставсө. Синваыс киссьө, көсйө шуны, мый Сандырыс абу мыжа, но кызди шуан. Щөка лытө көть век вөрөд, кывйыд кө оз пет. Коркө тулысын батыныс вөлі выль пыж тувъялө өшинь улас. Коль пиыс сы дорын жө бергалө. То көрт тув батыслы мыччө, то кес. Мый корас. Аслас киас тожө мөлөт. Батьсьыс гусьөн видлө тувйыштны кытчөкө пыжас, кузь көрт тув босьтөма да. Пыж нырас веськалас көрт тувйыс кучкынысө набой да кокура костас, өтчыд кучкөмөн юрөдзыс пырас. «Пырис!» — горөдө Коль. Батыслөн, кылас да, мөлөтыс кисыс колс усьө пыж пыдөсас. Зырөдө детинкаыс дорө: «Ноко, мый шуин, мый шуин?» — «Нинөм эг шу. Көрт тувйыс тай пырис». Галь дедыс сійө жө рытнас рөдвужсө чукөртлас, асьыс чуль-чальсө. Пасьясны тайө делөсө. Сандырлы шуис:

— Гижны-лыддысьны велөд, мед йөзсьыс некыті пөла эз вөв.

Кывнас-сёрнинас вок котырысь Коля медся на сюсь петіс, ньөбис и вузаліс...

Вөрыс лоис дзик нин төдтөм. «Но-о, эг-ө нин вош? Татшөм мандач пожөма вөр ме ог помнит. Ковмас Ляплананыс сетчыны.» Но Сандыр первой эз туйсө аддзы, а син улас усис важъя лөсас. Батыс коркө неуна сөмын и чуктөдлөма нэмөвөйся пожөмлысь кырсьсө. «Колө эськө выльмөдавны лөсасьяссө.» Сандыр судзөдө мышсьыс

ичөт'ик чер, чашнитө кырсьсө ыдждаджык, мед ылысянь тыдаліс. Сэссия видзөдө вөрсө гөгөрбок. «Сідзкө, регыд нин этійө ёлыс воас, көдзыд ваа ёлыс. Нимыс на зэв тешкодъ — Ош сурттан ёль. Сэні вөлі миянөс виччысьө кузь бедъ йылө ликтөм чумпель, мед судзөдны ёльсьыс көдзыд васө.»

Но сэтчөдз тай вөлөма ылын на. Лөсасъяссө вильмөдөмөн Сандырлөн кадыс кольны пондіс. Сөмын лун шөр бөрын воис ёль дорөдзыс. Чумпельыс вөлөма эськө, ылысянь на тыдалө кузь бедъ йылас, но сямөдыс дорьясяняныс потласьөма, да ваыс татчө оз нин өшйы. Неылын сулалысь кыддзысь Сандыр сямөдтор чашнитө, гаровтө-песовтө виль чумпель да ликтө сэтчө жө важ бедъ помас.

Ель потасыс джуджыд, да бедьтөгыс ваөдзыс он и судз. Да-й то на сөмын пидзөс лутш вылад лэччөмөн. Сандыр первой веськөдө горшсө көдзыд ванас, а сэссия пуксьө туй вомөныс важөн нин пөрлөм ой пу вылө сөйыштны. Тайө ой пуыс код төдас мый дыра нин тані. Вылысыс быттьө абу и сісьмылөма, век на шыльыд. Сөмын туй визь весьттыыс, осььковтанінттыыс, ветлысь-мунысьяс чашйөмны-жуглөмны болоньсө кокнаныс, да аддзан, мый сійө дзик нин сісь, рабзьөма быдсөн. Тайө ёль кузяыс Галь дед пыльөмъясөн век кыйсис. Ветлан туй ылын да, сылы вөлі кивыв найөс дөзьөритны. Чушыс¹ сэки ёна оліс татяэсті.

Туган эз петкөдчыв, эз вөт Сандырөс. «Но мед,— думайтө,— ачыс велалас, а өні, тыдалө, чужайтө на.» Татысянь час мында на колө осььлавны керкаөдзыс. Мунны кө сөмын. Сэтчөдз на эм дас кымын чөс-лэч места, бара кадсө гуас. Со тай нюрыс нин воис. Сійөс вуджан да, яг нөрысас и эм первой пас туйыс. «Ог, талун нинөм ог кут

¹ Чуш — (диал.) анча.

лөсьодасны... да-й зырйыс сьорысь абу. Муна керкаөдз-
ыс, местаяссө, дерт, видзөдла жө-а.»

Тайө абу и нюр весиг, а нюр кокпом, но ветлынысө
ва, торйөн нин зэраджык аръясө. «Таво на нинөм,— ду-
майтө Сандыр,— оз на ёна келөд. А турипувйыс мыйта
вутшъяс вылас. Но та ылнаысь некодлы оз ков, матын-
джык эмось нюръяс. Со кутшөм озырлун вошө миян вөръ-
ясын: пув-чөдйыс и, мырпомыс и, турипувйыс и. Көнқө
пармаас сэтшөм нюр эм, кыті на, гашкө, морт эз воськовт-
лы. Сідзкө, мый нин и сёрнитны сэтысь озырлунсө босьтөм
йылысь. Ставыс лым улө усяс-вошас. А өд эськө көдзны
ни быдтыны оз ков, природа-мамыс ассяныс вөзйө. Та
йылысь коркө йөзыс, дерт, думыштласны на.»

Сандыр сэсся ассыныс вөр керкасө син водзас сув-
төдө. Ляп ю дорас джуджыд чой вылын и эм керканыс.
Дорөсас пыж тшукөдөма, коді век сәні. Сөмын өтчыд и
кывтласны сійөн гортаныс, мед арся прөмыссө кылөдны.
Дерт, оз кө друг кынты мусө и васө. Сәки нартөн ләччө-
дасны. Гортаныс чукчи мөдөн-коймөдөн нуласны жө гөс-
инча пыдди, а остальнөйсө, сьувъяссө босьталасны да,
пуктасны кытчөкө ыркыд төв йылө, но мед сөмын гусь
кенаяс эз сибавны.

Пыжыс тані и тулыснас колө, кор ойдөдас Ляпсө, да
бадь бөжъясас, ва сайясас позьө кулөмъяс чөвтавны. «Ог
төд, ог төд,— думайтө Сандыр,— ставыс-ө тайө өні лад
вылын: пыжыс и, кулөмъясыс и, ачыс керкаыс и. Нөшта
көть эськө төлысь мед прөст вөлі. Пас туйясыс абу джень-
ыдөсь — өтнамлы куим лун колө кыйны-гөгравны. Төва-
рыш колө. Микалыс көть эськө да, но ичөтджык на.
Велөдчө и...»

Нюрыс помасис. Некутшөм вывтасінтөг ни каянінтөг
воис яг выв. Татіясті ветлөдчигөн Сандыр век вөлі шензьө,
өти кокыд пө нюр вылас на, а мөдыд яг вылын нин. Таті,

нюр бокодъс, пув бара жё лоёма. Гырысь, пондёма нин съодасъны. Мунігмозыс Сандыр копыртчывлө, босьталө пув розъяссө вокас. Сійөс шомөдө, куньö синъяссө, но сөйö и сөйö, оз вермы дугөдчыны. Вужля бокас, көні пер-вой лэч местаыс, пувйыс нөшта на гырысь да съөд. Но татысь лэбачлөн ли кодлөн сыръяссө жуглөма нин. Сандыр бөрийö синнас бурджык сыр, ляпкөдчө сыла да быттьö кыммө места вылас, весиг вунөдө сырсө сөрвитны. Бөр сувтö да видзөдө лэч вылас вывсянь. Зэв на и бур ног лөсьөдөма кодлөнкө лэч местасө. Весиг маласян чунь туй-ясыс төдчöны неважөн кыпөдөм лыа вылас. Лэчкыс выль жö, кык пөвста сöнысь гартöма. «Татшöмыд оз шед йитш-нитны-оровтны ни öти чукчины. Көдi нö эськө?» Сандыр пуксьылө, но öдйö бөр сувтö да воськовтö водзлань, көні кык ли куим чөс век вöліны öта-мөдсяньыс неылын. Сидзи и эм, сиалöма жö, ставсө лючки вөчöма, төлкөн. Бура кыз пожөм кражйысь шөри поткөдлөм плакаясыс ёнөсь на. Чөсувса сартассө абу жö выльöс поткөдлөма, важыс. Сöмын чөссө сиалан ньөр кытшсө песовтöма-гаровтöма выль-öс да выль шөрт йылө домöма выль вожач. Чөс горувсө тожö весалöма-пелькөдөма.

Көнкө танi жö мөд чөскыс. Со тай. Но, гашкө, пезьöдөма, а сиавтөм. Сандыр матыстчө, кыпөдө плакаяссө да на улысь судзөдө вийөрөс, öшөдө коз чаль вылө.

Крепыда думö усис Сандыр. «Чужöй морт та мында труд эз эськө понды пуктыны йөз пас туйö.» Сійö пукалө мыр вылын, кытысянь тыдалө керка пельöсыс, а ставнас керкасö сайөдöны кызъяс. Кеняяс сэтысянь лэбзисны, кылісны, тыдалө, морт дуксө. «Найö кө танi жируйтöны, сидзкө олысь эм кодикö, а öні абу гортас, мунöма.» Кеняйд, сійö зэв на и мудер лэбач. Кок помтö кыйөдас, кор петан керкасыс, да сöмын сэки локтас матөджык. Розь кө эм, посводзас пырас, дозмөртö пакөститас.

Сандыр первойсö кöсйыліс мөдлапөлас кевны да татисянь видзөдыштны-кыйөдыштны мый дыра кө, но сесся бура нин гөгөрвоис, мый, Коль воксыс кындзи, тани лоны некодлы. Со тай көні сійө, юөртөг вошысыс. Абу өд тайө ставыс бур эськө да, оз өд тани бур олөмысь дзебсясь. Сандыр петө керка дорас, а сьөлөмыс абу местаын. Полө быттьө — а друг керкасыс ли кытыськө аддзас сэтшөмтор, коді висьталас: Коля пышйөма фронт вылысь да өні вöрын дзебсясьө. «Но, мый лоаныс ло, өні нинөм нин он косөд.» Сандыр эз на думыштлы, мый пондас вöчны, ставыс кө тайө збыль. Но та йылысь думыштлыны сылы эз ковмы.

Калича и эм өдзөсыс — бергөдөма вомөн көсякас тувйыштөм тшалаксө. Да-й пес поткөдлан черсө на пас пыдди сувтөдөма. Сандыр оз тэрмась пырны керкаас, видлалө ставсө гөгөр. Пес поткөдланинас выль чагйыс абу этша — олөма нин абу вежон ли мөд, а, гашкө, төвсянныс нин. Коз улын гымга — Галь дедрөн на вөчлөмторйыс. Куим-өнель швөдз вежөма, выльөсь. Сидзкө, чериыс кывтигкежлас тшуп көсйө тшуплыны. Сандыр бергөдө каличсө да пырө посводзас. Пусянинас пөрт да чайник өшалөны. Пөртас кольыштөма шыдтор, тар ли дозмөр пулөма. Чайникас заваритлөма пакула. Пон вөрйыс кымса. «Коль вок понтөг вөралө... А кытысь сійө сылы?» Джаджйын гөн тыра чуман, ставыс дозмөр да сьөла гөн. Чуман пыдөссыс нин аддзис: коркө кеняөс куштылөма. Тшыгла кулөмысь кеня яйыс абу жө лёк.

Сандыр восьтө керка өдзөссө, да нырас өвтыштө олан дукөн. Абу кө төрыт, вөйдөрлун горсө ломтылөма. Пызан вылас нинөм лишнөйыс абу — сөмын истөг куд да джынъялөм махорка пачка. Стенө тувйыштөм көрт тувйылын пөльтөма да косьмө дозмөр гадь. Сійө вөлөма пөшти тыртөм, сөмын некымын чөд ли пув тусь. «Арын кө тыр-

төм, мый нин сэссия.» Лампа сулалө өшинь вылас. Сэни жө бритчан завод да кымынкө ниа сир бугыль. Нар вылас тожө нинөм ыджадыс: кык көр воль вевся вольсыштөма, юрлөс пыддыс важ ватнөй пальто. «Нэмсө нин тани тайө пальтоыс»,— думыштө Сандыр да бергөдө сийөс. Сэни өкуратнөя тупыльтөмөн пуктөма салдатскөй гимнастерка да галипе гач. Найөс вөрзөдигөн мыйкө зялькнитис. Тайө Кольлөн наградаыс кывлысисны. Сандыр аддзө найөс. Кык «За отвагу», өти «За взятие Будапешта» да весиг орден на эм, Краснөй Звезда орден. «Татшөм наградаыс,— думайтө Сандыр,— дезертиръяслөн оз кө овлыны-а. Абу кө гусялөма кодлыскө.» Видзөдлө и зепъяссө, документъяссө судзөдө. Ставыс: и военнөй билетыс, и наградаыс дорас бумагаыс, и госпитальыс выпискаыс сылөн, Кочегов Николай Гавриловичлөн. Врачяс асланыс заключениеас гижөмны: «Паралич лицевого нерва вследствие ранения. Полная глухота, возможно с переходом в частичную.»

«Со тай кызди гижөмаөсь Коль воклы. Сидзкө, пельнас оз кыв да-й чужөмбансө на колөкө вежыньтөма кодарөкө. Мый сөмын оз и вөч мортыскөд войнаыс. Китөм-коктөмыс и, синтөм-пельтөмыс и — кымын бур морт чиш-кассис война биас. Коді, дерт, дзикөдз сотчис, водзө олөм йылысь налы думайтны оз нин ков, кызд тай менам ыджыдджык вокъяслы. Кын пу чөр йирөмысь да пузлая вылө сибдөм пур бертөмысь өтдор, нинөм сэссия эз адзывны олөмас, а өни весиг и тайөс войнаыс мырддис налысь. Миян нин ковмас на пыдди туртны-бертны, коді мый вермас да кужас.»

Сандырлөн татшөм разі-пели думъясыс бара бергөдчисны Коль вокысланы: «Тайө нө мужикыс тадзи и көсийө али мый овны куш сөмын аслыс пай вылө да латшөг моз кыскавны-таргайтны вөр-васыс аслас позйө? Ки-

кокыс эм, синмыс аддзё, а дзебсьома кытчөкө, сэссия и делө некутшөм абу. Но воас өд ачыс. Код төдас, мыйысь на и дзебсясьө...»

Узьны кө талун ковмас, керкаын көдзыд, да Сандыр ломтө горсө. Сэссия пукалыштис гор водзас неджуджыд джек вылын, гажмысь бисө видзөдигмоз. Съод изъяс косттыс пуркйысь тшыныс увлань и увлань пондис личкыны Сандырөс, да дзик нин дждодж бердтыс сийө гызымтис ывлаас.

Коль эз во. Сандыр сёр рытөдз виччысьлис, весиг пемыдас на пукуштитс чой дорас, оз-ө кратшнит мөдлапөлас кос чаль, оз-ө кыв пыжө воськовтөм шы. Арся рыт помыс шонид, гожся кодь, да Сандырлы эз на вөв окота пырны жара ломтөм керкаас. Дзурс пемыдось нин войясыс. А мый нө, өни нин — сентябрь. Дыр на сэссия пукалис да медбөрын лөсьөдчис узьны жө. Но узьөмыс узьөм на вөли. Некумынысь садьмылис войнас. Ломтөмыс ли мый унджык лоөма да жарсьыс. А гашкө, сы вөсна, мый лунся думъясыс век на жөдзөны-бергалөны юрас да петкөдчөны вөтъясөн. Найө, вөтъясыс, и садьмөдөны Сандырөс. Бара на унмовсьтөдзыс дыр видзөдө пемыдас, но некызд оз куж босьтны-кватитны, кутшөм вөт өни сийө аддзылис. Гөгөр шы ни төв. Сөмын көнкө өшиньладорас, жарсьыс жө тыдалө, пессьө-кувсьө лөдз, да стен саяс гыжнитласны, чипөстыласны шыръяс.

Унаысь садьмылөмсьыс асывнас бура сөрөдз узьсьөма Сандырлөн. Садьмис, а шондыс мунөма нин өшинь вельтассьыс, да югөрыс өни пырө пөдлавлытөм дымник розьөдыс. Сандыр пыралө зептас чепта часысла, кадсө видзөдлө. Сийө оз на төд, мый вөчны: виччысьны Кольөс тані либө воча ветлыны. Ветлыны кө, бара жө полө вежынь лоөмысь. Пас туйыс сәні уна вожа. Тадзи думайтө Сандыр: «Узьны кө, узис Мегыра вожын, век вөли сэгчө

слөймөдчывлам. Зэв ыджыд коз эм да, коз улас. Прөмымос сэтчө тожө вөлі кольывлам. Сэтчө кө ныровпетліс, час-мөд мысти воас. Колө амбарас ветлыны, видзөдлыны, мый сәні пунысө эм».

Амбарас пөрадок. Пөгреб вывсө сідз вевттьөма — ни өти лөз гут пыдө оз письт. Сандыр босьтө пөвъяссө, да сылы өвтыштө көдзыд руөн. «Лым али мый пыртлөма? Сідзкө, тувсалөма нин тані. Но и но. А мамыс быд водігчеччиг бөрдөдө дзоля писө.» Лымйыс абу нин зэв уна, сылөма гожөмбыднас. Ыджыд туйсө солалөма да бура личкөма гырысь ком. Ставыс өткодь, быттьө бөрийөмөн кыйөма. Нөшта пу ведра эм, сәні тожө чери, но абу тырыс. «Татысь, тыдалө, сөйнысө пыртлывлө.» Тані жө, лым вылас, лов кызь мында тар-дозмөр. «Оз лөка ов. Запас вөчө төвйыны ли, гортас кылөдны ли, код төдас.» Сандыр кайө пөгребсьыс, ки пөлас тар кватитөма. Лөсьөдчө куштыны. Лэдзис джаджйысь гөн чумансө, пуксис пекиль вылө, видлалө лөсталысь съөд гөна лэбачсө. Ена пессьөма тарыс, весиг борд пөвсө чегъялөма нөйтчигас.

Пөткасө куштигмоз Сандыр казтылө Коль воыкскөд коркөя кыйсьөмъяссө. Чөс туй кыйны батьныс кыв шутөг дөверитліс вокъяслы, а койт вылө гырысьсөсь нин, а оз лэдз вөлі. Шулывліс: «Ог, ог, өтнаныд ог лэдз, зэв на слаб тусь пукан местаныд. Сәні төлк колө. Здук кежлө пельтөммылөм пөткасө кыйөдны да лыйны сямныд, гашкө и, тырмө, но сійө колө мөдлаө. Колө кужны не лыйны, не вины, кор оз ков. Быттьө эськө и абу сьөкыд наук, а горш мортлы ок кутшөм сьөкыда сетчө. Тувсов вөр-ваын вывті өкуратнөя колө овны. Кок улад видзөдөмөн весиг колө тувчавны вөрөдыс мунигөн. А ті көсьяныд асланыд «пушкаясөн» менсьым койтъясөс пакөститны.» Со кызди шулывліс батьныс. Сәсся велөдіс пиянсө койт вылысь ай тарсө лэчкөн кыйны. Ыджыд лөксө старикыс таын

нинѳм эз аддзы. Сѳр тулыснас нин, кор таръяслѳн ыджыд пир-свадьбаыс помасѳ да энъясыс поз вылѳ моздѳдчасны, оз нин пондыны воывылыны койт вылас, аясыс оз на ѳтпырйѳн дугѳдчыны чукѳртчывлѳмсыыс, ѳтнаныс койтѳны. Кѳк нин кывлысяс, голясѳ нетшкѳ, а таръяс век на кургѳны. Вот сѳки пѳ и кыйѳ тарсѳ, висътавліс Галь дед, сямныд кѳ тырмас. Вокъяс ѳти тулысѳ ѳна заводитлісны кыйсыны, петкѳдліс батыныс койт нѳль-ѳ-вит да.

Таръяс шылыдынын койтѳны, тшѳтшкѳсінын. Нюр вылын ли, мед кос вѳлі-а. Вѳрас ли, эрдтор кѳ эм кутшѳм-кѳ. Зонъяс ѳти койт тѳдісны дзык Ляп ю боксыыс. Кольѳм вося косъмѳм турун вылас, паун вылас и койтѳны вѳлі. Мед и лѳчкѳн, а унаыс оз жѳ пыр. Кыйѳм кежлас койт вывсыыс тар-мѳд кѳ босътан, зѳв нин бур. Унджыкыслы некытысь лоны. Кодъяс шыркнитчасны, асланыс нѳйтчѳмѳн-песъѳмѳн ставсѳ повзѳѳдасны койт вывсыыс. Вокъяс-лы ѳтчыд паун вылас энъ горда вѳлі пырѳма. Ёна и шензисны, кыдзи пѳ сійѳ веськалѳма тар чукѳрас. Батыныс жѳ и висъталіс, мый сѳні гѳпъяс эмѳсь, кытчѳ позъясыѳ гордаыс. Гѳптысь гѳптѳ ветлѳдчигас сѳйѳд корсигмоз и суйсяс тйан лѳчкѳ. А мамныс повзис. Татшѳм дивѳ, шуѳ, эг на кывлы, мед тар койт вылѳ горда пырас. Абу жѳ нин, шуѳ, тайѳ бур водзѳ. Сѳсся кутшѳмкѳ лѳктор пондіс виччысыны. Нинѳм сѳтшѳмыс эз ло. Мѳдарѳ, Иван вокныс, Микальлѳн батыс, воис гожѳмнас пур вылысь том гѳтыр-кѳд. Лешуконскѳйысь пѳ кватитѳма бѳрсѳ локтігас. Батьмам рочасыны оз кужны. Батыныс эсыкѳ кыті вомнас, кыті кинас, а мый кѳсъяс, висъталас быть вылѳ. Елисаавлы вѳлі сыѳкыджык. Некумын кыв кѳ вежас монъыскѳд, шуас нин: «Уф, пѳсялі быдсѳн». Сандыр помнитѳ, кыдзи том ичмонъѳс первойысь ытшкысыны нуѳдісны. Приданнѳй пыдди сылѳн сыѳрссыыс вѳлі вайлѳма дона коса. Дедыс видзѳдіс-видзѳдіс, кыдзи монъыс ытшкысыѳ, да-й дугѳдіс:

«А на литовкасö босьт». Регьд и велаліс литовка дорас. Дона косасьыс батыныс сэсся пуртъяс дорис.

9. ВОКЪЯС

Сандырлөн пусис тар яя шыдыс. «Виччысьла на,— думайтö,— а оз кö во, öтнам сёя. Кад нин эськö да.» Лэччö ю дорас, визув Ляп дорö, видзöдö кывтчöс, бадь нöрыс вылас, кыті юыс крута бергöдчö асыв-войлань да бура кузя тадзисö визувтö кытшлялёмөн. Паш Митрей керас-сянь сэсся бөрö сетчас асывлань да некытчö кежавлытöг-ылавлытöг тадзи и усьö Мозынö косьмём-пузувтём вом дорнас. Кось вывтыс кывтöны öтка-öтка коръяс. Вежöсь на, а нетшыштны нин сетчёмны кутшöмкö тöврулы. А гашкö, ю визöбыс сөрвитіс ваөдзыс нёрём кыддзысь, кодöс вужъяснас и, лабнас и быдсөн пөрöдіс ытваыс да öні век на ловъя. Сэтчöдз лоас ловъя, кытчöдз нöшта кутшöмкö ытваөн ли, йинас ли оз ну чужан берегсьыс.

Ваас, дзик берег дорас, Кольлөн шыбитлёма чери сювъяс, да öні сэтчö чукöртчёма зэв уна сьöd ёс, муыс оз тыдав. Пир восьтёмны сювъяс дорас. Губыртны кö ёс тывйөн, гашкö и ведра шедас. Тайö аслысьяма кыз рушка чериыс чаль чунысь кузьджык оз и быдмыв. Та вöсна и черинас оз шуны, а нэмсö ёскөн кольö. Рушкуыс сы вöсна сылөн ыджыд, мый сэні тырыс пök, да сэтчö жö ва пыдöстыс кылалысь лютсö ёна сёйö. Кыйны кыйöны жö сьöd ёссö, мыйла оз, свежойён и солаөн сёйöны. Дерт, курыд сёйнысö, он кö быдөнлысь, гырысьлысь и поснилысь, сювьяссö пычки. А ставлысь он и вермы, унджык кö кыян. Тані сідз вöчöны. Ёссö пуасны пёртыын, ёна пуасны. Сэсся колö кольтанён песни-гудравны, кытчöдз ёскыслөн оз пет рушкусьыс став лёкторйыс. Сітыс вылö бовгысяс,

да паньнад сөмын көвт да бокө шыблав. Тадзисө поэьо на сөйны свежөйнас. Война воясө да-й сы бөрын нин тшыг нисьө пөт кадас сьөд ёскыс унаөс бурдөдөс тшыг висьөмысь. Нянтө, дерт, татшөм сөйөдыд уна жө ылөдлас.

Мөдлапөлас, көнкө козьяс пөвстас, гызис повзьөм лэбач чукөр. «Локтө. Дзевсьыла татчө бадь саяс.» Сандыр пырө дзик берег дорас быдмысь бадь чукөрө, видзөдө Коль вокыслысь пыж дорас лэччөмсө. Сийө кызкө друг и мыччысьө козьяс сайсьыс, кокниа чеччыштө лаб вывсьяньыс пыж дорөдзыс. Лэдзө пельпом сайсьыс сьөкыдкодь нопсө, шыбитө пыж нырас. Сэссия йөткыштө пыжсө да бөжнас водзын и вуджө. А мый тані бергавнысө, ныр да бөж видзөдны, кор кыкысь йөткысян да-й мөдар берегас нин. Сандыр видзөдө вуджысь Коль бөрся. Мыгөрыс тай, пыжас сулалө да, дзик сылөн, абу и вежсьылөма. Кок паськөдан да гөрбыльтчыштан модаыс батьыслөн. А нырвомыс быттө и абуджык сылөн ылысяньсө. «Но өд тайө кадөн көнкө пөрысьмыштіс жө, вежсьытөм абу.» Сандыр көсийө эськө зырөдны вокыслыс воча, но мыйлакө оз, керкаас пыртөдз видзөдөс. Коль бөрсө петіс көмтөг, отар киас сапөг гозйыс, мөдарас нямөдыс. Нуис өшөдны кытчөкө төв йылө. Сэссия друг горөдө вывсьянь:

— Сандыр, кай сэтысь. Тшайкөмыс меным колө... аслад сапөгыд кос. Дзевсьясьө на өд.

Вокъяс дыр сулалөны өта-мөдсө сывйыштөмөн.

— Тэ, Сандыр вок, нинөм эн висьтав ни юав, өти жө, ог кыв тэнө, некодөс ог кыв. Надзөник ачым ставсө висьтала. Асывнас тэрмаси лэччыны, мися, воин кө, мед өдйөджык бөрө он зырөд. Эг сөйышт весиг, да өні сэтшөма кынөм сьомалө. Тайө лунъясө ме тэнө виччыси нин. Чайті, Микалькөд воан. Зэв тай ыджыд нин лоөма, мужик.

Сандыр кыпөдө пөртсьыс пусьөм тарсө да пуктө неыджыд чуманө, мед шыдсө сөйигкості русө чөвтас.

— Няньнас ог лышкыда ов. Война вылас мөдтөдз кос нянь мешок ачым жө катөдлі да сійө на век тырмис. Бать тай, тыдалө, кайлөма жө өтчөд ли кыкысь. Поконик. Тэ, Сандыр вок, көсьян кө мыйкө юавны менсьым, карандаш эм да тетрадь. Нинөм ньөти ог кыв. Врачьяс тай шуоны, гашкө, кывны пондан. Гашкө пө. Садьма быд асыв да дыр кывзыся, эг-ө пеляссы войнас. Мися, көнкө оз-ө лэбач чипөсты ли төв шутөвт. Дзик өти мина пельтөмөн вөчис, а чужөмөс понлөн кодьөн, мукөд ног он и шу. Сійө менам быттьө кын бока картофель, өтар джыньяс узор көть вышивайт — синнам ог лапнит. Дерт, өні мыйта нин колис кадыс госпиталяс куйлөмөн да мый да, велөдышти ачымөс ныр-вом дорам, мед чучела кодь эг вөв. Врачяс менам зэв бур морт вөлі, полковник Вельяминов. Быд лун вөлі тшөктө зеркалө водзын тренируйтчыны. Мөд тулыс волены корис. Медицинаыс, шуө, места вылас оз сулав, бара на кытисюрө лөсьөдыштам. Менө өд, веритан он, мөдар югыдсьыс нин бөр косөдісны. Победаөдз пөшти воюйті, вежон и кольліс сэтчөдз, да ни өти пуля ни осколок некыті эз чашнитлы. Тайө минасө неуна бөкөджык пуктылөмны да абу аддзөмны. Сы вылө и веськалі. Ачөд думайт, мина кок улам взорвитчас, а со тэкөд пукала. Сөмын өти осколок и жугөдіс синкөрша лысө. Со тай. Нервьяссө пө орөдлөма. Содтөд садьөс вошти төлысь кежлө кадөн-кадөн палявлөмөн. Менө өд гуавны заводитлөмны сэки на, пульс ни сьөлөм некөн оз кыв да. Военврач слөймас прөйдитны машинаөн, ранитчөмаяссө өктөны. Сійө и кватитчас видзөдлыны син бугыльөс. Ранаыс, шуөма, вермас лоны и абу смертельной, но контузитчөма бура.

Коль чөв олыштө да водзө висьталө:

— А вои ме татчө водз тулыснас, чарөм вывті кайи. Гортөдз вөлөн вайөдісны, но ме эг висьтась коді, а төдны эз төдны. Первой ме көсийи век жө петкөдчывны мамлы.

Тода: виччысь, бөрдө ме вөсна, но... эг нин. Думышти, мися петкөдчылөмыс да бөр вошөмыс-мунөмыс, гашкө, лёдджык на. Код төдас, мый сийө вермис думыштны? Йөзсьыс пө дзевсьыны көсийө — ладнө-ө ставыс. А тшөктис меным полковникыс өтнам олыштны. Эз шу, дерт, дзевсьыны ли воштысьны кытчөкө. Мыйла өтнам — ог төд. Шулис коркө өтчид, пельтө пө век пош эн видз, эн кывзысь, он кө кыв. Сылы, шуө, спокой колө... А төдан, гожөмнас ме кыкысь пыжөн кывтли. Мөдлапөвсяныыс горт вылам, сикт вылам видзөда. Шыяссө ог кыв, а кодимый вөчө сиктас, аддза. Мамөс аддзи, пыжөн вөлі воөмны видз вылысь Миш Таттянкөд, да горшөй гөрддзасис, синва тюрөбөн киссьө. Тэнө аддзылі. Сөр рытнас нин колхоз правленньөысь петін. Гашкө, предөн бөрийсны?

Сандыр довкнитө юрнас, бөрийсны пө.

— Митрей Любаөс аддзылі, нывъяскөд сикт кузя мунис. Воддза моз, гашкө, сылигтыр ветлөдлісны. Тыдалө, абу на верөс сайын, но менө нин, дерт, оз виччысь, көнкө. Виччысьө ли? Но оз татшөмөс. Сы понда өд нөшта на дум босьтлис воштысьны кытчөкө ыджыд мирас да гортсянь ылөджык. Мися, ола тани арөдзыс да мыйкө думышта.

Сандыр гижө тетрадьө: «Эн йөйтав, юрид али мый на содтөд пальшивөй? А Любаыс збыльысь виччысьө тэнө. Корасьны волөма сы дөрө Педул Матвей, да косөн өткажитөма».

Коль лыддьө да водзө висьталө ассьыс:

— А сэтшөм письмөяс фронт вылө гижліс. Он кө пө во тыш вывсьыс, тэ кодьөс жө кута корсьны аслым пөвсө. Но тэ пө воан, вөт сэтшөмөс аддзылі. Кутшөмджык өні эськө сийө, Любаыс?

Коль пыдісянь ышловзьө, бура дыр кежлө усьлө думө. Сингьясыс петкөдлөны, мый казьтылөмыс шоньд, абу сьөкыд, абу сьөлөм чепөльтана. Сідзкө, оз война йывсьыс

думайт. А мыйла эськө и оз? Сэни өд, война вылас, вөліны жө кутшөмкө сэтшөм здукъяс, кор том йөзтө и выль пөлөс подвигъяс вылө кыскыліс. Эз куш сөмын вир да синва кысътлыны. А сэсся победаясыс, мездөм каръясыс асланым и йөзлөн. Сандырлы окота эськө юасыштны вокыслөн воюйтөм йылысь, но, думайтө, коркө ачыс висьталас:

— Абу, дерт, лөсьыд победительлы гортад тадзикөн воөмыс. Морөсөй абу дзик тыртөм и... А мый вөчан, сідз кө артмис.

10. АРСЯ ГЫМ

Шондыс рытлань нин бергөдчис, вуджөръясыс ю ногниыс кывтчөс водісны. Но найө, шондыс и, вуджөръясыс и, вошисны регыд, кымрасьны пондіс да. А ывлаыс лөнь, төв ни ру некөн абу. Та вөсна и мошкаыс петіс — синтө он лысьт восьтны. Коль пес поткөдлө, шуалө:

— Уф, лекторйыс тай петіс на. Зэрмас, тыдалө, войланьыс. Но мед. Часлы, первой ломтам керкасө. Сандыр, тэ ректы менсьым нопсө да пукты ловъяссө лым вылас. Талун на узям тані кык вок. Асылөдзыс ылын на, а сэсся мыйкө тыдавы кутас.

Сандыр көсйө шуны воча, мый сійөс воштісны гортас, мед и корсьны оз шыбитчыны. Но кытчө шуан пельтөм мортлы. «Узьны кө и узьны,— думайтө,— а асывнас сөвтны пыжө Коль воклысь став прөмыссө, черисө и яйсө, да мед сэсся ачыс и кылөдас, а ме подөн лэчча. Бөрнас тадзи колө гижны, мый шуас.»

Сійө нуө вокыслысь талунъя прөмыссө, кык чукчи да кымынкө тар, пөгребас. «Дозмөрыс таво эм, тыдалө, оз кө лэб. Но бур, чөс туйсө вөдитысьыс тай лоис. Төвнас

сэсса ме сійос строительствою дома. Вөр колө уна пөрөдны и. Ставыс важмөма-сисьмөма, мукөдыс дзикөдз киссьөма, зэв ыджыд делө колө бергөдны.»

Кольлөн ломтөма горсө. Тшыныс петөма вөля вылө да абу вывлань зырөдөма, а ляскысьөма муланьыс, лэччөма Ляп вылас да довъялө, а пөльыштны некодлы.

— Но мый, братан,— шуө Коль.— Гашкө, нөшта өти тар пулам? Сола ком пыртлам. Эм да, мый кутам скупитчыны, бара на пырас. Ме со мый думышти, Сандыр вок. Аски ме кывта пыжнас, а тэ подөн лэччы, регыдджык воан. Мамөс кызкө бур ног дасьты, мед оз пөр кок йывсьыс, аддзас менө да.

Сандыр шөйөвошлө, думъясөс пө лыддьө али мый.

Бипур өзтисны и пусянінас пөрт өшөдісны. Тані и пукалөны кык вок би дорас да тшын йылас, мед мошкаыс эз дөсадит. Посводз өдзөсыс восьса. Татісянь, вывсянь, ылөдз тыдалөны сера котша, уна рөма арся вөрьясыс, кыті эз этша келавлыны татшөм жө арьясө батя-пия котыр. Таысь неуна катыдө Ляпас Кос Вож усьө, ютор жө дзоляник, но комыс катлывлө сэтчө бура вылөдз. Сэні век тшуп видзисны, мед арнас кыйөдны кывтысь-лэччысь черисө. Керкасяньыс весьтас и ветлывлөны вөлі гымгасө кыйны. Дзик сөмын кыйнысө батыныс ли кодкө пияньсыс вермисны и өтнаныс, но Галь дед век вөлі шулывлө: «Ветламөй тшөтш на всякий случай». А «всякий случайыс» сылөн сійө, мый чериыс вермас чобөдөдзыс пырны да гымгасө өткөн он вермы кыпөдны. Сандыр оз помнит, мед сы мында чери сэтчө шедліс коркө. Неминучаяссө тай со помнитө. Тшупнысө өтчыд чашкөдліс-косявліс. Но эз сы вөсна, мый туис ваыс да нуис визөбнас. Рытсьяньыс на сэки лыбис кутшөмкө лөк бушков да асылөдзыс пушкис, өти войөн куштис корья вөрсө. Сы мында кылалысь корсө некутшөм тшуп оз вермы кутны. Мөдысь сэсса вурд

пыралёма да гымгасо лэдзёма чагйё. Татшөмторйыс вөвлі, но черисо, дерт, мыйтакө кыйлісны и сэтысь.

Коль тожө казтылө ли, думайтө ли кутшөмкө кыз дум, лэбалө-ветлөдлө мөвпнас код төдас көні. Оз вунөд видзөдлывлыны пөрт вылас. Кор шыдыс пузьё, кыпөдө өшансө өти тшупөд вывлань. Восьса өдзөс югөрас кодикө вуджөртіс. Кыкнанныс бергөдчисны. Керка дорас пон ветлөдлө-исасьё, сэсся сувтіс да ывласяньыс видзөдө вокьяс вылө. Ачыс быттьё пружина вылын — дась чеччыштны боквыв, кодкө повзьөдас кө неладнө вөрзьөмөн.

— Туган,— төдө понсө Сандыр, тапкөдө ки пыдөснас пидзөсланьыс.— Лок татчө, лок.

Туган казялө, мый повны тані нинөмысь, да өтчыдмөдысь легнитлө бөжнас. Думыс эськө эм порогсө воськовтны, да мыйкө сорө сылы тайөс вөчны. Сэсся мунө вөрсьыс петан туй дорланьыс да увтчылө кымыныськө.

«Микаль локтө. Сыысь өтдор понйөс сэсся некод оз вөдит.»

Сандыр чепөсйө ывлаас, видзөдө вөрланьыс. Понйыс абу нин, воча, тыдалө, котөртөма. Петө и Коль, куалө:

— Кодлөн нө понйыс?

— Микальлөн,— шуө Сандыр, да мед гөгөрвоис вокыс, өшөдлө ки пыдөссө Микаль джуджда вылнаө.

— Микаль? Төдө али мый татчө туйсө?

«Төдө ли оз, но ачыс абу на. Ковмас, гашкө, воча ветлыны.»

Сөмын думыштіс тадзи, кызьяс сайысь петө Микаль понйыскөд, ружьеа и быдөн, быттьё бур вөралысь. Матыстчис, чолөмасис. Видзөдө Коль вылө, төдө и оз төд.

— Эн төд али мый менө, Микаль?— Матыстчө зонка дорө да кызди важөн, войнаөдзыс на, көсйө качөдлыны вывлань, но качөдөмыс эз артмы.

— Съөктаммөмыд тай, быдмөмыд и. Помнитан-ө, кы-

дзи ме тэнö енэжöдзыс качöдлывлі, а бабыд орччөн сула-
лö-тіралö, мед ог уськöд.

— Коль дядьыд нинöм оз кыв,— тэрмасьö висьтавыны
Сандыр.— Пельтöм лоöма война вылас. Но кывны пö
надзöник пондас, врачьяс шуöмаöсь. Та вöсна и татчö лок-
тöма, абу гортас, мед вөр-ваыслысь небыд шыяссö первой
кывны. Сэссия и чужöмыс тай со... да нöшта на йöз дорас
оз кыскы. Ачыд гөгөрвоан. А лектор нинöм эн думайт.
Но... мый тай бабыд бöрдöдлывлö, плен да мый да. Госпи-
тальын дыр вöлöма. А медальыс — морöс тырыс, бөрнас
видзöдлан. Туйсö татчö бабыд висьталіс?

— Сійö эськö да... вошлі жö нюр вылас, бура дыр
Туганкöд кытшлалім.

— Но бур. А менö корсьны али мый бабыд ыстіс?

— Корсьны не корсьны-а... мися гашкö, отсавны колö,
öтнад он вевъяв. Бабö майшасьö, места оз аддзы, эн во да.

— Тайö ружьеыс батыдлөн на.

— Сылөн. Пуля патронсö кыкöс босьтлі.

— Ошкысь полан? Сійö ассияныс некор оз зырöд да
оз и тэсöтчы морткöд. Тэ со öні татчöдз кайин да, чайта,
эз öти ош тэнö аддзыв. Но бур, воин кö и бур. Аски бөрö
лэччам.

— Коль дядьö и?

— Сійö пыжнас кывтас, чери-яй шедыштöма да.

А Коль керка пытшкас лампаа би öзтöма, пызан
лöсьöдöма. Пу тасьтіö пунктöма шыд, паськыд пöв вылö
мыськөмөн-сьөмійөмөн юр-юрö дорсьöдöма куим ыджыд
ком.

— Со,— шуö, петкöдлö пызан вылас,— чем богаты,
кыз тай шуласны, локтöй.

— Менам на эм мыйсюрö лаз бöжам,— кватитчö Ми-
каль да вайö пызан вылас кык тупöсь нянь, картопеля
шаньгаяс да черинянь.

Коль видзодё гёсничаяс вылас, мыйкё шуны кёсйё, но оз шед кылыс, а бандзиб вывтывс гёгыльтчис синва войт.

— Мамукёй менам. Бара од воа тэнсьыд пёсь шаньга-тё асывъяснас кыйодны. Коньорёй, прөстит жё нин, мый та дыра дойдалі тэнсьыд сёлөмтё аслам дзебсясьомён.

Пызан сайё пуксигкостіныс и рөмдіс нин ывла вылыс, зэв крута рөмдіс, сы вёсна мый рытсаяныс нин вөлі ошалё енэжыс сьод эшкынён, а өні сійё, тыдалё, дзикөдз нин польдөма ванас да вот-вот письтас. Сэсся кызкё дзик нин нем виччысьтөг керка өшиньсё югзьөдлө чардби да сярөбтё гым.

— Гымыштіс-ө? — юалё Коль, а ачыс быттё төдө нин, мый гымыштіс, көть эськё арын вирдавлё дзик гымъястөг.

— Гымыштіс, — юрнас довкнитлөмөн шуё Сандыр.

— Со и медбөръя гым, гашкё. Мыйла өні нин сэсся найё? Кодөс повзьөдлыны? Полім мый полім, но эг шөйё-вошөй, эг лэптөй кинымөс. Медбөръяён сідзкё мед и лоас тайё гымыс. Кодлы сійё колё? Водзё вылө мед эськё гымъястөг мыссис-сөстөммис муыс, бурөн мыссис да нуис му вывсьыс став сөссө.

Сэсся нөшта на кымыныськё вирдыштліс, югзьөдліс өшиньсё, но өні нин чардбиыс эз вөв сэтшөм ярьюгьд, синтё ёрана, а кутшөмкё гөрдов нин, сайкалөм пачын өгырыс кодь. Да-й гымыс нин сэсся оз сярөбты первойыс моз, а сөмын гуркнитлас, быттё вылыс судтаас пызан йижлалёны өтилаысь мөдлаө. Сійё, гымыс, век ылысмө, ылысмө да вошө дзикөдз. Но сы пыдди пондісны кывны, быд боксянь пырөдчыны дзик нин мөд шыяс. Медводдза войтъясыс кызди усисны, некоді, гашкё, эз и кывлы, но сэсся кызди тай ставнас письтіс енэжыс да кызди тай эз жебиника, а ведраысь моз ызнитіс керка вевт вылас, быдөн гөгөрвоис — мыськовтас бур ног.

Пызан сайын лөньомны, кывзёны му выльмөдан тайё шыяссө. Коль видзөдө өшиняс, аддзё, кызди стеклө мөдар бокөдыс ульөбөн киссьё ваыс. Сандыр казялө: вокыскөд мыйкө лои. Мөдыс «сувтөдөма-пыкөма» синьяссө өшиняс, вывлань видзөдлас, кытысянь медсясө и кылө зэр шыыс.

— Сандыр, Микаль, ме өд кыла зэрөмсө! Энлө!

Чөв олөны. Сэссия:

— Зэрө! Зэрө! Ме кыла зэрсө!

Коль сувтө да котөртө ывлаас, зэр улас. Сийө нюжөдө кияссө вывлань, чужөмсө вөчө зэрланыыс и. А зэрыс мыськө Кольөс, ставнас мыськө юрсянныыс да кок улөдзыс, быттьө важъя буссө вылыссыыс нуө-пожъялө, быттьө дзикөдз мыськыны көсйө ыджыд пөжарас сибдылөм котшөс дуксө.



ВИСЬТЪЯС



ПУРЗЬОМЫН АР ПОМ

Квайтөд классянь нин Митрей дядьö, мамлөн рөди-мөй вокыс, быд гожом пондiс кыскавны аслас Пурзьöмас пыж ныр видзысь пыдди. Кутшөм, шуö, тэныд пионерскöй лагерь, чери колö кыйны. Помалi дас класс, да öни гожöмыс и арыс аслам. Гожöмнас öтчyd кайлим Пурзьöмас, но, шуö, школаö кө сэсся пырны оз ков, ар помланьыс на кайлам. Но сэки Митрей дядьöкөд эз удайтчы ветлыны. Вои сы дорö, а чемодан пыртöма.

— Со,— висьталö,— курортö мөдöдчи Серегövö. Мырдөн путёвка вöзйисны. Шуöны, сотчас, он кө босьт. Думьшти да, мися, ветла инö нэмөн öтчyd, мед мавтласны коскөс сьод няйтнас, оз-ö кокниджык ло.

— А Пурзьöмыд?

— Таво кежлö менам сийö оз нин ло. Катан öтнад. Юыс тэныд абу нин дзик тöдтөм, а кыйсыны пондан Епим дядькөд. Сийö тöдö, сёрнитлим да, көнкö виччысьö нин тэнö. Ме керкасянь сы дорөдз верст кызь на колö катны. Сэни лёк кось на эм öти, визув да кытшльöс, но тэ öд мужик нин, он жö повзы. Эн сет сöмын пыж нырсö вомөн бергöдны.

Епим дядькөд ми омöля вöлим тöдсаöсь. Сийö пöшти эз и лэччывлы аслас вөр керкаысь. Но, висьталöны, гажыс пö тай вошлöма жö йöзсыс. Волiгьясас пöттöдзыс сёрнитас, юасяс-висьтасяс. Сямыс и, кыв-ворыс и мортыслөн

та вылө тырмис. Мед көть кытікө и ылөдас, а збыль туйö чайтан, эскан.

Ефим Андреевич торйөн нин радейтлөма казътывны ассыс томдырсө, медводдза муслунсө. Муна сы дорө, да, гашкө, мыйсюрө и висьталыштас меным арся кузь рыт-войсө коллялигөн. Мый ещö тöда Епим дядь йылысь? Гражданскöяс вөлöма краснöй партизанөн, а бөръя война вывсьыс воас Краснöй Звезда ордена да пу кок пöла. Нэмсö вөралöма да чери кыйöма Пурзьöмын. Пурзьöмас жö и кувсяс öти тулысö, но оз керкаас кув, а пыжас петö лолыс. Казялас, буракö, ассыс жебмөмсö. Эбöсыс вөлöма на сөвны пыжас да йөткысьны берегсьыс. Пыж нырас гөрд дөрөм домас, мед ылысянь аддзасны. Чери кыйысь-яслы и кылалö пыжыс. Епим дядь пыж шөрас гатшөн куйлө. Синъясыс восьсаөсь — некодлы вөлöма пöдлавнысö. Код тöдас, дыр-ö сийö тадзисö кывтöма, но лов петигас аддзöма пыдöстөм тувсов енэжсö. Кокниа бырöма...

Черыс первойсö эз шед. Кулөмö оз пыр ни боталöö оз пышйы.

— Эз на көдзав ваыс,— шуö Епим дядь. — Посни ю-ельсьыс эз на лэдз сир-комсö.

Сöмын налимъяс шедлöны корсюрö аслыным пуны. Ефим Андреевич на вылө скöралö:

— Бара нин этийö лекторйыс суйсьöма.

А скöралö сы вöсна, мый налим кодь сеть дзугысь сэсса абу некодi. Пырас да зэв ёна пессьö, весиг сюрöсьяс-сö юкөртас.

— Сөйнысö эськө ничево да,— шуö.— Небыд сылөн яйыс. Кольöм во налим кыйли боталöö — нэм сэтшöмыс эз сюрлы. Дзик сöмын юрсö керавли, да со этийö пöртас тырыс лоис. Первой лун джынсö ме сийöс боталöсьыс мездysi, а сэсса юрсö пуи да вильöдчи рыт помöдзys.

Со кутшõм шедлис — быдса лун колис менсьым.

Олам инõ олам, ар пом виччысям. Лун мысти пас туйсõ видзõдлам, шõрипов сийõс юким да. Ме катыдладорсõ гõгõрта, пыжнас кая да. Епим дядь керка дорсянныс ветлõдлõ. Сәти сылы кокниджык протеза кокнас. Найõ водзджык мõдõдчасны Пулякõд. Мõд пон на эм, Дама, куим кока. Аслас жõ пуктылõм латшõг капканõ пырас кольõм во, да сõтнысõ ковмас шуйга водз коксõ. Дамаыс кытчõдзкõ колльõдас кõзьяинсõ да Пуляõс, бõрõ бергõдчас. Кокния олõмысла õни сийõ тшõгõма, да мыш вылыс вожа.

— Лыйны эськõ кõсийлы, да лолõ эз ләпты. Зәв ласкõв понйыс.

Рытьясыс вõр керкаад кузьõсь, квайт час бõрын пемыд нин. Лун югыда уджсõ уна он и вевъяв вõчны. Шум, сетьяс кõ дзоньтавны-лõсьõдавны. Но мян тайõс важõн нин вõчõма, кос вылын кõtь видзам-а. Ефим Андреевич сетьяссõ ваын оз сисьты, кор чериыс слаба шедõ. Сәки на õд капронысь кыõмторйыд зәв геждõ вõли.

Рытсõ пач ломтылам, чай кыкысь заваритлам. А мый сәсся вõчны? Пырõма кõ, тар-дозмõр куштам. Чай юõм бõрын Епим дядь заводитõ бритчыны.

— Мый нõ,— юала,— вõрын олан, а тош он быдты?

— Абу любõ сийõ меным. Дай ме абу том морт тош новлыны. Менам ыджыдджыкыс, Педõр, воис õтчид ме дорõ, татчõ и воис керкаас. Уска и тошка. Тайõ, висьталõ, õни модаын. Шырны тшõктõ, но эз кывзы. Думайта, ладнõ. Узигõныс бергõдчис тошнас стенланьыс, а ме чагйысь клинтор вõлыштõ да тувйыштõ сийõс стен потасõ тош помнас тшõтш. Коркõ сәсся мõдар бок вылас кõсийс бергõдчыны, а оз вермы, тошкыс оз ләдз. Батьõ, шуõ, эн шмонит, вай тошкõс. Вундõ сәсся ножичõн тош джынсõ, а асывнас õстаткисõ ачыс шырис.

Чайсõ Епим дядь юõ крепыдõс сакарторсõ ичõтика

курчаломён. Юмовсö оз радейт. Бурджык, эм кö сылы шома кампет. Этійöс, шуö, подушечнойсö ёна радейта. Но оз куритчы. Ме пета жара ломтöм керкасыс ыркöдчыштны, пукся увъя кыз пекиль вылö, кодöс кольöма поткöдтöг медводдза кöдзыдöдзис, да кывза пемыд чöвлөнъсö. А мый и кывзан, кор гөгөр шы ни төв. Гожöмын кö, тайö кадас лэбачьяс на шыалöны либö юас чериыс тельснитлас-петалö. Тöвнас кö, кöдзыдыс керка пельöсас тшукöдчылас да трачпетлö. Тулысын и сёрни абу: став вөр-ваыс гыö. А? Со мыйкö кылö. Керкасяньыс кылö. Тайö Епим дядь бритчöма да бритвасö шоныд ва стöканын пожъялö-клёнöдö. Петис гудыр васö койыштны стöкансыс.

— Пыр сэсса, ыркыд тай ывлаас. Оз-ö кодзувъяс тыдавы и... Кöдздöдас тавой.

— Пуляыд кодöскö увтö, Епим дядь.

— Дугды, кыкнанныс танöсь. Ноко, ноко? Эсійö тöдлы, дзик и пон моз кужö увтны. Тайö сюзь тадзисö горзывлö. Сійö öд быд ногыс кужö. Дзоля кага моз бöрддзылас и, кöин моз омлёвтлас и. Сэтшöм жö артисталысь байдöг на эм. Коркö том дырйи кыв вошлытöдз байдöгъясыс повзьöдисны. Койт вылын öтнам вöли. Бипур дорын пукала, югдöмсö виччыся. Вугыр босьтис — нинöм ог вермы вöчны. Сидз быттö йöймыла жö-а, дзикöдз унмовсьны ог лысьт. Друг кодъяскö лёкысь горöдчисны-чирöстисны. Кутшöмкö вуджөръяс биас суйсьöны, ме дорö локтöны. Бёрдöны, горзöны, сьылöны. А сералöны дзик морт моз, вак-вакөн. Ме кызд пукалi, сидз пукса и кутi бöрыньтчыны бипурсяньыс. Найö кызд волисны, сидз и вошисны. Бать бöрына-нас висьталiс, байдöгъяс пö кыпöдчылисны нюрсыс би югöрас.

Некымын пес и пуктылим пачас, а керкаас жарыс. Епим дядь пöрччысьны заводитö водöмвыв. Протезсö разис.

— Тайӧс ӧні войтырыс бура вӧчӧмаӧсь, кыв абу. А первойсӧ вои, да лёк протезнас, пу тувнас да велавтӧгсӧ ньӧти эг вермы вӧрӧдыс ветлӧдлыны. А сьӧлӧмӧй кыскӧ, ог вермы вӧртӧгыс. Сы вӧсна, гашкӧ, шог пальӧданасӧ румка пыдӧсысь заводитлі корсьны. Карактерӧ коднам торксис. Сэтчӧдз вои, мый, унмовся да, пу кокӧс гӧтырӧ вӧлі разяс да дзедас. Ӧти кок вылад сӧсся уна-ӧ чеччалан. Детинкаыс аслам ӧтчид книга вайис. Летчик йывсьыс тай. Маресьев али мый? Но вот, шуан, бур книгаысь мортлы пӧльза абу. Первойсӧ эг эскы. Кыдзи сідз? Мортyslӧн некоднан кокыс абу да самолетӧн лӧбалӧ, а менам быдса кок да лызь вылӧ пола суетны. Но и быть ковмис кодарӧкӧ ӧтарӧ думыштны. Либӧ ки креставны, либӧ лазасьны да вӧрӧ. Медводз тайӧс керкасӧ тшупи. Гортсянь матынджык ветлӧдчыны пыжӧн кӧть лызьӧн. Пу кокнас бура дыр вӧралі кытчӧдз выльӧс эз мӧдӧдны. А тайӧ коймӧд протез нин. Тайӧ, гашкӧ, и нэм помӧдз нин сӧсся.

Епим дядь водӧ гатшӧн кӧр воль вылас, нюжӧдӧ кок пӧвсӧ.

— Но сідзкӧ,— юалӧ,— мый кутам аски вӧчны?

— Меным некытчӧ тӧрмасьны. Чериыс ӧд шедас кӧ, ладнӧ, оз кӧ шед, мӧд ладнӧ. Меным мед тані вӧр-ва вылас олыштны-а. Мый сӧмын тӧянӧс дзескӧдӧмыс.

— Кутшӧм дзескӧдӧм? Татчӧ, тӧдан-ӧ, мыйта йӧз чукӧрмывлӧ, морт дасӧдз узыласны. Тулыснас, кор моторӧн пӧшти йылӧдзыс воан, тані ветлысьыд уна. Быдӧнлы колӧ ас чери-яйыс. Мед нин, шуам, ас войтырыс кыйӧны-олӧны, вираныс нин сійӧ да. Но ӧд бокӧвӧйсӧ зӧв уна пондӧсны вайӧдны. Миш Миколлӧн куим зять, и куимнанныс татчӧ быд тулыс локтӧны, пинь уланыс ӧтчид-мӧдысь сюрлӧма да. Ӧтиыс весиг кытыськӧ Гомельысь воывлӧ. Сійӧ и мукӧд зятьясысь на горш. Керка дорас кодӧкӧ тшукас нӧшта пыжа, сійӧс тӧрзьӧм и босьтас. Миколыс висьталӧ,

тулысбыд пö кыйсьöны, да весиг сир бöж пуны вöля оз сет. Кывтігас татчö век тшукласны чай юны. Гомельсаыс öдйö кывлыяс: «Ну-ка, папаша, угости солёненькой». Со кутшöм йöз эмось. А таво, кылан-ö, зэв тешкодя налön артмöма. Миколыс жö висьтавліс. Кык участкөвöй на дінö воасны. Отиыс рыбинспектор, мöдыс милицияысь. Миколыдлы, гашкө эськө и, нинöм эз шуны. Промысловик да чери-яйтöг кө пондас овны, йöз серам. Но зяттыс сәні. Кылöд нин сәсса, шуöны, зяттьö, водзвыланым и кывтöй. А мый? Налön право. Чери кульман кад, месячник, то да сё. Сәтысь нянь сёйöны. Сәтчö жö зяттыслön ружьё, а вöралан кадыс колис. Мöдöдчасны. Мыйтакö кывтасны да пырасны пыжнаныс ёль потасö. Дзевсясны, мед бөрö сәсса катны. Мöдлапöвсьыс бузнитчöм шысö зяттыс и кылас первой. Видзöдласны рос пырыс: наладорö йöра уйö. Зяттыс кватитас ружьесö. Миколыс шулас на, нинöмла пö гожöм улö та мында яйыс, эн лый. Абу кывзöма. Сәтшöм-ыслы мед лыйны-а, төв да гожöм оз юав. Йöраыс казялас морттö да бөр бергöдчас. Васыс петö, да лапта вылас пыркöдчанінас и суас сійöс пуляыс. Миколыс висьталö, йöраыс пö мытшкысис водз кокъяс вылас, но эз пөр. Найö öдйöджык петöны пыжнаныс да сы дорö. Йöраыс сувтас, но мöдысь оз лыйны, виччысьöны, кор сійö ас ки-кокнас баддяс пырас йöз син водзысь, да мед эськө кыскыны эз ков. Тані и моторныс пондас кывны инспекторъясылön. Сё пакöсть, суасны кө лыйöм йöра дорас. Найö öдйöджык бөр асланыс ёль потасö. Йöраыс сулавны и кольöма лапта вылас. Дерт көнкө, думайтісны, мый сәтшöм войтыр да оз жö вөрзьöдны йöрасö. Мый кывтігмозныс нимкодясьыштасны вöрса великан вылö и ставыс. Пыж нырсаыс одностволкаысь лыйис, мöдыс двустволкаысь дуплетön. А ми, шуö Микол, сöмын видзöдчим мöдлапöвсянныс, кызди кулисны йöранымös, керавлісны да пыжас сөвтисны.

Пыжныс пö сідз нин тыра вөлöма чери-яйнас, а кытчöкө быдса йöра туша на төрөдöмны.

Сідзкө, талун туйö. Тадзи ми рытсыяныс на сёрнитчим Епим дядькөд. Босьтам, шуö, вежон кежлö чай-сакар-нянь да катам бать керкаөдз, Пурзьöм вуджасөдз. Пет-көдла сійö местаяссö, көні менам медся бур кадыс колис. Оні сійö нянь пöжалö. Шомөссö тэчöма нин скөвөрөдъясö да кыпөдöма джаджйö, шоныдінас, мед бурджыка ловзяс-лыбас пачас вештытөдз.

— Ог төд,— шуö,— эз кө кизьöрджык ло. Но öні нин сэсса мый, кутшöм лоис.

А пачсö ломтіс бура. Жарыс пö татшöм пачьясад дыр оз ов, кирпичыс этша, кутöдыс абу. Слаба кө ломтан, и няньтö оз пöжав. Меным тшöктіс сеть-боталөсö лэччөдны пыжас, бакъяссö бензинөн тыртны, «Стрела» моторсö заводитлыны. Быдлаті, шуö, моторнас он во, а кузь вомынъястыс шойччөдас.

Войыс збыльыс көдзыд вөлöма, пужъявлöма бура зэв. Век на гөгөр ставыс еджыд, быттö бур лым палькнитöма. Сöмын пес поткөдланінас, кос чаг вылас, пужъяв-төм кык ді эм. Тані понъясыс узьöмны. Вадорас тожö лэч-чылöма көдзыд войыс. Берег визьсыяныс весът-мөд вöсны-дик йи кынмöма, а ва сайясас, лөнинъясас, дерт, пурт тыш кыза йисö вольсыштыліс нин бура шөрөдз.

Епим дядьлөн петöма пöсь нянь. Дорсьөдöма тупөсь-яссö пачдор лабич вылас, вевттöма ки чышкөдөн.

— Сола чери пыртлам,— шуö,— да макнитлам рөсов-сö небыд няньнас.

Вайис сэсса пөгребсьыс кык ыджыд ком, вундыліс гырыся. Рөсовыс гөрд, сук, нянь торнас тшукөдчылан, да ма моз кысъялö.

— Солыс тай меть,— шуи.

— А меным кө тайё эськё и соладжык нин, но гожся кыйём, да дуб чериён кольччыны он лысьт. Ме черитё бура солала, ог дуксьод. Аддзан, комыс гөрд, быттьо сьёмга, абу тай лөзөдөма. Сэсса личкыны колё бура, мед рөсовыс из вывтёис вөлі, да не вөрзьөдлыны. Дерт, быд лун кө чериад гудыйсян, тшыксьытөг оз ов. Татчө бара Миколөс жө и казтыла. Нэмсө кыйсьө, а чери солавны да кранитны эз велаплы. Ертасям, да на ордө ме гежөдика ветлывла. Кильчө дорас вотөдз на нырө кылас — верөсыслысь дука черисө көзьякаыс пачас вештөма. Трубаөдыс дукыс петө. Тшыкөдөм вылө черисө кыйны эськё оз и ков. Мый сыысь, понлы ни порсьлы кө.

Мотор дорас ачыс Епим дядь, а ми Пулякөд пассажирьяс. Понсө позьё вөлі эськё и подөн лэдзны, но ылөдлыны пө кутас мянөс и асьсө урьяссө вөдитөмнас. Вөралан кадыс сылөн водзын на.

Ыджыд изья воис. Тадзи и шусьё тайё местаыс. Километр кузьта да пасьтала юсө кодикө быттьо изьяссө вывсьянь тэчөма. Мукөдыс тыдалө, унджыкыс оз. Көні ваыс вомлөгалө, сы серти жө казялан-а. Катим нин пөшти, и колө жө медбөрья из вылас кайны. Эг бокнас ли кызд, а веськыда кокоранас. Пыж нырыс вылын лоис. Видлим бөрө йөткысьны — эз артмы. Епим дядь тшөктис меным ёнджык зібсө босьтны. Тэ, шуө, ётшкы зіб помсө пыж горулас да берт өчапөн моз, а бөжсө ме моторнас видла. Исковтис пыжыс боквыв, но исковтёгас ёна доровтчыліс да, повзылим жө.

— А ме тайё изсө эг и чайт нин татысь да ог и видзөд. Тэ инө мый вылө сәні? Коднымлыкө видзөдны колө.

Ме быттьо и төді, мый сійө оз видзөд.

— Со этійө мег саяс Миколлөн керкаыс. Тшуклам сэтчө чай юны. Ачыс абу эськө да, гортас на. Колө нин сылы воны. Кулөмъясыс ваын, лэчьяссө сиалөма. Ме ог төд, кызди сійө вермө тадзисө.

Керкадор берегыс алыкёс, кёжа, кайнысё абу крут. Пыралім керкаас.

— Тани өд сылөн гөр да агас сёмын абу. Колё коть оз, ставсё татчө кыскё, а пач бокас дас-мөд кирпич катөднысё дыш. Кымынысь нин висьтавлі.

Керкаыс ыджыд — морт нель-ө-вит төрас узыны. Гө-гөр джаджъяс тувъялөма, мукөдлатыс весиг кык судта-өн, а истөг куд пуктыны некытчө. Став джаджыйс тыр склянка-банкаөн, гырысь и посни кудъясөн, кытшьясё гартөм сутугаөн, ку зэвтан пөвъясөн, разной инструментөн да запчастьён. Торъя джаджыйн журналъяс. Унджыкыс «Вокруг света» да «Войвыв кодзув.»

— Лыддысьё на, тыдалө? — юалі.

— Радейтө. Уръяссө кульны вунөдлас. Коми журнал-ас, шуө, ме йылысь частө гижлөны, сёмын мыйлакө нимөс вежөны. «Вокруг светасьыс» небыличаяссө лыддьё да Африкаын вөралөм йылысь. Со, шуө, кытчө миян тэкөд колё слөймөдчывны.

Чай юны лөсьөдчим ывлаас. Пызаныс пыдди кыз ниа дін пекиль. Татшөм добраыд быдтор вылө туйө — коть яй сы вылын керавлы, коть чери пөтрөшит. Епим дядь вештө чай кружкасё бокөджык, мед пө кодзалыштас.

— Миколкөд ми уна во на пару вөралім. Бурджык ёрт йылысь нинөм вөлі и думайтны. Кок йылас варов дай сьөлөма, абу горш. Сы вөсна и зверь-пөткасё Енмыс сылы воча мөдөдө. А кодлөн горшлуныс вөсна ки-кокыс заводитө тіравны, лыанторсө аддзас да, пармаын сылы вөчны нинөм. Коркө өти төлө йөраыс ёна вөлі, да миян содтөд лицензия сетлісны. Асывнас петім керкаысь, тани жө сэки узим, юалө Миколыс, кылан-ө пө, кырнышьясыс крунскөны? Но и мый, шуа, найө быдлаын крунскөны да. Оз, оз, висьталө, тайө дзик мөд ног шыалөны. Йөраяс ли көръяс сәні эмөсь, да миянөс начкыны корөны. Налы өд

тожӧ пай вичмас. Мунім, а нюр вылас збыльысь кӧръяс лэччӧмаӧсь, дас кымын. Яйсӧдісны сэки мянӧс кырнышгьясыс. Интересной морт. Лыддысьныстӧ ёна горш. Ас ногыс сэсся висьталас меным, мый лыддяс. А ӧтчид мый висьталіс, кывзы. Ог тӧд, аслыс юрас татшӧмторйыс воӧма ли, кытыськӧ лыддӧма ли, ог тӧд, ог тӧд. Сёрниас воим шонді йылысь да планетаяс йылысь. Тӧвся рытьгьясыд кузьӧсь — быдтор сёрнитны вевъялан. Менам кӧть образованиеыс абу ыджыд, а планетаяс йывсьыс мыйсюрӧ тӧда. Комынӧд воын мянӧ учительӧс мӧдӧдлісны, Андрей Васильевич Ольшановӧс. Уна жӧ быдтор тӧдысь морт вӧлӧма. Ми, томджык мужикъясыс, быд рыт вӧлі сы дорӧ мунам. Вой шӧрӧдз оз лэдз — век мыйкӧ висьталӧ. Сэсся и асьным юасям жӧ. Сійӧ и висьтавліс мян планетаяс йывсьыс. Миколыд сійӧ ме дорын, дерт, учёнӧй, уна лыддӧ да. Но вот, шуӧ Микол, шонді гӧгӧр планетаяс бергалӧны, а ӧти вылас ми олам. Мукӧдас климатыс оз лӧсяв овнысӧ — кӧні вывті кодзыд, кӧні вывті жар. Ставыс тайӧ шусьӧ солнечной системаӧн. А тӧдан-ӧ, юалӧ, татшӧм системаыс со этійӧ няньторъяс, кодӧс ме ӧні нылышта пӧсь чайыскӧд? Лыдтӧм-тшӧттӧм. Быдса вселенной. Кымын атом, шуӧ, сы мында и солнечной система. Ядроыс шондӧн лӧӧ, а электронъясыс — планетаяс. Гӧгӧрвоин-ӧ, юалӧ. Мый ме, мися, татысь гӧгӧрвоа. Сідзкӧ, шуӧ, водзӧ кывзы. Мыйла кутшӧмкӧ электрон вылын олӧм абу, планета кӧ сійӧ? Зэв на и вермас лоны. Сӧмын сәні став олӧмыс ӧдійӧ мунӧ. Тэа-меалӧн син лапнитігкості быдса галактикаяс чужлӧны и кувлӧны. Со ӧні, висьталӧ, тайӧс няньторсӧ ме гӧтшкыны заводита, а сәні, тыдавтӧм мирьясас, вӧвлытӧм катаклизмьяс кутасны мунны. Виль кодзувьяс вермасны чужны и быдтор.

— Да-а,— содтӧ Епим дядь.— Со ӧд кытчӧдз мортсӧ вайӧдіс фантастика лыддӧмыс. Сэсся на ӧд Миколыд

висьталіс, мый миян Муным тожō ѓд электрон налы, кодъяс ѓти пѓрадок вылѓ миянысь вылынѓсь. Кодікѓ, шуѓ, ѓні миянѓс вом дорас жѓ вайѓдѓма сакарын ли няньын да ньылыштны видзѓдѓ. Но тѓ пѓ та вѓсна эн шогсьы — пока сійѓ вомсѓ паськѓдас, коляс уна миллион во. Серамыд сѓсся петѓ али оз Микол вылѓ. Мукѓддыйри ме сійѓс академикѓн шулывла, да сылы любѓ, шпыннѓлѓ сѓмын. Но, вай чукѓрт мешѓкад да йѓткысьны колѓ. Туйыс кузь.

— А ме мотор шы кыла.

— Кытысянь кылан?

— Со сѓсянь.

— Сѓтысянь и колѓ кывнысѓ, Кутш Позъясянь. Вѓс-тас кѓ ѓд матын, а катнысѓ куим час колѓ. Тайѓ Микол. Некодлы сѓсся ѓні, ар помын, тані ветлѓдлыны. Виччысь-лам али мый?

— Меным ѓткодъ. Виччысьны кѓ, узыны тані ковмас. Вой улас ѓд он вѓрзы.

— А мый не узынысѓ дась керкаын. Но чай юны ѓд бара ог пондѓй, чери кыйны заводитлам. Катыштам неуна да мѓдлапѓвса лапкорсѓ позѓ кузяла ботайтны.

Лишнѓйсѓ пыжсьыс ректѓм кѓж вылас, колим сѓмын кык боталѓ. Лѓсьѓдѓм найѓс чѓвтѓм выв нин, ѓтлаѓ йитѓм да. Йѓткысим сѓсся катчѓс. Моторсѓ эг заведитлѓй, мед не торкны чѓв-лѓньсѓ.

— Талун сирыс кайис татчѓ. Думайта, кольѓм ар Миколкѓд татысь уна жѓ кыйлім. Ставыс и ѓткодъ, сой кузя метъ.

Мича жѓ нин таво ар помыс лоис, косѓдѓс гожѓм-быдъя шливгѓм-зѓрѓмсѓ. Шондіа, лун тѓв пѓлялѓ. Тѓвсѓ вежтѓдз тані смела позѓ овны да чери кыйны. А пѓльыштас асывсянь ли асыв-войсянь, эн нюжмась вѓрзѓѓнад. Шугаыс ѓти войѓн ю тырыс пондас кылавны. Сѓмын на кынмѓм йиыс зѓв лѓчыд дора, пыж пыдѓссѓ сѓйѓмѓн сѓяс.

Кык-куим лун кө кывтны сэтшөм шугаёдыс, гортад пыж-төг воан. Мёд во кезлө сійө оз нин туй. Сэтшөма йиис керавлас, мый пыжтө ковмас ва бөр лэдзны.

— Миян лун дас кө сетас кыйсыны, — шуө Епим дядь, — сэсса нинөм оз ков. Сирсө кыям.

Тайө лапкор дыс збыльыс бур вөлөма. Сирыслы кывтчөс некытчө зырөдны — көж нөрыс сорө. Шөрланьыс да катчөс петан туйсө боталөнас помам. Сэсса боталөтө чөвт, сапөг чөръястө кыпөдав да лэчы турунас, бузөд ньылөдтөдзыд. Сирыс өні, көдзыднас, рам, оз ёна окотит вөрзыны места вывсьыс. Та вөсна и бузөднысө колө, кытчөдз пель сайыд оз вазы. Ме көрт пома пелыссө босьтө черисө вөтлыны. Изйө кө веськалан сійөн тшукөдчывны, медся дыш сирыс вөрзяс. Дзик кок увсьым өти зырөдс, төкөтьө эг таяв. Абу ыджыд вөлөма — дзугсис, да табсө муртса вөрөдыштө. Епим дядь шөрөдыс мунө, боталө дорсьыс раммөм сиръяссө гойкөдө. Вөтлім, тыдалө, бура унаөс — табйыс тай кузяла пондс вөрны-а. Өти ён шедс, боталөсө ю шөрөдзыс петкөдліс, эз кө поткөд да мун.

Кыйны сэсса пондс. Епим дядьлөн крукыля чуньясыс быттө сы вылө и эмөсь, мед сетьыс чери йөрлавны. Пондс шыблавны пестерас өти бөрся мөдөс. Ыджыд сирөдзыс воим.

— Абу көть на поткөдөма, — шуө.

Сійө чегъялө сирыслыс мыш вывсө, мед эз туркьяв, да первой пиньяссьыс мездө сетьсө, а сэсса выльөн колө корсьны ладсө.

— Тайө на мый, ёс, — висьталө ноксигмозыс. — Неуна катыдын ичөт ю усьө Пурзьөмас, Пежъя. Сэтчө ме тшуп вөчлі вояс сайын, гымгаөн кыйси. Сійө арө меным сэтчө сир вөлі кывтөма — веритан он, со та мында на кузьджык гымгасьыс. Мыш вылыс вөлі нитшсялөма нин, сэтшөм

пöрысь. А яйсö эг вермы сёйны, понлы верді. Вывті чорыд.

Гырысь черинас и пестерыд öдйö тырö. Куимысь и чöвтлім, а пестерас эз нин кут тöрны.

— Гырысь чериыд сійö öдйö бырас. Кыйöм дыраыс кө тырмас и. Но ме нöшта сё килограммтö сдайтa, пöжалуй. Договорсö век на сдайтлі, чери көть пушнина.

Ботайтчигмозным эг и кывлöй, а Микол воöма да горзö мöдлапöвсянныс:

— Мыйла менсьым сирьяссö кыянныд? Аслым али мый оз ков? Солатöг али мый кольчча? Вуджöй варола, сёрни эм.

Вуджим. Микол дорöсас миянöс виччысьö. Пöрысь-джыкөн ме сійöс чайті, зятьяс пö нин эмöсь да. Ичöt тущаа, а гөлöсыс кыз, бувгö. Лыыс да куыс сöмын. Но тадзи первойсö кажитчö. Бура кө видзöдлыны, мортсö тайöс вөр-ва сынöдыс косьтöма-жаритöма да сөнъяссö зэлöдöма ньöла вуж моз.

— Сісь Кötшас горувті ката, а меным паныд кытыськö нитш кылалö. Сэсса дум вылам усис: кötшас юрас менам лэч пунктöма, дзик берег дорас. Сэтысь и нитшыс лэбö ваас. Тшукöді пыжös, кайи. Тöv паныд и быдөн муннысö, кок улын рутш ни ратш. Аддза: мошкоритчö ошкыс, матігö-гöрсö ставсö нин рöйтöма. Кватитчи патронъясам — пуляыс сöмын öти, весиг мöд стволас йötкыны абу. Эг лысьт вошйыны. Лэчкö пырöмыд сійö абу на гуысь вötлөм кодь. Вывті лют сійö. Кывтлам, гашкö, Епим?

— Кывтлам, дерт, лэчкас ог сісьтöй. А тэ, Сандыр, сирьяссö кырышт да пу черисö. Ми регыд ветлам.

— Ош вылö мунігөн тадзи шуасны öмöй? Регыд пö ветлам. Быттö и абу лöсьыд пöрысь мортсö вомавны, а быть шу... Арся ошкыдлөн öні яйыс бур, сельпоö примитасны.

— Лыйтöг эн пу.

— Сідз эськө да.

Тайояс велалөмаось нин öта-мөд дорас да оз бөрйысь-ны кывъяснас, кызд колө сёрнитны.

Кывтісны кык другыс, а ме черысла лэччи. Сир пестерыс öтпырөн эз шед, мөдысь ковмис лэччывны. Пөвсө корси, Миколыслысь чери пөтрөшитан пөвсө, да пукті ниа пекиль вылас.

Быд черилысь рушкусө кырасны керигас, а сирлысь мыш вывсө поткөдасны кузяла юрыскөд тшөтш. Мыйла тадзи, быдөн оз на и төд. Сирыд, сійө быд лекторсө нятшкө: лельюясөс и, лягушаясөс и, а ва вурдысь кө, сылы медся на чөскыдторйыс. Көть и пөт мукөддырйиыс, а синмыслы колө, быть вылө тшапкас. Кытчөдз оз тшыгъяв, прөмыссө вомас видзө. Юрсө кө вывсянь он поткөд, лельөсө ли лягушасө вомсьыс он аддзы, пуны веськалас.

Век сідз — первой гырысьясыс сюрёны кернысө ки улад. Ньюжөдан сійөс юрнас асланыд да лэчид йыла пуртөн кырыштан юрсяныс тытчаньөдджык. Кырөминтіыс рушкусъыс газыс чушнитас-петас. Сирыс ки улад нильөг, сідз и видзөдө пурт увсьыд исковтны. Кор вундан кузяла юрсө и ставсө, да сирыс паськалө öтарө-мөдарө — сюв и не сюв, ставыс лоө эрдын. Пөк-нексө, ты-муссө торъя тасьтїө бөръян. Солалан бөрнас да некимын лун видзны колө. Сэсся позьө сейны, а верман и гортсаяслы гөснича пыдди нуны. Кодлы абу дыш, позьө сювьяссө поткөдлыны, бура мыськыны пуртөн гуркөдөмөн да сэтчө жө нек-пөкас негырыся шырлыны. Солассяс, да сыысь чөскыдторйыс сэсся оз овлы.

Юква менам дась. Черисө босьталі пөртсьыс ыджыд тасьтїө, мед оз рабзы вывті. Солыштї вывсяньсө. Другьяс абуось на, и моторныс на весиг оз кыв. Лыйөм шысө тай мыйлакө эг жө кывлы да? Сэтшөм ылынось али мый?

Кадыс кө эм, ме быд пөрйө кытшовта керкадорса

вөръяссө. Лэччылі пыжас, босьті чер да көрзина. Думышті жө кытшовтны, оз-ө пакула ёкмыльяс сюрны. Мам на мөдөдчигөн казытыліс, өктышт пө. Миколыслөн тай, өти кудйысь аддзылі, зэв уна косьтөма, позьө и корыштны. Но сылы өд, гашкө, сдایتны колө, промысловик да. Ме өкта сылы, а коссө вежөн кора.

Матын керка дорас сэтшөм кыддзыс и абу. Ставыс том кызд, шуласны на — выль туту. Матынджык быдмысь козьясыслысь Миколлөн дінъяссө вольөма — пес вылө косьтө. Неуна тыдалана туй визь вывлань нуөдө. Тавой кынмылөм нитшыс абу на сывлөма — карчкө кок улад. Яг вылыс матын и вөлөма нин, со тай, но меным сэтчө нинөмла. Сёна-яга косттыс сетчи катчөс, көні кызджык кызьяс тыдалөны. Өти кызд. вылысь пакуласө ылысянь на аддзи, но вывті вылын. Мед нин чернад он судз, но улынджык кө өшаліс, и то позис кавшасьлыны. Но мед, ещө корся. Аддзи эськө, и ёкмыльыс абу ичөт, и чернад судзан, но кыддзыс тшака, сісь. Оз ков татшөм пакулаыд. А со и нёрөм кызд, ёкмыльыс вылын, но татчө кавшасьлыны абу на мый. Босьті кызсө кок костам, сөтышті черсө пу чөръяс кызд позьө вылөджык, кыскыси чер дорөдзыс. Сэсся бара сөті, бара кыскыси. Кыддзыс лайкъялө ме улын, пола. Бур сійө, мый пакулаыс бокас да керавнысө кивыв лоас. Сөтлі өтчыд-мөдысь да ог шу, мый вывті кокниа пондас шедны. Уль пакулаас черыс сибдылө, сөтан да. Сэсся ставсө ки пөвнад колө. Сө ньылөм киссис та пакулаөн. Медбөрын усис, да бөрвывтыс и черөс шыбиті. Думаyta, аслым шыбитчыны жө али мый, эбөсөй эз жө коль лэччынысө-а. Ог, ог шыбитчы, колө кызкө исковтны. Нөштаыс көть и вылын жө өшаліс, но шедіс таысь кокныда. Дзик орччөн коз вөлі быдмө, да сэтчө кавшасьлі, өдйө тай уськөді пакуласө. Меным сэсся тырмас.

Керка дорас лэччи, другьясыд менам дорөсас, көж

вылас ошнысö нин кульöны. Кыла, мыйкö варовитöны-а, мый, ог гөгөрво. Матыстчи на дорö.

— Көн нин ветлан-мунан?— юалö Епим дядь.— Со, ми прöмысөн.

— Аддза. Кывзысьлі-кывзысьлі лыйöм шы, эг и кыв.

— А кытысь тэ сійöс кывлан, эг кө лыйлөй ньötчыдысь. Микол, висьтав, кызди ставыс вöлі.

— Висьтав, шуö. Ачyd нö мый он висьтав? Тайö абу кыйсьöм. Кутшöм нö интерес, кор ошкыс ачыс джагöдчас. Эськö сідз кө вöлі, мед тэ öтарсяньыс, а ме мöдарсяньыс локтiм. Да мед сьöлöмным йöктi морöс пытшканым. Тайöс ме гөгөрвоа — кыйсьöм. Да мед тэнö ошкыс личкыліс, а тэ сы улын горзiн лёкысь. А ме сэссия сы вылö пуртөн, сы вöсна мый лыйнысö ог лысьт, мед тэныд не веськавны. Тайö кыйсьöм.

— А мыйла нö менö личкас? Гашкö, тэнö?

— Сэки менö чашкöдлас ошкыс. Пу кокнад тэ он удит зырöднысö.

— А кызд-сідз джагöдчис?— юася ме.

— Кыдз,— шуö Микол.— Татчö катiгөн ме лэч кывтыдас тшуклі. Кор пондi водзö катны, пыжнас матi мунi, дзик берег дорöдыс. Ме тай сідз думайта: ошкыс зырöдiс мелань, усис лаб горулас дай джагалiс. Бөр кавшасьнысылөн эбöсыс эз нин вöv. Мотор дорас ме, дерт, нинöм эг кывлы. Епимлы нин висьтавлi. Кольöм арö öд тайö ошкыс менö нитшнас тупкыліс. Сылы вылö и лэчсö тайöс сиавлі. Кадыс таысь водз вöлі, кызкö сентябрь шöрын. Пас туйöс видзöдлыны кайи. Куим чукчи ошкыс сёйöма. Коймöд лэч дорас вои — ставыс гөгөр гөн. Пищальöс сувтöдi пу дорö, ачым выль лэч судзöдi да ляпкöдчи сиавны. Вежöй ёна вöлі петöма, да ошкыс вылö матька-шумита, а сійö сэн и вöлöма. Пищальсö пу дорсьыс сачкис, да сійö ылö на лэбзис кытчöкö шöри-пелиөн. Сэссия ошкыс менö босьтiс

моздорас да нюрланьыс мөдөдiс. Ме ог шыав ни ог вөр, кулөма быттьө. Он өд лысыт — абу мам моздорад. Водтiс нюр вылас да нитшнас тупкис. Думсьыс эськө менө дуксьөдыштны көсйис. Бура дыр куйли, эг вөр. Петi сэсся да лэччи пыжам, весиг пищальсө эг кут корсыны. Тайө сийө и эм ошкыс.

Кулисны вөрса көзяинөс. Тушаыс ас ку вылас на. Тшөгйис вылысас кык чунь кызта. Дерт, дзик укшальөн төвбыд кежлө гуө пырны он и лысыт. Ставнас еджыд тшөгсьыс, быттьө пасьтөм морт пөшөдчыны водөма көж вылас. Сювъяссө өнi лэдзасны, сөпсө перьясны. Сэсся керавласны яйсө да солыштасны на зэв. Делөыс көдзыдлань — оз дуксьы.

— Тэнад, Епим, яй вылө таво договор эм жө?

— Пөтка вылас эм, а йөра-көр вылө лицензия эг босьтлы. Морттуй эз ло накөд вөдитчыны. А мый тэ көсьян? Ошсө юкны көсьян али мый? Ме кылөда, сдайта, тэ вылө ставсө гижөда. Эн шогсьы, мыйысь оз ков. Черисө вот колө кыйны нөшта көть кило ветымын. Төварыш эськө со бур слөймис меным. Водзджык кө оз көдздөд, кыям.

Микол дорын узим. Епим шуис:

— Аски позьө и дырджык узыны. Сөрөнджык и вөрзам, мед катнысө шоныдджык.

Но дырсө узыны миян Микол эз сет. Чеччөма коркө югдiгас на да петөма керка стенас ош кусө зэвтны. Тотшкө и тотшкө, көрт тувъяссө тувъялө. Пырис сэсся, шуө меным:

— Ош кусө тэныд козьнала, Сандыр. Сэни карас кодлыкө вөчөд — добра лоас. Армияө ветлан, сэсся гөтрасян, челядь лоасны. Пуксьөдан дзоля питө ош ку вылас чачаөн ворсны — каканыслы шоньд. Либө спальняад койка дорад вольсыштан. Асывнас чеччан, лэдзан кокьястө — налы

небыд. Кывтігкежад төлөдас нин, шондіа лунъясыс да.

Кор вөрзим Микол дорысь, шондіыс вылын нин вөлі. Дзик шонділаньыс мунам, да ва вылас весиг видзөдлыны он лысьт, синтө ёрө. Сэссия шондісяньыс надзөник бергөдчим, бергөдчим веськыдыв, да сійө мышканым лоис. Таті ёна кытшлялө юыс. Дай векняммыштіс быттё, а косясыс лоисны визувджыкөсь. Зэв нин визувинтіыс ме сувтла да отсая «Стрелаыслы» зібйөн. Нөшта неуна катыштім да өтилаө кулөмъяс чөвтім. Татысь, шуө Епим дядь, ме век кыйлывлі. Ботайтчан местаясыс бурөсь и. Аски, гашкө, татчө и кывтлам первой.

— Ылын-ө керкаөдзис? — юала Епим дядьлысь.

Сійө нинөм оз висьтав, сөмын öлыштө кинас водзлань. Ме сідз төда, мый керкаыс көнкө сәні водзын.

Юыс кызкө друг нөшта на векняммис, а ми быттё лоим юнас и, пыжнас и ставнас дзик му пыдөсас. Тайө сы вөсна, мый өтарсяньыс и мөдарсяньыс жмитісны юсө и миянөс джуджыд чойяс. Шуйгаладорас лыа чой. Улітіыс лыаыс кутшөмкө сэтшөм пемыдруд, вывлань югыдджык лоө, а дзик нин пожөмъяс улас, кодъяс со тай кутшөм вылынөсь, еджыд. Мөдарыс нөшта на джуджыд да крут. Изйысь ли, сөйысь ли тэчөма чойсө, он гөгөрво. Измөм сөй, гашкө. Горув пластъясыс зэв мичаа тыдалөны. Найө чегъясьөмны, мукөдыс вежынь лоөма, өта-мөд вылас кайөмны. Вылын козя вөр. Нитшкыс бура улөдз өшөдчөма увлань, быттё юас көсйө визувтны. Увсянь зэв мича видзөднысө, а вывсянь кө синтө чөвтлыны кывтчөс ли катчөс? Со көні эськө, думайта, мичлуныс.

Помасьлытөм косяс воисны. Бур көть йирөсь на, некытчө винтыс оз тшуклы, мед сөмын моторыс торгө-а. Но ме тожө зібсө эг на шыбитлы кисьым. То өтарсянь, то мөдарсянь нырсө век колө йөткыны бересяньыс — кытшолөн косясыс.

— Воам регыд,— шуё Епим дядь.— Со этиё мег саяс керканым.

Кытшовтім мегсё, да керкаыс тыдовтчис и эм. Неуна вывтасінын, кыддза вöрын. Тшукуим.

— Тайё местаыс историческöй. Тані и колис менам томдырся бур пöраыс. Коркö висьтала.

Дас луннас, мый ми тані олім да кыйсим, Епим дядь висьталіс и эм сійö кад йывсьыс, сы шуан кылөн, йöзлы гөгөрвотөм кад йывсьыс. Керкаыс тайё век на сійö кад-сяньыс, батыс стрöитлöма. Йирк-джоджсö вежлöма нин ачыс Епим дядь да ляпкыд вöснаыс содтылöма кык гөгөр. Изья горсö пач вылö вежöма.

Сирсö боталöнас сэки уна кыйлім, кывтчöс и катчöс ветлөдчим. Епим дядьлөн договорыс тырис дай аслыс на сёйны төвбыд кежлö кыйис. Меным пай вылам кык бак сир вöлі вöзйö, да, мися, кыз нö сы мындасö ме кута нуны. Ош ку и. Но либö, шуö, коркö төвнас волан да бара нуан мыйтакö.

— Менö армияö босьтасны, төвнас ог нин ло.

— Воан армиясьыд да ме дорö и лок кыйсьыны. Вирным миян тэкөд лөсялö.

Вои армияыс, да сійö жö арнас и катлім Епим дядькөд Пурзьöмö, а сэсся во нель-ö-вит-эз ло менам волöмыс. Кывлі и кувсьöмсö Епим дядьлысь. Гожöмын öтчыд волі да кайлі гу вылас. Кос пожöма яг вылын куйлö, кык пожөм костö и дзесьöма. Пурзьөм вомыс татісянь, чульк вывсяньыс тыдалö. И кытысянь визувтö юыс, вөрьясыс ылөдз-ылөдз лöзалöны. Епим дядьлөн вөрьясыс.

Уна ва тайё каднас нуис Пурзьöмыс. Лыдды — кызь воөн. Пöрысь войтыр бырöны — таысь некытчö он пышйы. Со и Митрей дядьыс менам тожö нин абу, да сэтчаньясö

оз ёна и кыскы. Миколыс на эм эськө да, но сыйкөд геждо-
сө век аддзыйслам. Ныв-зятъыс тани, карас, олөны, да
воливлө на дорө. Быд волігөн менө быть вылө аддзөдлас.
Гөснича быд пөрийө вайө, ас чери. Та вөсна ме төді, мый
өні Пурзьөмас вөчсьө. Ас синмөн, дерт, эг аддзый-а. Ми-
кол сійө оз кө и пөрысьмы некор-а? Мый сөмын нөшта на
косьмөма да сьодасьөма тшын йылын видзөм ёкыш моз.
Век на вөралө да чери кыйө Пурзьөмын.

— Воны таво арсө, катлам. Епимөс казытылам. Оліс
кө сійө тайө кадөдзыйс, быть вылө эськө ветліс кутшөмкө
ыджыд дядьө дорө да лэдзліс сьөкыд кулаксө сылы пызан
вылас. Сійө эз пов.

Сы арө и думышти да мөдөдчи Микол дорө. Письмө
водзыйв гижы, мед метөг оз вөрзый. Вои, виччысьө нин,
ставыс нин дась, мый сөмын олассө пыжас абу на лэч-
чөдөма.

— Дыр нюжмасын,— шуө.— Мед нин эськө өні сэн
вөлім.

Миколлы зэв рад лой, мый вои.

— Зятъяс өні эз кутны воливлыны. Төдөны, мый Пур-
зьөмыд пакталіс, уна сэтысь он нин сөрвит. Но и ен накөд.

Важөн ми Епим дядькөд пемыдөн на вөрзыйлім горт
дорөсысь, югыдыслы воча, а өні колө югдөмсө виччысь-
ны — Пурзьөм вомөдыс пемыднас он аддзы пырны.

— Абу важъяйд өні,— шуө Микол.— Ю вомсө быд-
сөн пузувтіс, некөн розь абу. Бура ылөдз колө зібйөн йөт-
касьны.

— А мыйла нө өні друг пузувтіс?

— Эз друг. Вөрсө өд тожө эз друг пөрөдны. Көні ме
вөравлі, лөк туныс во вит сайын на муніс. Пурзьөм йывсө
өні куштөны. Вөрыс эз ло, да сы вөсна и лыасө пондіс быд
тулыс лэдзны. Тувсов васө, лым сылан васө некодлы
юнысө лой. Ставыс юас зырөдө да лыасө тшөтш нуө.

Здук кежлө ваыс сэтшөма тулас, сэтшөма визувмылас — непөштө лыасө, а посниджык изъяссө нуө. Гожөмнас пондiс дзикөдз нин косьмывны. Моторөн уналатi нин он во. Пыж пыдөсыс кык сезонөн бонзяс. А винтсө таво мыйта жуглi — тайө квайтөд нин. Эз ло ладыс кыйны ни овны.

Микол керкаөдз кык лун йөткасьөмөн сорөн катим.

— Мед, мед, — шуө, — интеллигентнөй сойястө видлис инө. Тайө тэныд абу ручкатө кык чунь костад кутөмыд. Вошөма Пурзьөмысь чөв-лөнъыс — мөдлапөвсяньыс лун и вой кылө лесовозъяслөн увгөмыс.

— Тан өд орччөн, — висьталө Микол. — Дас километр сөмын магистральөдзыс.

— Шуан тай, Пурзьөм йылын нин пөрөдчөны, а кытыськө бензопила шы кылө?

— Тайө лесхоз аслыс пөрөдө, ю-ель бокъяссө ректө. Леспромхозлы өд оз позь сэтысь босьтны — ва видзан зона. Аслыныс позьө. А быть кытыськө пөрөд — план сетөма, а ылысь босьтны мортгуйныс абу. Трактор да машина сөмын. Гашкө, и семенникъяссө нин пөрөдлөны — өти жө наысь төлкыс абу. Асьныс кө оз пөрөдны, бушковьяс водтөдасны. Кольөм арө өти семенникө лэчъяс сиавли, оз-ө мися лэбысь дозмөрыс кытчөкө өшыбитчы. Буш-колыс войнас, дерт, крепыд и вөли. Мунi асывнас лэчъяссө видзөдлыны, а көйдыс вылас кольөм вөрыс, семенникыс, ставыс водса, ставыс вужнас вылын. Вөля лоис төлыслы миян парматi гуляйтны — кутөд ни помөд эз ло.

Микол сэссия дыр кежлө думө усьлис, шога мыйкө мөвпалө.

— Вөрысь ни ваысь, другө. Чериыс бырны пондiс. А мый нө оз, мартын на йи пырыс нетшны заводитасны да. Гуяссьыс өтитөг ставсө өктасны, а тулыснас сэссия и кульмынысө некодлы. Машинаөн өни дзик ю дорөдзыс воан. Кодлы абу дыш, сийө и локтө. Но сирыс на эм миян

пай вылө. Сійөс озджык кужны кыйны воысь войтырыс. Кыйсян завод сэтчө колө и. Ме өд договорсө быд во на вөчла. Не кө сійө, боталөяснад өні оз лэдзны ёнасө лэбавны. Августнас өти бөчка сдайтлі сирсө. Бөчкасө сельпо контораас пыртисны да сэні и юклісны ас костаныс. Кельчинас на вузасьлөны, а бурджык чери магазинө оз явитлыны.

Аскинас гөстьяс воисны, кыкөн. Резинөвөй пыжөн кывтөмаөсь, а кайисны ми дорө косьтысьны. Ми видзөдім керка дорсяныс, кызди найө лэччисны пыжсьыс көж вылас. Ваыс век на визувтө вылысьсынныс. Асьныс гөрбыльтчөмны, киясыс өшалө, кокъяссө паськөдөмөн кайөны.

— Керканыд шоньд-ө? — юалө өтиыс.

— Шоньд, шоньд,— шуө Микол.— Сөмын паськөмныдтө тані пыдзралөй, керкаас васө эн пыртөй.

Пөрччысисны, а пиньясыс лотшкакылөны.

— Мунө, мунө, пырөй, ми нин пыдзыртам.

Ми сэсся пыртім паськөмсө керкаас, өшлім. Микол кытыськө неуна водка кыпөдіс сулеяын.

— Мавтчанныд али юанныд?

— Юам кө-а,— шуөны.— Мый нин сэтысь мавтан.

Микол кисьтіс неунаөн кружка пыдөсьясө:

— Ме пондысь көть мый сэсся вөчөй. Мыйла нө йиа ваас лэччылінныд? Мый корсинныд сэтысь?

— Ті өд он на төдөй мянлысь став ускөттөсө. Первой косьыс татысянь катыдас, сэтчө мянөс. Пу вомөн пөрөма, а зэв визув. Сюйны кутіс пу улас, а пыжыс вывті тыра. Нинөм эг вермөй вөчны, путкыльтчим. Ружьеясыс вөйисны, кыкнанныс пятизарядка. Уткаыс вөлі кык мешөк тыр, тожө сэтчө. Асьным тай лөкөн-шогөн кызкө. Пыжыс эз вөй, да кутчысим.

— А водзө мый думайтанныд? Сэті, ме төда, йир, но

багырөн кө ружьяессо кызкө поэо на кышавны. А мешокьяессо найос визобыс турбыльтис кось бож гуас. Сэтысь он нин курышт.

— Лешак накөд, мешокьясыскөд. Ружьяеысы жальюсь.

— Сидзкө, дона пицальястө и пуый. Кытысь нө асьныд лоанныд? Он-ө этийө мостостройсьыс? Сө пакось... Тянөс, тыдалө, сомын сы вылө и велөдлөмны, мед юяссө мянлысь тшыкөдлыны да вөр-васө пыдзравны. А сы мында уткасө нө мыйла эськө? Тшыгось али мый?

— Абу тшыгын делөыс. Азарт. Кисьтим-кисьтим дай... лэбысьсө.

— Кутшөм гидйись ти бара петлөмныд татшөм азартной войтырыс? Ми өні мунам, а косьманныд да кывтөй, мед дукныд тані эз вөв.

Микол тшукөдіс пыжсө кось юрас, кытчө тайөяс путкыльтчөмны. Кыпөдіс сапөг чөрьяессө, босьтис пыжсьыс багыр, муныштіс кывтчөс, пөрөм пу дорөдзыс, келіс. Первой кыпөдіс ружьяессө, а мешокьяессө пөрөм пу сайсьыс нин кватитіс. Дорсьөдіс ставсө ыджыд из бокө.

— Воасны кө, аддзасны, — шуис.

Кыйим-олім Миколкөд Пурзьөмын лун дас. Епим дядь керкаын кык вой узим. Воим сэтчө, а пес чурка некөн абу. Кытысь-мый поэо черөн сөтыштны, ставсө керавлөма да лөсалөма пес вылө. Весиг пызаныс абу, ломтөмаось. Амбарыс осьса, дай сәні нинөмыс эз и вөв нин.

— Со өд сийө кутшөм, көзяинтөм керкаыс, — шуө Микол.

Гортлань мөдөдчан асылыс зэв мича лоис, лөнь. Чай юны ывлаас лөсьөдчим. Ыджыд тасьтын юквасьыс босьталөм чериыс руалө.

— Сөй пөттөдзыд, — шуө Микол. — Кор на сәсса пурзьөмса свежөй чериыс вомад волас. Дерт, ме кытчөдз ловья, лок, кор көсьян. Верман и тулысын коркө слөймөд-

чывны. Сэки тані лосьыд. Сэки Пурзьёмыс шызылас, да сылөн өнія сьёкыд кад йывсьыс шог думъясыс юрад кызкё озджык воны. А ме эска — Пурзьём оз быр. Природа-мамыс нюлас дойяссё да бёр ловзьодас.

Ме тожё эска, но бур войтырлы, кодъяс сувтасны Пурзьёмыс дор. Епим дядь коркё висьтавліс, мый на сиктын зэв нин важён синтём дед овлёма. Сійё дедыс вёлёма водзвыв тёдысь. Висьтавлёма, мый ю визяс коркё ставыс кутас быдмыны кыз. Оз вермы тадзи лоны, сёрма синтём дедыс.

БУДИЛЬНИК

Важён бензопилатөгыд пестё кералөмыд зэв ыджыд удж вёлі. Чукортчылісны куим-өнель семья да помечён керасьлісны. Водзвыв пөрөдөм пуяссё лэчыда кеслём пилаяс сёйөмөн сёйисны, вёрыс сьыліс.

Унджыкыс пестё керавлісны гёра-көдза помасьём бёрын, видз вылө петтөдз. Мукөдыс водз тулысын чарөм вывті заптысьлісны. А ми пыр гожөм заводитчигөн керасьлім. Помнита, кызди первой классын велөдчигөн батьё медводдзаысь вөрө нуліс. Мый пө верман, сійөс и вөчан.

Мөдөдчим унаөн, өкмысөн ли дасөн. Быдөн мыйкө сьөрсьыс нуис. Ме босьті будильник, мед төдны, дырө уджавны. Бать да мам эськё эз тшөктыны босьтнысё, но ме ассым сині.

Воим места вылө. Пуяссё бать пөрөдлөма нин, увйөма, ув-лыссё чукөртөма. Квайт нывбаба куим пөпереч-

каён* босьтчисны пилитчыны, а кыкён поткөдчыны. Бать, кызди көзяин, вөчис чипас места. Меным шуис:

— Тэ вай шыблав песьяссө меланьджык.

Меным радыв, мый сідзжө удж вичмис. Босьтчи. Кокни песьяссө шыбалала, сьёкыдыяссө бать дорөдз нуа. А бать найос кык пожом коластө тэчө.

Ставыс эськө бур, да номйис... Синьястө восьтны он лысьт. Сөмын на кузь төв бөрын петісны да зэв лютось. Кытчө пуксясны, сэтчө и сатшкысьоны. Оз тай корсьысьны, кыті небыдджык да чөскыдджык. Тані, нюр бокас, найө сьөдөсь да гырысьөсь, вильөдны морттө ловьявывсьыс вермасны. Бать шуө: «Он жө номлы сетчы. Өдйөджык лег дай». Оз быттьө аддзы, дзыкөдз нин пөсялі да. Нинөм он вөч, быть уджав. Няргыны кутан, ыджыдджык вокьяс серам выв лэптасны.

Пажынөдз кык сывья куим чипас артмис. Яг нөрыс тырис пожом сир көрөн. Батькөд ми мөдөдчим чай пузьөдөм вала. Көнкө пө нюрысь ёль петө да сэтчө. Бать ведра босьтис, ме — чайник. Васө ми матысьджык аддзим. Зэв джуджыд пашкыр коз, ён төлысь буракө, вужнас пөрөма. Вужля бокас и ваыс вөлөма. Көдзыд, синва кодь сөдз. Надзөникөн, мед оз гудыртчы, кружкаөн тыртим чайниксө и ведрасө.

— Зыр кө вөлі, позис эськө кодйыштны: сэсся көть ведраөн гумлав, — шуис бать. — Тэ бура видзөд, кыті мунны кутам, гашкө, ваысла выльысь тэныд котөртлыны ковмас.

Ковмис и эм. Ведрасьыд ваыс өти здукөн бырис, сэтшөм ёна уджалысьясыдлөн горшныс косьмөма. Босьті ведрасө да мөдөдчи вала. Пилитчыны дугдісны да, шы ни төв. Кыті мунны, туйсө төда. Со коз пөрөма, муөдзыс

* Пөперечка — кык воропа пила.

абу воома, улөдыс колө ляпкөдчөмөн мунны. Сэсся чард-биөн чашкөдлөм коз мыр воас, а сэсянь и вужляыс ты-дөвтчас. Сідзи и лоис. А вужля дорысь ме аддзи... йөра-ясөс. Миянлысь ванымөс юисны. Отиыс ыджыд, гашкө мамыс. Мөдыс ичөт на. Ме кынми места вылам. Ог лысьт вөрзбөдчыны, мед эз повзыны найө. Видзөда горша. Он быд лун йөраяскөд паныдась, а ме дзик на первойысь аддзи. Дыр видзөді, кыдзи юоны вөрса мөсьясыс. Дугды-лөмөн, шойччөмөн. Гашкө, миян моз жө виччысисны, кор ваыс сөдзас.

Мунисны, ме матыстчи вужля дорө. Вөрыс өні эз нин вөв сэтшөм шуштөмөн. Орччөн ловъяяс эмөсь, өтилаяысь миянкөд васө юоны. Вои да висьталі батылы, мый ванымөс йөраяс тшөтш юисны. Эз пө найө миянлысь юны, шуис бать, а ми пө налысь неуна босьтыштім.

Пажын бөрын эз вөв окота чеччыны небыд нитш вы-лысь да бара шыблавны-новлыны песьяс. Юр весьтын, мыр вылын тотшкис будильник. Ме босьті сійөс да и вешті стрелкаяссө кык час водзө. Ог төд, мыйла ме тайөс вөчи. Мөвпын эз вөв, мед водзджык гортө мунны дышла ли, номйысь ли, а со тай вешті. А гашкө, окота лоис регыд-джык ошйысьны ёртъяслы, мый йөраясөс аддзылі? Код төдас...

Бать, аддзылөма ли, мый ли будильник дорад матыст-чылөмтө да ачыс локтіс мыр дорад. Видзөдліс да кутіс шензыны: «Мый нө часіыскөд лоөма, шондіыс зэв на вылын, а сизим час нин петкөдлө? Дивө тай. Дзоньтавны квмас сөтлыны».

Час кык на мырсим. Воим гортө. Стенын өшалысь часі сизим часысь петөм петкөдліс, а будильник вылын өкмысысь нин вөлі петөма.

— Мөдысь тадз эн вөч, пиө,— шуис бать.

Өні на кыла тайө шуөмсө.

МИШАЛӨН КАНИКУЛ

Мишалөн вежайыс, Иван Михайлович, оліс орчча сиктын. Көть и орчча, а, туй кузя кө, лоө километр. Ю кузя нөшта на ылын. Сідзсө Миш Ваньыс Мишалы дядь лоө, батыслөн вок да, но чужом бөрас вежапи выло видзөма. И вежайыс, и вежай гөтырыс өна радейтисны Мишаөс, асланыс некоді эз вөв да.

Төвся каникулъяс дырйи батыс шуис Мишалы:

— Вежайыд звөнитліс, корис гөститыштны. Юн пө кыйөма — пөттөдзыд вердас. Сылөн и мукөд чериыс на эм, төвбыд тшуптасьө-гымгаасьө да. Миянлы тэкөд көсийс мөдөдыштны и. Сідзкө, ветлан?

— Ветла, дерт. Наысь аслам гажөй бырис. Гожөм-сянь нин эг вөв.

Выль во бөрас зэв көдзыд поводдя пуксис, мукөддырйи лэччывліс нелямын вит градусөдз. Татшөм көдзыд рытө и мөдөдісны Мишаөс гөститны вежайыс дорө. Пасьтөдісны шоньдджыка, гөснеч пыдди мыйсюрө пуктисны сумкаө. Буретш веськаліс сельпо машина, коді груз вайөма да өні мунө тыртөг. Мый сөмын тыртөм мешөкъяс сөвтөмаөсь, да Педь Сандыр лөсйөм чер пуяс мөдөдөма хозмагө сдайтны. Кабинаас Мишаөс шөрас пуксьөдісны, а веськыдвылас Сандыр дядьыс пуксис, дыркодь ладмөдіс кабинаас пу кок пөвсө.

Кабинаыс шоналөма нин — увсянь пөсьөн өвтө, но өшинь стеклөяссьыс гыөрыс абу на сылөма. Миша весиг оз аддзы бать-мамсө, кодъяс колльөдчөны да век на танөсь, машина дорас. Но со и вөрзисны. Шофөрыс вөлөма сөрниа морт. Первой Мишалысь быдтор юасис: кутшөм классын велөдчан да кутшөм отметкаясид, кытчө мунан да. Сэсся Сандыр дядь дорө шыөдчис:

— Уна-ө кульыштан чер пусьыд?

— Мый сетасны, сійö и ладнö. Меным, ачылд тöдан, прöстö оз шед.

— Но, дерт, ме нинöм ог шу. Пенсия дорад содтöдыс оз сорлась.

Шонылд кабинаас Мишаöс вугыр босьтис, сэссия унмовсис. Дыр-ö узис, оз тöд, садьмис, а найö сулалöны. Кабина-ыс кöдзалöма. Шофёрыс капотсö восьтöма да моторас ноксьö. Сандыр дядь водзынджык туй вылас бөрö-водзö ветлö, сöмын пу кок улас дзуртö лымйыс.

— Мый нö лоöма эськö? — матыстчис Миша шофёр-ыс дорö.

— Лоöма абу лоöма, сулалам тай-а.

Детинка сэссия нинöм эз кут юасьны, мунис Сандыр дядьыс дорö. Сійö и висьталис, мый кынмöма бензопроводыс, бензиныс оз лок.

— Нöшта кö неуна, васö ковмас лэдзны. Сэссия мый лоö, ог тöд. Кöдзыдыс пыр жмитö.

— Гашкö, бипур öзтыны, сы дорын век нин гажаджык? — юалис Миша.

— А пескыс кытысь?

— Часлы, кезала вöрас, оз-ö сись мыръяс веськавны.

Миша лэдзалис гач кокъяссö да веськöдчис вөрлань. Лым улысь пес корсьны да ещö войын. Кöдзыдыс чеплялис детинкалысь нырсö, гегдисны чуньясыс. Мыйтакö шоналыштис джуджыд лымйöд келалöмысь. Аддзис кымынкö вöсныдик потш, но вермис чегны сöмын куимöс. Мукöдыс вöлины ёнөсь на. «Весиг черыс абу машинаас, — лöга думыштис шофёр йылысь. — Но кöть тайöс колö нуны.»

Шофёрыс васö лэдзöма нин да öни кекöначасьö машина дорас. Аддзис Мишаöс:

— Хе! Кöсьян висьтавны, мый тайö пес? Тайö кыв öсык сöмын. Пескыс кузолас, кайлы сöмын да шыблав.

— Ме тайос некор ог воч... и тэ он лысьт. Неуна коть сөвестьыд колө жө... Инвалидлысь...

— Дугды, пацан! Он-ө нин көсйы менө велөдны? Ачым тода, мый вочны.

— Он на тод. А чер пуяссө эн вөрзёд,— друг конкө пемыдас кывлысис Сандыр дядь. Вензьясыяс эз и тодлыны, кыз матыстчөма.

— Тэ,— индїс шофёрыс вылө,— пырав вөрас песла. Кокьясыд тай кузьось лымыодыс келавны. Ми коть бипур дорө колям, а Мишалы медся сьёкыд пуд усьө. Сиктөдзыс колис өкмыс километр. Котөрт, пиук, тайө абу нин ылын. Ныр-вомтө видз кынтөмысь. Воан да, вежайыд мед вөв додьялас и өдйөджык татчө, мила. Со истөг куд босьт, гашкө абу, вермас ковмыны. Мун.

Миша первойсө эськө котөрөн зырөдліс, но дыр-ө котөртан, кор вылысад ватной гач, пась, а ныртө вевттьөма шарпөн. «Бурджык мунны вароваджык воськолөн»,— думыштіс зонка. Сы бөрся веськыдвылас вөтчис төлысь, эз көсйы кольччыны, мед югзёдны мунысьлысь туйсө.

Коть и төлыся вөлі, но век жө гажтөм мунны войся вөрөдыс. Туйыс петкөдіс нюр вылө, эрд вылө. Но кутшөмкө шыяс Миша век жө кылө. Тайө төвся вөрлөн войся чөв-лөнныс вурсөдчис пельясас разной шыясөн. Төлысьыс югзёдіс нюрсө аслыспөлөс рөмөн, быттьө йөлөн пызйөма нюрсө и сынөдсө.

«Тайө нюрсө вуджа да нөшта кык ёль, а сэся туйыс бергөдчас юланьыс»,— думайтө зонка. Водзысь, туй вывсьыс, Миша адзис кутшөмкө сьөдтор, коді өдйө матыстчис сылань. «Көин кө?»— вөрзис сьөлөмыс детинкалөн. Сійө перйис зепсьыс истөг кудсө, кыкысь өзтыліс. «Збыльысь али мый көин?» Миша воськовтіс водзө, бара өзтысьліс. «Бөрө косөмсьыс пөльзаыс абу, лёкджык на. Кыз-

джык бедь кө эськө вөлі. А гашкө, пон да?» Сэссия горөдіс: «Айсы, Айсы!» Пон и вөлөма. Сійө чеччалігтыр матыстчис Миша дорө, исаліс кокъяссө, чеччыштіс морөс вылас. Недыр муныштөм бөрын и вөлаыс паныдасис. Пон-йыслөн көзяиныс нуөдө больничаө висъысьөс. Сёрнитчисны.

— Сандырөс ме төда, — шуө ямщик. — Вөлі кө өтнам, бөр бергөдчылі-а... Шурин тай со коксө чегөма — быть нуөд. Коді, шуан, вежайыд?

— Миш Вань.

— А-а! Но сійө өдйө справитас делөсө. Вароладжык мун да-й. Но жө! — горөдіс вөлыслы.

Миша водзө мөдөдчис. Сёрнитігкостіыс ньылөмвыв-сьыс кынмыліс да өні бөр колө перйыны шоныдсө. Регыдөн и кык ёльсө вуджис, кайис пожөма ягө. Долюдджык лои сьөлөм вылас, матысмис сиктыс да. Но Мишалы ковмис повзъывны нөштаысь на. Сиктыс ю мөдлапөлын, а татысянь ю вылас лэччигөн, джуджыд чой йылын сиктса кладбищыс. Миша төдіс тайөс да водзвыв дасьтіс асьсө, мед нинөмысь не повзыны. Но век жө осьлалігас мөдар туй боксьыс кыліс зэв гораа крапөдчөм, а сэссия: «швач-швач-швач». Мишаөс повзёмысла быттё кодікө пуксьөдіс юж вылас. Сэссия пуля моз лэбыштіс увлань, юланьыс. Кызди юсө вуджис, омөля и помнитө. Сөмын сиктас кайигөн нин шыбитчис туй вылас, мед тырөм ловсө лэдыштны. Пуксис усьпаньвыв да сөмын сэки вартіс юрас — тайө жө чукчи лэбзис репассьыс.

Сиктыс узьө. Шы ни төв гөгөр. Сөмын көнкө тьял-скышталіс сарайө йөртөм кычипи. Понъяс садьмалісны да пондісны увтны төдтөм мортөс. Иван Михайловичлөн кык понйыс, мөдарө, төдісны да увтөны. Гажаа увтөны.

— Ваня, садьмы, понъясыд кодөскө сөйөны.

Миш Вань кывзыштіс понъяслысь увтчөмсө, шуө:

— Мыйла сёйоны? Кодикö тай ас морт, тöдöны. Гашкö, и Миша локтö. Ачыс воас öдзöсас. Но ковмас чеччыны, биасьны.

Миша и вöлöма. Миш Вань топöдлiс ас бердас йизьöм-куржöвитöм паськöма вежаписö. Пöрччöдiсны öдйöджык. Вежайыс сетiс асьыс шоныд планель пара да паччöр вылысь гын сапöг. Пуксьöдiсны пöсь чай дорö.

— Но, висьтав,— корис Иван Михайлович,— мыйла тадзисö ветлан. Аддза öд, мый подөн локтöмьд.

— Часлы, часлы,— тэрмасьöмысла джöмдалышталис Миша.— Вöв доддяв öдйöджык да скачит, кöни машинаыс сулалö. Сэни Педь Сандыр, мед кöть оз кынмы.

ОЙДӨМ ВИДЗЬЯС ВЫЛЫН

Оз позь шуны, мый Иван Иванович Потапов сэтшöм нин вöлис сюсь кыйсьысьöн да вөр-ва келöдлысьöн. Чери дорö кöть, вöрса пöтка дорö кöть — некытчö сьölöмыс бур ног эз кыскы. Но век жö öти страсть сьлөн вöли — уткаясöс лыйлыны. Кöть кодлысь юалöй, кодi быд тулыс первой чöжсö лыяс? Вань Вань, кодi нö сэсся. Тайö здукнас и олис тövбыд Иван Иванович, виччысис, кор пöльыштас лун тöv да кретша-кратшаөн чашкöдлас ю вывсьыс йисö, а ытваяс сэсся ньылыштас увтас видзьяссö да вөрьяссö, да лун тöлыскöд тшötш зырöдас войлань став лэбальысь лолыс, кодi коллялис тövсö шоныд муын.

Потаповлөн ставыс нин вöли дась. Кык ствола пищальыс да патронташыс важөн öшалiсны посводзын — петiгад и кватит. Пыжсö март помын на лад вылö вайöдiс. Дöмлис, сирөн дзужитiс, да öни ва войт некыти оз пыр,

коть гын сапөгөн пыжас пуксы. Моторас мыйсюрө веж-
лаліс, сійө сідзжө «на ходу».

Вань Вань некор эз лыйсьыв пыжсянь — эз и велавлы
чөжөс уськөдны лэбигөн, мед коть и ствол помас тшукас.
Сійө сайсянь лыйсис. Бөръяс кутшөмкө нөрыс, кодөс абу
на ойдөма, сөтас кымынкө коз понөль, сай вөчас. Сэсся
дас кымын чучела якөритас водзылас.

И пукалө, виччысьө.

Со и талун төрытья вөчөм саяс жө воис. Дженьыдик
войыс тані и коляс. Ваыс төрытсянь туөма, дзик нин сай
дорас солькөдчө. Потапов пукталіс чучелаяссө, бокөджык
вештіс пыжсө, баддьө пыртіс. Уткаыд сэтшөмторсьыд ёна
видзчысьө. Ытваяс кытыськө тыртөм ящик вайөдөма-
ляскөма нөрысас. «Тайө меным пуксыны туяс», — думай-
тө Иван Иванович. Сэсся бара на понөлясла вөрас кайліс.

Пуксис. Пось чай тыра термосыс өтар бокас, мөдарас
ружьеыс. Патронташсө чаль вылө өшөдіс. Югыд на, эз на
дзикөдз рөмды. Лөнь, но кытыськө төв ныр волывлө да
бытьө ловзьөдлө ва вылас бовъялысь чучелаяссө. Волысь
төв нырыс кайлө и мышкас сулалысь вөрас, дөсадитчө
узыны нин лөсьөдчөм козъяслы. Найө шушкөдчөны, ве-
сиг шувгытөдз воласны.

Потаповлы чомъяс шоньд, төлыс оз веськав да. Да-й
пасьтасьөма — сэсся некытчө. Ватнөй гача, шоньд свитер
вылын купайка да сы вылын на койюра брезент плащ.
Коксө гаровтөма кык пөвста нямөдөн да дзебөма резинө-
вөй сапөгө. Оз кынмөдчы Потапов, видзө асьсө. Полө сө-
мын өтиторйысь: мед эськө туысь ваыс оз вөтлы татысь
асылөдзыс. «Та ыджда ва таво, — думайтө Иван Ивано-
вич, — некор на тані дзик вөр дорас эг пукавлы». Друг
кытыськө тур-барөн шыбитчис чучелаяс пөвстас жыдач
пөв. «Та понда оз сулав вөр-васө шызьөдны», — думыштіс
да пондіс видзөдны жыдачыс бөрся. Сійө «көрөгьяс» да

«гордаяс» костас зэв жö нин коньöр вöли. Жыдач öти дорö матыстчыліс, мöд дорö да быттьö шöйöвошліс. Сэсся тувкнитіс нырнас дзик берег дорас уялысь «вöзьлы» резиновöй бокас, мыйлакö лёк ног горöдчыліс да лэбзис.

Дзикöдз рöмдіс. Неылын горда заводитліс матшкыны да öдйö бөр лөньюдчис. Сэсся сай весъттыс уліті чöж кельöб лэбис. Потапов ышловзис да югдытöдзис лöсьöдчис вугыртлыны, нёровтіс мышсö нарошнö та вылö бытшкөм кык майöглань.

Сійö жö рытнас, кор Потапов муніс аслас чомйö, öшинь дорын пукаліс совхозса механик Александр Васильевич Мосев. Сійö жö — общественной охотинспектор, вөр-ва видзись. Виччысис, кор гöтырыс чукöстас рытъя чай юны. Чай юөм бöрас Мосев тожö пуксяс пыжö да мöдöдчас коллявны войсö ойдөм видзьяс вылö, оз-ö удайтчы лыйны гоз-мöд утка. Друг сылы син улас усис: берег пöлөн мунöны кыкөн, ружьеаöсь. Сикт помас нин восьлалöны.

— Со видзöд, видзöд,— шуö гöтырыслы.— Бара нин этійö кык другыс мунöны. Тöрыт на сöмын налы висътавлі, мед сэсся эг аддзыв налысь ружьеөн ветлöдлөм. Зырымбедьяс, а ружье нин колö. Батьяссыс гусьөн, тыдалö, босьтöны. Но ме найöс аддза, көнкö бипур дорын войсö пондасны коллявны. Вöля оз ков сетны — пакöсьт вермас лоны.

Мосев дыр журъяліс моторнас, кытчöдз эз пемды, матыстчис пыжнас Арсей Миш дорö, аддзис бадь нöрысь сылысь бипурсö да. Дыркодъ сёрнитісны-варовитісны. Бипур весътас Мишлөн чайник öшалö.

— Вавывса лөптад жарыс ёна абу,— висъталö.— Кор нин öшöдлі-а. Но нинөм, часлы пузяс. Чай кутам юны.

— Тэ нö тані и пондан кыйöдчыны?

— Медся бур места. Баддяс пыра да-й. Быдладорсянь тыдалö, мед сöмын лэбны пондасны-а.

— Охотбилеттө, буди, бара вунөдін?

— Эг вунөд, со. Ружье вылас кабалаыс и.

— Бур, сідзкө. А эн аддзыв, ты боктіыс кыкөн мунісны, ружьеаөсь?

— Кодъяскө тай мунісны, ылынөсь да эг төд. Аддзылі: Потапов пырис пыжнас.

Чайникыс пузис. Сюр пырыс да вевт косттіыс петысь ваыс кусөдіс сідз нин жебиник биторсө.

— Битөг абу делө чай юны. Ме вöрас вуджала песла. Гашкө, өти бипур дорын ковмас вуджны пемыдсө.

— Кыкөн гажаджык...

Мосев вайис сирөсь вужля да кос коз кражъяс. Бөр ловзьөдісны бисө да пуксисны ызөн вылас вольсалөм пасьяс вылө чай юны. Төв нырыс гартіс тшынсө, пöльыштывліс сійөс да тшөтш и бипур жарсө чай юысьяслань.

Кос вужляыс сэтшөма босьтчис, мый кыкнанпыслы ковмис бöрынтьчыны ырзьөм бисяныыс. Кос козйыс пондіс трачкакывны да шыбласьны биа öгыръяснас. Сійө и видзөд, мед ачюд кытікө он понды тшынасьны. Мосев бергөдліс ки гугсө би югөрланьыс, видзөдліс часі вылас.

— Регыд югдыны кутас. Но, гөн ни ку тэныд, Мишө. Ме вөр дорланьыс вешъя.

Кык другыс эз биасьлыны, кызд думайтіс Мосев. Тыдалө, полісны жө, мый би югöрас кодикө вермас и локны. Найө ветлөдлыштисны берег пөлöныс, кытчөдз эз пемды, да недыр кезлө ланьтөдчылісны понөль улө. Эз ылынөсь и вöвны Потапов сайсянь.

Асья войыс ыркыд — бипуртөг понөль улад уна он вуграв. Зонъяс эз жө вугравны да, кызд сөмын асья кыаыс югзьөдыштіс ва веркөссө, кыйсигмоз веськөдчисны ва пөлөн. Кытчө усьө вөр вуджөрыс, дзик на пемыд. Мед көть и эмөсь уткаясыс, он на аддзы. Но Потаповлөн чучелаясыс веськалөмны нин югөр улас, бура кө видзөдны,

аддзан, тыдалоны. И аддзисны тай ёсь синъясыд. Дерт, чөжъясөн чайтисны.

— Вөрас, вөрас дзесбсы, пыдөджык. Сэти и мунам весьтасөдзыс.

Зонъяс төдөны, кыз колө уткаяс бөрся кыйласьны. Мед рутш ни ратш кок улад эз вөв. Воисны «чөжъяс» весьтасөдзыс. Дзик берег дорас понөль чукөр. Зэв бур, сийө сайөдө зонъясөс уткаясыс, сэтчө и колө воөдчыны. Воисны. Аслыныс долыд, мый сэтшөм гусьөн сяммисны матыстчыны, да чөжъясылөн весиг ни өти борд тувөй эз вөрзъыв. Сувтисны чом саяс, кыпөдисны двустволкаяслысь курокаяссө да пунктисны нельнан стволсө веськыда сай вылас. Көнкө зэв нин матын кылис мотор шы. Зонъяс кык дуплетөн лыйисны чучелаяс кузя. Кор разалис порок тшыныс, аддзисны: өти бөрся мөд кутисны вөйны дрөбйөн ротөссөм чучелаясыс. Вуджөр сайысь кыа югөр улас петис пыжа да нырсө веськөдис налань. Сайсыс чурвидзөны резинөвөй сапөг ныръяс. Мотор шыыс дугдис. Мосев сувтис пыжас да горөдис пышйысь зонлы: «Стоя! Сулав!»

Но вөрыс вөли вывти матын, и найө пыр жө саялисны. Мосев келис сайдорас. Потапов вөли садьтөм. «Повзьөмысла садьсө воштөма, колө өдийөджык больничаө. А кык другыс, зырымбедьясыс, некытчө оз лоны, асьныс воасны. Эг кө слөймы, Потаповлы каюк вөли. Ваыс со кызди туө — час мысти сайыс ставнас ваын лоас.»

ВУГЫР ШАТИНА ВОЙТЫР

Рытсаянъ на дасъёсь

Челядь дырйи од ми тожө ок кутшөма радейтлим вуг-расьны. Водз вөлі чеччам, шонді петтөдз на, мед асья куч-чөмсө не прөзевайтны. Рытнас, узыны водигөн, нарошнө ва юам, мыйта төрас. Тайө, майбыр, чеччөдас, некутшөм будильник оз ков. Но, дерт, мед ставыс нин вөлі дась рыт-сянъыс на: вугыр шатин запаснөй вөйөн, нидзув ли пучөй банка тыр, мыксө саммөдны лыа сора рудзөг пызь ваын суктөма-тупыльтөма. Шоммөм йөв сэтчө содтыштөма. Сэсся позьө валерьянка войт-мөд, но не унджык. Часлы висьтала, мыйла унджыксө оз ков. Кольөм во ёртъяссиянъ кывлі, тестаас пө колө валерьянка пуктыны, а уна-ө, не-коді эз вермы висьтавны. Аддзи мамө шкапысь сійө фла-консө да ставнас кисьті. Бур көрзина мык сэки вайи гортө. Бабө ошкис, тэ пө тай прамөй рыбақ нин вөлөмыд. Черисө керигөн аддзим — быдөнлөн рушку тырыс тестаис. Бабө сэсся курникъяс пөжаліс, да сөйны пуксим. Первой ме и босьті өтиөс, шепышти мыш вивсьыс небыд яйсө. Понді няклявны, но эз кылав, бөр лэдзи вомсьым. Валерьянка-ыс, вөлөм, мыкыслы лыас и куас йиджөма, ставнас дук-сьөма. Быдлаө колө мера.

Водз асыв

«Будильникыс» водз и садьмөдіс, но югыд нин вөлі. Дерт, югыд, шондіыс сөмын недыр кежлө и саявлө да. Петі ывлаө, а нинөм оз тыдав, ставыс ру пытшкын. Изъя дорөсас тшукөдөм пыжъяслөн мыгөръясыс неуна-неуна

сөмын тӱдчыштӱны. Ӳртӱй, кодкӱд вуграсьнысӱ мӱдӱд-
чам, абу на. Но мед, кадыс эм на, виччысьышта. Сӱсся
кодикӱ друг корснитӱс, да ме ӱна повзи. Видзӱдлӱ сӱтчаны
да чуйми: град йӱр медвылыс потш вылас вӱв юр ӱшйӱма,
ме вылӱ видзӱдӱ. Бара корснитӱс. Гӱгӱрвои сӱсся, мый ру
пырыс вӱлыс ставнас оз и тыдав, сӱмын юрсӱ аддза. Ма-
тыстчи да малышти бурьысӱдыс. Сьылисянныс чеп мунӱ,
а помыс оз тыдав. «А-а, тӱ тай кодлӱнкӱ домӱминысь
мынӱмтор. Но гуляйт, ылӱ он мун».

Ӳртӱй локтӱс да, пыж дорас лӱччим. Шуӱ, кыз нӱ пӱ
кутам вуграсьны, табйыс кӱ ылынджык, он нин аддзы. Но
ми йӱткысим берегсьыс шӱрлань да шыбитӱм якӱрнымӱс.
Первой ӱд мед пуксьыны да черисӱ саммӱдны-а, руыс сйӱ
ачыс кыптас, шондӱыс кокньӱдас да. Сйӱӱ, буракӱ, абу на
мыччысьӱма. Он эськӱ тӱд да. Сук ру пырыс югӱрыс оз
вермы пьськӱдчыны, да он и аддзы.

Вошласьысь табъяс

Тестасӱ неуна шыблалӱм да чӱвпетӱм. Аликлы шуи,
мед эз вӱр да эз дзурт пуклӱснас. Мык, сйӱӱ зӱв полысь
чери. Вӱйтлӱм шатин помъяссӱ, видзӱдлӱм, джуджыд-ӱ
ваыс танӱ, лӱдзим пучӱя вугыръяссӱ. Сйӱӱ колӱкӱ, шуим
мыкъяслы. Танӱ вермас и сын кутчысьны, но миян вугыр-
заводным жеб, абу сын кыскавны. Ӳн мед видзас сыысь.
Да-й ми асьным на жебӱсь. Сын кыскыны ой-ой-ой кызди
колӱ вайӱднысӱ.

Табйыс пыж дорсьыс зӱв бугра тыдалӱ. Сӱсся неуна
кылалыштас да быттьӱ заводитас сывны ру пытшкас,
вошас дзыкӱдз. Кытыськӱ сӱтысь, кӱнӱ вошӱ табйыс, ме-
ным мык кутчысис. Эм ӱти. Сидзкӱ катӱ чериыс сйӱӱд
дорас, регыд бугра пондас шедны. Сӱки ставсӱ вунӱдлан,

кор бура шедö. Кватитчим, а руыс разалöма нин. Гашкö, кайöма да кымöрөн лоöма. Гашкö, усьöма да лысваö пöрöма. Шондi кытш дорышыс мыччысьöма сикт весьтас, гöрд. Нöшта на бура кутiс шедны, быд чöвтöмсö кыскам. Дугдылас шедöмсьыс — бара шыбитам тестатор. Мыксö öд колö кызкö ылöдлыны.

Кызди сиктыс садьмö

Лöнь, төвру весиг абу, быд шы кылö садьмысь сикт-сянныс. Понъяс оз увтны, сы вöсна мый ветлысь-мунысьыс абу, увтöдны некодöс на. Кылö сöмын, кызди найö зильöдчöны чепъяснас чом вывсьыс лэччиг-кайиг.

Сиктным миян гожöмын водз садьмö. Видз вылö мунтöдз кöзьяйкаяслы колö мöсьяссö лысьтыны, пусьыны-пöжасьны, а мужикъяслы литовкаяс дорны-лэчмöдны. Быдтор колö вевйöдчыны гожся асылö. Сиктыслысь садьмöмсö первойөн висьталас пач трубаясысь пуркйысь тшын серти. Талун сийöс увлань личкö, ю вылас лэдзö. Тшын кöрыс весиг миянöдз воис. Зэрас али мый талун, тшынсö кö вольсыштiс му вылас, ю вылас? Картаясын кывлысисны мöсьяс — корöны кöзьяйкаяссö регыдджык лысьтыны, да мед сэсся лудö лэдзасны. Берегдорса пывсян дорын кык нывбаба варовитöны, а мый йылысь, он гөгöрво. Вöтъяссö буди висьталöны. Тайö налөн первой делö, пачнысö на, гашкö, эз ломтывны-а.

Кыпöдiм якөр

«Талун кежлö тырмас миянлы, — Аликлы шуи. — Кыпöдам якöрсö, даргаысь кындзи, нинöм жö эз кут шед-

ны-а». Сэтшөм примета эм вуграсьысьяслөн: пондас кө дарга дөзмөдчыны, мык эн виччысь. Либө горгад кай, либө местасө веж. Но миян быть гортө — видз вылө жө ыстасны. Тани, пыжас, лунтыр пукавны да вугыр шатин-өн өласьны, дерт, абу лёк. Купайтчы көть сьёлөмыд йөктытөдз. Но миян некор вөлі тадзисө овны. Первой сөйыштам, а сөсся мунам конюшняө вөвъяс дорө. Лэччөдлам юктөдны да айда видз вылө. Коді куртны, коді турун кыскавны.

Гажа и кад челядьдырид.

ЫДЖЫД МАМ ОРДЫН

— Славик, Вовик, чеччөй нин сөсся! — чуксалис мамныс, сизим час на эз вөв-а. — Бабныд, көнкө, виччысьө, блин пөжаліс.

Олө бабныс мөдлапөвса ичөтик сиктын. Вєсьтөдзыс колө мунны бура дыр берегпөлөнсө вөрөд да вөлисти нин вуджны бабныскөд мөдлапөлас. Төвнас вокъяс вуджавлісны баб ордас шөйччан лунъясө, кор оз ков котөртны школаө, а өні, гөжөмын, кор дум выланыс усьө. Быд вуджалігөн бабныслы вежон-мөд кежлө пес поткөдлөны, став ведрө да бакө ва ваялөны.

— Мися, виччысьө бабныд, чеччөй! — эз лэдзчысь мамныс. — Блинтө, көнкө, бара пөжаліс.

— Чеччам, чеччам. Дзик пыр чеччам, — көсйысис Славик, вокъяс пиысь ыджыдджыкыс, да збыльысь лэдзис джоджө эшкын улысь кокъяссө. Сы бөрся тадзи жө вөчис Вова.

Асья шондыс вөлі улын на, кор зонкаяс петісны

гортсыныс. Первойсö мунисны козъя вөрöд. Сэни вöли ыркыд. Тайö ыркыдыс кайис нитшвывса косьмытöм на лысваысь. Лысва войтъяс вöлины и пуысь пуö нюжöдчöм черань везъяс вылын, личкöмаөсь найöс увлань. Уськöдчисны номъяс, көть век котöрт, мед эз суны. Зонкаяс босьтисны кианыс кыддысь нетшыштöм росъяс, кутисны зiля öвтчыны.

— Ме кывли,— шуис Вова,— ай номйис пö оз курчась, турун сёйö.

— Йöй кө тэ-а. Гашкö, и рöмидзтö на мös моз да?

— Он эскы? Книгаö гижöма. Со, видзöд, видзöд: пель дорам лэбалö, а оз пуксыы. Тайö и эм ай номйис.

Петисны видз вылö. Куим кымын покос пасьта и эм, но нюжöдчöма бабныслөн сикт весьтöдз да водзö на. Тани вöли тöвруа, унджык номйис кольччис вөрö.

— Гашкö, купайтчам?— юалис Вова.

— Тэ нö мый, көдзыд на ваыс. Суныштан кө — коктö пеляд кыскас.

— Бабным миянös, көнкö, аддзö нин.

— Видзöдö кө, аддзö, а оз кө — горзыны кутам.

Славиклы синъяс улас усисны катшасинъяс. Нетшыштіс öтиös.

— Часлы, гадайтá, пöжаліс-эз бабным блинсö.

Кутіс нетшкыны дзоридзыслысь сыръяссö да шуавны: «Пöжаліс — эз пöжав, пöжаліс — эз пöжав». Медбөръяысьсö шуис «пöжаліс».

— Ноко, ме видла,— шуис Вова да нетшыштіс öти дзоридз. Сыръяссö чирсöм бöрын сылөн петкöдліс «эз пöжав». Славик шуис: блинтöг пö олышт, кынöмыд гадь кодь на.

Видзöдлісны юлань, а бабныс ю шöрын нин. Пыжыс ичöтик, сійөн чери кыйны ветлывлö. Матыстчис берелань, öлöдіс:

— Пуксьöй да эн дзöрöй, ачым вуджöда. Тiянлы ва катлан да пес поткöдлан уджыд эз на быр.

Быд волiгöн тадзи. Славик, ёнджык да, пес поткöдлö, Вова ва ваялö.

Вуджöм бöрын ыджыд мамныс юалис:

— Сёйыштанныд первой али уджалыштанныд?

— Уджалыштам кö-а,— окотитiс Славик.

Вова нинöм эз шу, сылөн дум вылас вöли блин. Эз, гашкö, ачыс блиныс, а пöжалiс-ö бабыс блинсö.

Петiсны керкаысь. Славик мöдöдчис пес лэбувлань, а Вова — юкмöс дорö. Сöмын на кöсйис лэдзны ведрасö, матыстчис Вадим другыс:

— Мунам ворсны миянкöд мач песöмысь. Мить Лёнъ пöвтöг колис да ворстöг сулалö. Ватö бöрынджык катлан.

— Бöрынджык кö и бöрынджык...

Славик зэв уна пес поткöдлiс, тöлысь тырмас. Ставсö лöсьыда тэчис. Вова ньöтчыд на эз катöд васö. Бабныс кутiс майшасыны:

— Корсьны кö ветлыны-а...

— Оз ков, ачыс локтас. Кытчöкö ылалiс, көнкö,— шуис Славик.

Ыджыд мамныс кутiс лöсьöдны пызан. Вайис шыд. Ыж яй пö пулi. Кöвдум лэптiс и. Сэссия пачысь перйис блин тыра рач. Гöраён блинсö тэчöма. Пöтан и шыд сёйтöг.

— Эн сотчы, блиныс пöсь. Вилкаён сёй. Первой панясь,— велöдiс Славикöс пöрысь морт.— Ме ветла воктö корсьны.

Славик шыдтö кыкысь ли, куймысь ли и паньыштiс, уськöдчис блин вылö. Тököтьö кушöдз эз тяпкöд, öддзис да. Но бура уна на вокыслы колис.

Воис ыджыд мамыс, ва тыра ведраяссö Вовалысь вайис.

— Эг аддзы,— шуис.— Гөнъ Васьяс дорын челядь кы-

лөны да, гашкө, сэні. Ылынкодъ да, эг нин мун. Локтас жө коркө...

Вова локтіс бура дыр мысти на. Мудзөма, тшыгъя-лөма.

— Ыджыд мам, блинтө пөжалін? — юалис.

— Вөлі эськө да... Ог төд, колис-эз Славикыд.

— Тэ кодъ гуленьтө көть эськө абу чөсмөдлөма да. Радлы, мый ичөт на. Жальөй петіс да, эг ставсө сөй. Пөв-сав да ыджыд мамыдлы аттө висьтав,— ыджыд туйө пуксис Славик.

ОШ ЛОКТӨ

Пукалісны рытнас вуграсьом бөрын куим ёрт да висьтавлісны, кодкөд кутшөм тешкодътор вөвлөма чери кыйгөн да вөрті ветлігөн. Дас вит арөс сетан, а сёрни сертиныс нэм олөмаось, быдторсө вевъялөмаось аддзывны да төдлыны.

Оти казътыліс:

— Коркө кыснаси Вис куръяын. Кодкө зэв ён крукасис. Колө кыскыны, а пыжа локтө, буретш рыбинспектор Пунегов. Дзебыштөмөн домалі кыснан көвйөс пыж бокө, а ачым быттө моторын лукйыся. Матыстчис Пунеговыд да юалө: мый пө вөчан? Мися, моторөй дудіс да оз көсйи заведитчыны. Сідзкө пө вөч, шуис да кывтіс водзө. Көджыс морттө сайөдіс, да босьтчи черитө лэптыны. Съомга вөлөма. Нюйт пиас пырөма да өдва и кыски. Порсь туша кодъ вөлі. Воккөд кыкөн катөдім войнас пывсянөдз.

Мөдлөн висьтыс вөлі татшөм:

— Батькөд мөдөдчим чөс туй кыйны. Сійө вожалө,

а сэсся отлаасьё да бөр өти туй лоо. Ме отар вожодыс му-
ні, а бать — мөдародыс. Сэки буретш ошъяс вөлі шөйтө-
ны-гуляйтөны. Нюр коліс вуджны. Петі вөрысь, сөмын
воськовті нитш вылө, аддза: нюр шөрын куим ош. Кыкыс
ёрта-ёртсө летөны, а коймөдыс — найос кыкнансө. Ружье-
өй менам тридцать второй. Дрөбъя зарадон, сьөлаысь
кындзи, нинөм он уськөд, а пулянас слөнөс позьё тур-
быльтөдны, карабин вылө ог веж.

— Вывті жө эськө сөран да. Ог веж пө...

— Эн торкав, кывзы водзё. Стволас пуляа патрон и
вөлі, мөдөс перйи, киам кута. Оти ошкөс, мөвпала, чер-
гөдны колө. Метиті-метиті. Дзөрөны да, некыз ог вермы
пезьдөдны. Лыйи жө медбөрын. Тшыныс разаліс да ад-
дзи: куимнанныс гатшаөсь...

— Сөрнытө морт, велөдны оз ков.

— Сөра, шуан? Ена мен окота. Он кө эскы, бательысь
юав.

— Сійө өд тэ кодь жө. Али тэ сы кодь? Ме вай нөшта
висьтала. Тайө дзик нин збыль вөлі. Батькөд вөр керкаын
олім, чөс туй вөчим-лөсьөдім, чери кыйим. Войясыс зэв
нин пемыдөсь вөліны. Бать шуис отчыд, вай пө кыбны
лэччылам, оз-ө налимъяс сюрны юква вылө? Пөрөдім
сирөд пожөм. Бать меным тшөктіс чинтавыны кык-куим
кузя чуркаөн, а ачыс муніс нөшта пожөм корсьны. Ме
пилиті, кусөді пилаөс да пукси шойччыштны, бательысь
чукөстөм виччыся. Мышкам трачнитіс, но эг и бергөдчыв.
Мися, бать ветлөдлө. Сэсся кыліс ума-ама. Бергөдчи, а
ошкыс дзик нин вылам кайөма. Сувтөма бөр кокъяс вы-
лас, водз гыжъяснас ворсө-сяркөдчө. Вөрзьины оз лэдз.
Ме кө вөрзьишта, и сійө воськовтас. Пила кок улын, стар-
тёр бокам ошалө. Босьті гусьоникөн, пукті пила помө,
өдйө сувті да деркниті. Заведитчис өд. Ош мелань, а ме
сылы воча. Газуйта, кызд верма, чеп швыркйө-бергалө.

Дзик ныр дорөдзис воліс, төкөтө юрсө эг пилит. Нөшта кө неуна и. Повзис ошкыд да горзигтыр муніс ме дорысь. Повзьөмысла дрищитөма зэв кизьөра.

— Ачылды быттьө эн и повзы?

— Повзылі жө, мыйла эг?

Коймөд зонкаыс чөв оліс. Сійө ошгьяскөд эз паныдасьлы, ошйысьны нинөмөн, да и эз радейт нинөм абусө больгыны.

Друг вөрас мыйкө дзуртыштіс да ратшмуніс. Тадзө пу пөрлө. Чөв олысь зонкаылды горөдіс:

— Ош, ош локтө!

Кык другөс бипур дорсыды быттьө төв ныр пөлыштіс. Чепөсйиганыс чайниксө пөрөдісны, бипурсө разөдісны, чой вывсянь кытчөкө чеччыштісны пемыдас. Пыжө өтиыс эз веськав да ваө бузгысис. Мөдыс йөткыштчөма нин берегсысыс да горзө:

— Кавшась пыжас! Көні Көсьтаыс?

А Көсьта сералөмысла туплясис берег вылын. Сійө эз думайт, мый тадзи повзясны «быдтор төдлысь» өртгьясыс.

ГУСЯСЫСЬ

Кыкөн бура дыр кежлө мунісны вөрө кыйсьыны. Вельдыжыд нопгьясөн катөдісны сөян-юан. Воисны вөр керкаө да бура дыр ломтісны-шонтісны сійөс, некымынысь содтылісны пессө.

Узыны водігөн, жар лоис да, мый вөлі, ставсө пөрчисны вывсьыныс. Водісны. Коркө, вой помланьыс, өтиыс, Вась нима, садьмыліс ывлаө петавлыны. Лампа биаліс,

мед вылас кутшөмкө көлуй шыбитлыны — ывлаас төв шутьляліс. Босьтчис гачасьны да кыкнан гач коксьыс кутіс вермишель киссьыны, а дөрөмсьыс — сукар. «Мый нө тайө Петырыс йөйталө, тешитчө сөян вылас?» — чайтіс, мый ёртыс тадзи дурис.

Вась петалис да бөр водіс, а сы бөрын садьмыліс Петыр. Босьтчис гын сапөгсө көмавны, а сәні мыйкө эм. Увланьюрөдіс да зөв уна сакар киссис. Гашкө, килограмм лоас. «Но и Вась,— мөвпалө.— Бипур эн виччысь тадзитө тешитчөмсьыд. Час, садьмылан асывнас.»

Чеччисны да муртса тышкө эз воны. Весиг өдзөс, кодныскө инмөдчисны да, вомсө калькнитіс. Сәтчө и визнитіс, аддзис югыдсө да, ноп мешөкысь визьяорда — ичөтик гусясьысь. Коркө тай удитлөма пыравны вөр керкаас.

ЮРИНДАЛЫСЬ

Войнабӧрся повесть	5
Висьтъяс	
Пурзьӧмын ар пом	59
Будильник	82
Мишалӧн каникул	85
Ойдӧм видзьяс вылын	89
Вугыр шатина войтыр	94
Ыджыд мам ордын	97
Ош локтӧ	100
Гусясысь	102

Литературно-художественное издание

Для детей младшего школьного возраста

АФАНАСЬЕВ Евгений Степанович

КОНЕЦ ОСЕНИ НА ПУРЗЕМЕ


*Повесть, рассказы
На коми языке*


Редактор *А. В. Тентюков*. Художник *Е. П. Борисевич*. Художественный редактор *В. Б. Осипов*.
Технический редактор *А. Н. Вишнева*. Корректоры *М. М. Лужикова, Н. Ф. Габова*.

ЛР № 010039

Сдано в набор 20.12.93. Подписано к печати 29.03.94. Формат 70×90^{1/16}. Бумага офсетная. Гарни-
тура «Школьная». Печать офсетная. Усл. печ. л. 7,605. Усл. кр.-отт. 15,8. Уч.-изд. л. 4,63. Тираж 1750.
Заказ № 167. Коми книжное издательство. 167610, г. Сыктывкар, ул. К. Маркса, 229.

АО «Коми республиканская типография». 167610, г. Сыктывкар, ул. Первомайская, 70.





Коми
книжной
издательство
1994